



# KANUNI ZA KUDUMU ZA BARAZA LA WAWAKILISHI ZANZIBAR

TOLEO LA MWAKA 2024



TANGAZO LA SERIKALI NAM. 103 LA TAREHE 30 AGOSTI, 2024

## KANUNI ZA KUDUMU ZA BARAZA LA WAWAKILISHI ZANZIBAR

TOLEO LA MWAKA 2024

(Toleo hili la Kanuni za Baraza la Wawakilishi limejumuisha marekebisho yote yaliyofanywa katika Kanuni za Baraza la Wawakilishi za mwaka 1994 tokea zilipoanza kutumika Mwaka 1995 hadi marekebisho yaliyofanywa mwezi wa Juni, 2024 kwa madhumuni ya kurahisisha marejeo ya Kanuni)

[*Zimetungwa chini ya kifungu cha 86(2) cha Katiba ya Zanzibar ya 1984*]

Zanzibar  
Juni, 2024

RAYA ISSA MSELLEM  
Katibu (BLW)  
Zanzibar



# **KANUNI ZA KUDUMU ZA BARAZA LA WAWAKILISHI**

## **SEHEMU YA KWANZA MASHARTI YA AWALI**

1. Jina.
2. Matumizi.
3. Tafsiri na Ufafanuzi.

## **SEHEMU YA PILI VIONGOZI WA BARAZA**

4. Spika na upatikanaji wake.
5. Mamlaka ya Spika.
6. Naibu Spika na upatikanaji wake.
7. Wenyeviti na upatikanaji wao.
8. Kiongozi wa Shughuli za Serikali katika Baraza.
9. Mnadhimu wa Serikali katika Baraza.
10. Mnadhimu wa Chama.
11. Wajumbe kugawika pande mbili.
12. Katibu wa Baraza na majukumu yake.
13. Mkurugenzi wa Idara ya Ushauri wa Kisheria.
14. Mkuu wa Divisheni ya Kamati na majukumu yake.
15. Makatibu Wasidizi na kazi zao.
16. Wapambe wa Baraza.
17. Majukumu na kazi za Wapambe wa Baraza.

## **SEHEMU YA TATU MIKUTANO NA VIKAO**

18. Mkutano wa Kwanza.
19. Shughuli za Mkutano wa Kwanza.
20. Rais kulihutubia Baraza.
21. Pahala pa kufanya Mkutano.
22. Nyakati za vikao.
23. Kuahirisha kikao.
24. Kuahirisha Mkutano.
25. Luga ya Baraza.

**SEHEMU YA NNE  
UTARATIBU WA SHUGHULI ZA BARAZA**

26. Wimbo wa Taifa na kusomwa Dua.
27. Utaratibu wa Shughuli za Baraza.
28. Kiapo cha Uaminifu.
29. Taarifa ya Rais.
30. Kuwasilisha Maombi.
31. Baraza kushughulikia Maombi.
32. Hati za kuwasilishwa Mezani.
33. Kujadili hati zilizowasilishwa.
34. Swalii.
35. Taarifa ya swalii.
36. Masharti ya kuuliza swalii.
37. Wajibu na mipaka ya kujibu swalii.
38. Kukataliwa kwa swalii.
39. Utaratibu wa kuuliza na kujibu swalii.
40. Maswali ya nyongeza.
41. Masharti ya maswali ya nyongeza.
42. Hoja ya kujadili jambo la dharura.
43. Masharti ya jambo la dharura.
44. Kauli ya Serikali.
45. Taarifa ya Serikali.
46. Maelezo Binafsi ya Mjumbe.
47. Hoja kuhusu haki za Wajumbe.
48. Shughuli za kawaida za Baraza.
49. Mjadala kuanzishwa kwa hoja.
50. Masharti ya hoja.
51. Taarifa ya mabadiliko ya hoja.
52. Hoja zisizotolewa taarifa.
53. Kubadili maneno ya hoja.
54. Utaratibu wa kujadili hoja.
55. Kubadilisha hoja katika Baraza.
56. Namna ya mabadiliko ya hoja.
57. Utaratibu wa kujadili mabadiliko ya hoja.

58. Kubadilishwa mabadiliko ya hoja.
59. Utaratibu wa kuondoa hoja ya mabadiliko.
60. Taarifa ya utekelezaji wa hoja.

### **SEHEMU YA TANO TARATIBU ZA MAJADILIANO**

61. Namna na muda wa kuchangia ndani ya Baraza.
62. Mambo yanayofaa na yasiyofaa kuzungumzwa.
63. Kuzungumza zaidi ya mara moja.
64. Masharti kwa Wajumbe katika Baraza wakati wa mjadala.
65. Matumizi ya kifaa cha kielektroniki.
66. Kukatiza majadiliano.
67. Taarifa huhusu utaratibu
68. Kuahirisha majadiliano.
69. Kufunga mjadala.

### **SEHEMU YA SITA UDHIBITI WA AMANI, UTULIVU, HESHIMA NA UWAJIBIKAJI KATIKA BARAZA**

70. Wajibu wa Mjumbe.
71. Spika kusimamia Kanuni.
72. Mjumbe anaposema mambo yasiyofaa.
73. Kusimamishwa kwa Mjumbe.
74. Mjumbe kutokujali mamlaka ya Spika.
75. Mjumbe aliyesimamishwa kazi.
76. Mjumbe kuomba radhi.
77. Fujo ndani ya ukumbi wa Baraza.

### **SEHEMU YA SABA UHALALI WA SHUGHULI ZA MIKUTANO NA VIKAO VYA BARAZA**

78. Akidi ya kikao.
79. Mahudhurio katika Baraza na Kamati zake.

80. Uamuzi kwa wingi wa kura.
81. Kura ya Spika.
82. Kupiga kura katika Baraza.

## **SEHEMU YA NANE UTARATIBU WA MISWADA NA UTUNGAJI WA SHERIA**

83. Aina za Miswada na uwasilishwaji wake.
84. Utangazaji wa Mswada wa Serikali.
85. Mswada wa Dharura.
86. Mswada wa Kamati na Mswada wa Mjumbe.
87. Kuwapatia Wajumbe nakala ya Mswada.
88. Kusomwa kwa Mswada.
89. Mswada kupelekwa kwenye Kamati.
90. Mswada kufanyiwa mabadiliko.
91. Mswada kusomwa kwa Mara ya Pili.
92. Kuzuia Mswada kusomwa kwa Mara ya Pili.
93. Kujibu hoja zinazohusu Mswada.
94. Mswada kurudishwa kwenye Kamati au Wizara.
95. Miswada katika Kamati ya Kutunga Sheria.
96. Hoja ya kupitishwa Mswada.
97. Mswada kusomwa kwa Mara ya Tatu.
98. Kuuondoa Mswada katika Baraza.
99. Kibali cha Rais kukamilisha Mswada na kuwa Sheria.

## **SEHEMU YA TISA UTARATIBU WA KUPITIA BAJETI NA KUTUNGA SHERIA YA MAMBO YA FEDHA**

100. Baraza Kujadili Mwelekeo wa Mpango wa Taifa.
101. Makadirio kuwasilishwa kwenye Kamati.
102. Utangazwaji wa Mswada wa Makadirio.
103. Majadiliano ya Makadirio ya Wizara.
104. Bajeti Kuu ya Serikali kupitiwa na Kamati.
105. Muda wa Kufikiria Makadirio.
106. Uwasilishwaji wa Bajeti Kuu ya Serikali katika Baraza.

107. Hoja ya kupunguza fungu.
108. Hoja ya kupunguza kifungu au programu ndogo.
109. Masharti ya hoja ya kupunguza fungu.
110. Utaratibu katika Kamati ya Matumizi.
111. Kuongeza muda wa kushughulikia fungu.
112. Siku ya mwisho ya kushughulikia Makadirio.
113. Kukubaliwa kwa Makadirio.
114. Mswada wa Matumizi ya Nyongeza.

### **SEHEMU YA KUMI KAMATI ZA BARAZA**

115. Kamati za Vyama vya Siasa.
116. Mikutano ya Kamati za Vyama vya Siasa.
117. Kamati ya Baraza Zima.
118. Utaratibu katika Kamati ya Baraza Zima.
119. Kamati za Kudumu za Baraza.
120. Uteuzi wa Wajumbe wa Kamati.
121. Uchaguzi wa Viongozi na mahudhurio ya Wajumbe katika Kamati.
122. Utaratibu wa vikao vya Kamati.
123. Ushiriki wa Waziri katika vikao vya Kamati.
124. Ripoti za Kamati.
125. Utaratibu wa jumla wa Kamati.
126. Muundo wa Kamati ya Uongozi na Shughuli za Baraza.
127. Majukumu ya Kamati ya Uongozi na Shughuli za Baraza.
128. Akidi ya Kikao cha Kamati ya Uongozi na Shughuli za Baraza.
129. Sekretarieti ya Kamati ya Uongozi na Shughuli za Baraza.
130. Kamati ya Maadili, Kinga na Fursa za Wajumbe.
131. Kamati Teule.
132. Akidi na utaratibu wa Kamati Teule.
133. Taarifa ya Kamati Teule.

**SEHEMU YA KUMI NA MOJA  
KUMUONDOA MADARAKANI RAIS,  
MAKAMU WA RAIS, SPIKA, NAIBU SPIKA NA  
MWENYEKITI**

134. Taarifa ya hoja ya kumshtaki Rais.
135. Kuondoa hoja ya kumshtaki Rais.
136. Taarifa ya Kamati Maalumu ya Uchunguzi.
137. Taarifa ya Azimio la kumshtaki Rais.
138. Hoja ya kutokuwa na imani na Makamu wa Rais.
139. Muda wa kujadili hoja.
140. Kuondoa hoja ya kutokuwa na imani na Makamu wa Rais.
141. Azimio la kutokuwa na imani na Makamu wa Rais.
142. Maelezo ya kujiuzulu.
143. Taarifa yenye azma ya kumuondoa Spika, Naibu Spika au Mwenyekiti.
144. Masharti ya azma kupelekwa katika Baraza.
145. Kuongoza mjadala.

**SEHEMU YA KUMI NA MBILI  
WAGENI KATIKA BARAZA**

146. Waandishi wa Habari.
147. Ruhusa kwa Wageni.
148. Mamlaka ya kuwaondoa Wageni katika Baraza.
149. Mgeni Rasmi.

**SEHEMU YA KUMI NA TATU  
UKAAJI NDANI YA BARAZA**

150. Ukaaji wa Spika na Katibu Mezani.
151. Ukaaji wa Wajumbe ndani ya Baraza.
152. Ukaaji wa Watumishi.
153. Ukaaji wa Wageni ndani ya Baraza.

## **SEHEMU YA KUMI NA NNE ITIFAKI YA BARAZA**

154. Alama za Baraza.
155. Siwa la Baraza na matumizi yake.
156. Bendera ya Baraza na matumizi yake.
157. Nembo ya Baraza na matumizi yake.
158. Matumizi mabaya ya Alama za Baraza.
159. Mavazi.

## **SEHEMU YA KUMI NA TANO**

### **UTARATIBU WA UCHAGUZI WA WAWAKILISHI WA BARAZA WANAOINGIA KATIKA BUNGE LA JAMHURI YA MUUNGANO WA TANZANIA**

160. Wajumbe wa kuingia katika Bunge.
161. Masharti na utaratibu wa kuchaguliwa.

### **SEHEMU YA KUMI NA SITA MASLAHI NA STAHIKI ZA VIONGOZI NA WAJUMBE**

162. Maslahi na Stahiki ya Viongozi na Wajumbe.

### **SEHEMU YA KUMI NA SABA MAMBO MENGINEYO**

163. Taarifa Rasmi.
164. Kutangazwa kwa kifo cha Mjumbe.
165. Mjumbe kupoteza uwakilishi.
166. Kutenga Kando Kanuni.
167. Marekebisho ya Kanuni.
168. Baraza la Wawakilishi la Vijana.
169. Jumuiya au Klabu za Wajumbe.
170. Haki ya kujitetea na kujisafisha.
171. Shukurani, pongezi na pole.
172. Mambo yasiyowekewa masharti.

173. Adhabu ya jumla.
174. Ukaguzi.
175. Miongozo ya Kanuni.
176. Kuchapishwa upya Kanuni.
177. Kufuta na kubakiza.

# **KANUNI ZA KUDUMU ZA BARAZA LA WAWAKILISHI**

## **SEHEMU YA KWANZA MASHARTI YA AWALI**

**1.** Kanuni hizi zitajulikana kama Kanuni za Kudumu za Baraza Jina la Wawakilishi la Zanzibar, Toleo la mwaka 2024.

**2.-(1)** Kanuni hizi zitafuata masharti ya Katiba.

Matumizi.

(2) Bila ya kuathiri masharti ya Katiba, Kanuni hizi zitatumika katika mambo yanayohusiana na utaratibu wa uendeshaji wa shughuli za Baraza na zitaanza kutumika baada ya kupitishwa na Baraza na kutangazwa katika Gazeti.

**3.** Isipokuwa kama itaelezwa vyenginevyo katika Kanuni hizi: Tafsiri na Ufafanuzi.

“Afisi ya Baraza” maana yake ni Afisi ya Baraza la Wawakilishi iliyoanzishwa na kufanya kazi zake kwa mujibu wa Katiba na sheria zinazohusika;

“Baraza” maana yake ni Baraza la Wawakilishi la Zanzibar lililoanzishwa kwa mujibu wa Katiba na linajumuisha Kamati ya Baraza Zima au Kamati nyengine yoyote ya Baraza;

“Gazeti” maana yake ni Gazeti Rasmi la Serikali ya Mapinduzi ya Zanzibar;

“Hoja ya Kamati” maana yake ni hoja inayotolewa kwenye Baraza na Mwenyekiti wa Kamati au Mjumbe wa Kamati kwa niaba ya Kamati;

“Hoja ya Mjumbe” maana yake ni hoja inayotolewa kwenye Baraza na Mjumbe asiyekuwa Waziri au Mwanasheria Mkuu;

“Hoja ya Serikali” maana yake ni hoja inayotolewa kwenye Baraza na Waziri au Mwanasheria Mkuu;

“Kamati” maana yake ni Kamati ya Kudumu ya Baraza iliyoanzishwa kwa mujibu wa kifungu cha 85 cha Katiba na Kanuni hizi na inajumuisha Kamati nyengine yoyote itakayoanzishwa na Baraza kwa ajili ya kutekeleza majukumu ya Baraza;

“Kamati ya Baraza Zima” maana yake ni Kamati inayojumuisha Wajumbe wote wa Baraza wakati wanapokaa kupitisha vifungu vya Mswada au vifungu vya Makadirio ya Mapato na Matumizi;

“Katiba” maana yake ni Katiba ya Zanzibar ya 1984;

“Katibu” maana yake ni Katibu wa Baraza aliyeulewa kwa mujibu wa Katiba, ambapo inajumuisha Katibu Msaidizi au Mtumishi mwengine ye yoyote wa Baraza aliyeidhinishwa na Katibu kutekeleza kazi yoyote ya Katibu wa Baraza;

“Kauli ya Serikali” maana yake ni kauli inayotolewa na Kiongozi wa Shughuli za Serikali katika Baraza au Waziri kwa idhini ya Spika inayohusu sera au matokeo yoyote ambapo Serikali inawajibika kuyatolea ufanuzi mbele ya Baraza;

“Kifaa cha kielektroniki” maana yake ni kifaa cha kielektroniki au chombo au mfumo wa teknolojia ambao hutumika kufanya kazi fulani kwa kutumia umeme au mzunguko wa umeme, ambapo hujumuisha vifaa vya simu za mkononi, vishikwambi, kompyuta, kamera, kamera za ulinzi, vipaza sauti, televisheni na vifaa vyengine vinavyofanana na hivyo;

“Kikao cha Baraza” maana yake ni Kikao cha siku moja au sehemu ya siku endapo Baraza halikukaa kwa siku nzima kinachoanza kwa kusomwa dua na kumalizika kwa kuahirishwa Baraza hadi siku inayofuata au siku nyengine ya baadae;

“Kiongozi wa Shughuli za Serikali katika Baraza” maana yake ni Makamo wa Pili wa Rais aliyeteuliwa kwa mujibu wa masharti ya Katiba;

“Kitabu cha Shughuli za Baraza” maana yake ni kumbukumbu ya kudumu inayowekwa na Katibu kwa mujibu wa aya ya (d) ya fasili ya (3) ya kanuni ya 12 ya Kanuni hizi;

“Maeneo ya Baraza” maana yake ni eneo lote lililozungushwa uzio na linajumuisha ukumbi ambao hutumika kuendeshea shughuli za Baraza pamoja na afisi, vyumba, vyumba vidogo vidogo, eneo la watazamaji au eneo la wageni ndani ya ukumbi, uwanja, eneo la bustani na pahala pengine popote palipowekwa kwa ajili ya Shughuli za Baraza au panapotumiwa na Wajumbe, Maafisa au Wageni na pia sehemu za kupita kuelekea eneo lolote kati ya hayo pamoja na eneo lolote ambalo litatangazwa kwa nyakati tofauti na Spika kuwa ni eneo la Baraza;

“Makamu wa Rais” maana yake ni mtu aliyeteuliwa na Rais kushika wadhifa huo kwa mujibu wa Katiba na inajumuisha Makamu wa Kwanza na Makamu wa Pili wa Rais;

“Maslahi binafsi” maana yake ni jambo lolote ambalo Mjumbe ana manufaa, faida au maslahi mengine yanayotokana na uhusiano wa kijamii, kisiasa, kiuchumi au kiutamaduni ambalo utekelezaji wake utaweza kuathiri utendaji au uamuzi wa kazi zake;

“Mkurugenzi wa Idara ya Ushauri wa Kisheria” maana yake ni Mkurugenzi wa Idara ya Ushauri wa Kisheria wa Baraza aliyeteuliwa kwa mujibu wa sheria na inajumuisha Mtumishi mwengine yejote wa Baraza aliyeidhinishwa na Katibu kutekeleza kazi yoyote ya Mkurugenzi wa Idara ya Ushauri wa Kisheria;

“Mgeni” maana yake ni mtu yejote ambaye si Rais, Mjumbe, Katibu, Mtumishi wa Baraza au Mtumishi mwengine yejote ambaye hatekelezi kazi maalumu zinazohusu Baraza;

“Mgeni Rasmi” maana yake ni Rais, Waziri Mkuu, Spika wa nchi nyengine au Kiongozi mwengine yejote anayetambulika kitaifa au kimataifa ambaye amealikwa kuzuru au kuhutubia Baraza;

“Mjumbe” maana yake ni Mjumbe wa Baraza;  
“Mkutano wa Baraza” maana yake ni kikao au mfululizo wa vikao kuanzia kikao cha kwanza hadi kufikia wakati ambapo shughuli zote zilizopangwa kwa ajili ya Mkutano huo zitakuwa zimemalizika;

“Mnadhimu wa Chama” maana yake ni Kiongozi aliyechaguliwa na Wajumbe wa chama cha siasa chenye Wajumbe ndani ya Baraza kutoka mionganini mwao kwa ajili ya kuratibu shughuli za chama hicho ndani ya Baraza;

“Mnadhimu wa Serikali” maana yake ni Kiongozi aliyeeteuliwa na Serikali kutoka mionganini mwa Mawaziri kwa ajili ya kumsaidia Kiongozi wa Shughuli za Serikali katika Baraza kuratibu Shughuli za Serikali ndani ya Baraza;

“Mwandishi wa Habari” inajumuisha Mhariri, Naibu Mhariri, Mwandishi wa Habari, Mpiga Picha, Mtangazaji na Fundi Mitambo wa Vyombo vya Habari;

“Mwenyekiti” maana yake ni Mjumbe yejote aliyechaguliwa kuongoza shughuli za Baraza na inajumuisha Spika, Naibu Spika au Mwenyekiti anapokuwa anaongoza Kamati ya Baraza Zima;

“Mwenyekiti wa Kamati” maana yake ni Mjumbe yeote aliyechaguliwa kwa mujibu wa Kanuni hizi kuongoza Kamati yoyote ya Baraza na inajumuisha Makamu Mwenyekiti pale ambapo Mwenyekiti atakuwa hayupo;

“Naibu Waziri” maana yake ni Mjumbe wa Baraza aliyeteuliwa na Rais kushika wadhifa wa kazi ya Unaibu Waziri kwa mujibu wa Katiba;

“Rais” maana yake ni Rais wa Zanzibar na Mwenyekiti wa Baraza la Mapinduzi;

“Serikali” maana yake ni Serikali ya Mapinduzi ya Zanzibar;

“Siwa” maana yake ni alama maalumu inayotumika kama kielelezo cha mamlaka ya Spika ndani ya Baraza;

“Spika” maana yake ni Spika wa Baraza, Naibu Spika au Mwenyekiti anapokuwa anakalia kitu cha Spika katika kikao chochote cha Baraza au anapotekeleza shughuli yoyote ambayo ni kazi ya Spika na atakuwa na madaraka na mamlaka yote ambayo amekabidhiwa Spika kwa mujibu wa Katiba, sheria na Kanuni hizi;

“Taarifa Rasmi” maana yake ni taarifa ya mazungumzo, majadiliano ya Baraza au kumbukumbu rasmi ya upigaji kura ndani ya Baraza ambayo imetayarishwa kwa mujibu wa kanuni ya 163 ya Kanuni hizi;

“Taarifa ya Serikali” maana yake ni taarifa inayowasilishwa katika Baraza na Kiongozi wa Shughuli za Serikali katika ya Baraza au Waziri kuhusiana na jambo lolote ambalo lilichunguzwa na Serikali, mtu au taasisi yoyote kwa maelekezo ya Serikali au jambo lolote ambalo Serikali ililijadili na kulitolea maamuzi au maelekezo au jambo jengine lolote ambalo Serikali inahisi kuwa ni muhimu kwa Wajumbe kupata taarifa na kulijadili kwa niaba ya Wananchi;

“Viongozi wa Baraza” inajumuisha Spika, Naibu Spika, Mwenyekiti, Kiongozi wa Shughuli za Serikali katika Baraza, Mnadhimu wa Serikali, Wanadhimu wa Vyama ndani ya Baraza, Wenyeviti wa Kamati na Makamu Wenyeviti wa Kamati;

“Waziri” maana yake ni Mjumbe wa Baraza la Wawakilishi na Mjumbe wa Baraza la Mapinduzi aliyekabidhiwa wadhifa wa kazi ya Uwaziri katika Serikali ya Mapinduzi ya Zanzibar au Mwanasheria Mkuu na inajumuisha Kiongozi wa Shughuli za Serikali katika Baraza.

### **SEHEMU YA PILI VIONGOZI WA BARAZA**

Spika na  
upatikanaji  
wake

**4.-**(1) Kutakuwa na Spika ambaye atachaguliwa na kushika madaraka yake kwa mujibu wa masharti ya Katiba na Kanuni hizi.

(2) Spika atachaguliwa kutoka mionganini mwa Wajumbe au mtu mwenye sifa za kuchaguliwa kuwa Mjumbe kwa utaratibu ufuatao:

- (a) mara baada ya kumalizika kutangazwa kwa matokeo ya uchaguzi mkuu wa Zanzibar, Katibu atatoa taarifa ya maandishi kwa Mwenyekiti wa Tume ya Uchaguzi ya Zanzibar kuwa kutafanyika uchaguzi wa Spika katika Mkutano wa Kwanza wa Baraza jipya na kwamba kila chama cha siasa chenye usajili wa kudumu kinaweza kushiriki katika uchaguzi huo kwa kuwasilisha jina la Mgombea wake kwa Tume ya Uchaguzi ya Zanzibar;
- (b) Tume ya Uchaguzi ya Zanzibar itakaporidhika kwamba Mgombea aliyependekezwa na chama cha siasa kugombea kitu cha Spika ametimiza sifa za kuwa Mjumbe, italiwasilisha jina la Mgombea kwa Katibu;

- (c) Katibu ataandaa na kutoa fomu za uteuzi ambazo zitajazwa na watu walioridhiwa na Tume ya Uchaguzi ya Zanzibar kuwa wanafaa kugombea nafasi ya Spika na baadae zitarudishwa kwake angalau saa ishirini na nne kabla ya muda uliopangwa Baraza kukutana kumchagua Spika, isipokuwa kwamba, kila fomu ni lazima iungwe mkono na angalau Wajumbe watano au watu watano ambaio sio Wajumbe wa Baraza lakini wana sifa za kugombea Ujumbe wa Baraza kwa kuweka saini zao katika fomu hizo;
- (d) kila Mgombea wa nafasi ya Uspika atapewa nafasi ya kujieleza kwa muda usiozidi dakika tano mbele ya Wajumbe ndani ya Baraza kabla ya kupigiwa kura na Wajumbe wanaweza kumuuliza Mgombea huyo maswali yasiozidi matatu;
- (e) kila Mjumbe atakuwa na haki ya kupiga kura ya siri kwa utaratibu utakaoelezwa na Katibu wakati wa kupiga kura kwa mujibu wa kanuni hii;
- (f) kabla ya Kikao cha Baraza cha uchaguzi kuanza kazi ya uchaguzi, Katibu ataandaa karatasi za kura zitakazononesha majina ya Wagombea wote walioteuliwa kwa mujibu wa aya ya (b) na (c) za fasili hii na atatoa karatasi moja tu ya kura kwa kila Mjumbe anayepiga kura, isipokuwa kwamba, Mjumbe ambaye kabla ya shughuli za uchaguzi kumalizika atakosea kujaza karatasi ya kura ataruhusiwa kumrudishia Katibu karatasi hiyo, ambaye ataifuta na kuiharibu mara moja na kumpa Mjumbe karatasi nyengine;
- (g) kabla ya shughuli za kupiga kura kuanza ndani ya Baraza, Mgombea ye yeyote anaweza kutoa taarifa ya maandishi kwa Katibu kwamba

- anajitoa kugombea na Katibu atalifuta jina la Mgombea huyo katika karatasi za kura kwa kadiri itakavyowezekana;
- (h) Katibu, baada ya kuridhika kwamba Wajumbe wote wanaotaka kupiga kura wamepiga kura, atazikusanya, atazihesabu na hatimae atatangaza matokeo, isipokuwa kwamba, kila Mgombea anaweza kushuhudia mwenyewe au kuweka wakala wake wakati wa kuhesabu kura;
  - (i) mtu atahesabika amechaguliwa kuwa Spika, kama atapata wingi wa kura za Wajumbe waliohudhuria na kupiga kura katika kikao cha uchaguzi wa Spika;
  - (j) endapo hakupatikana mshindi wa nafasi ya Spika kutokana na kufungana kwa kura, uchaguzi wa Spika utarudiwa mpaka apatikane mshindi;
  - (k) endapo jina moja ndilo limependekezwa kihalali, basi Wajumbe watalipigia kura jina hilo ya “Ndio” au “Hapana” na uamuzi utapatikana kwa wingi wa kura za “Ndio” au “Hapana”; na
  - (l) mara baada ya Katibu kumtangaza Mgombea aliyeshinda uchaguzi kwa mujibu wa kanuni hii, Katibu atamuapisha mtu aliyechanguliwa kuwa Spika chini ya utaratibu wa Kanuni hizi.
- 5.-**(1) Spika atakuwa ndiye Kiongozi wa Baraza, na ataliwakilisha Baraza katika vyombo na vikao vyengine vyote nje ya Baraza.
- (2) Bila ya kuathiri masharti ya kanuni hii, Spika atakuwa na mamlaka na uwezo ufuatao:

- (a) kuongoza kila Kikao cha Baraza na kuamua kwa mujibu wa masharti ya Kanuni hizi, mambo yanayoweza kuzungumzwa ndani ya Baraza;
- (b) kumtaka Naibu Spika au Mwenyekiti kuongoza shughuli za Baraza wakati wowote bila ya kutoa taarifa rasmi kwa Baraza;
- (c) kumzuia Mjumbe wakati wowote kutoa maelezo yake katika Kikao cha Baraza inapotokea haja ya kufanya hivyo;
- (d) kutangaza katika Baraza kuhusu kifo cha Mjumbe ye yeyote kinapotokea na atatoa taarifa ya kifo hicho kwa Mwenyekiti wa Tume ya Uchaguzi au Rais kwa kadiri itakavyokuwa, kuwa kiti cha Mjumbe aliyefariki kipo wazi;
- (e) kutoa maelekezo au utaratibu wa kufuatwa wakati wa vikao vya Baraza au Kamati kwa madhumuni ya utekelezaji bora wa shughuli za Baraza na Kamati; na
- (f) kutangaza Mjumbe ye yeyote kupoteza kiti chake endapo kutatokea moja kati ya mambo yaliyoelezwa katika kifungu cha 71(1) cha Katiba.

(3) Bila ya kuathiri masharti ya Katiba, sheria na Kanuni hizi, wakati wowote ambapo Spika, kuto kana na kutokuwepo nchini au maradhi au sababu nyengine yoyote, hataweza kutekeleza madaraka au majukumu ya kazi zake, madaraka na majukumu ya kazi zake yatakelezwa na Naibu Spika au Mwenyekiti.

**6.-(1)** Kutakuwa na Naibu Spika wa Baraza ambaye atachaguliwa na Wajumbe wa Baraza kutoka miiongoni mwao kwa kura ya siri na atatekeleza madaraka yake kufuatana na masharti ya Katiba na Kanuni hizi. Naibu Spika na upatikanaji wake.

(2) Uchaguzi wa Naibu Spika utafanywa wakati wowote katika Mkutano wa Kwanza baada ya kuvunjwa kwa Baraza au katika Mkutano wa Kwanza wa Baraza endapo kiti cha Naibu Spika kitakuwa wazi katika utaratibu ufuatao:

- (a) kila chama cha siasa chenye Wajumbe wake katika Baraza kinaweza kupendekeza jina la Mgombea wa kiti cha Naibu Spika kwa Katibu, ambalo litaandikwa katika fomu za uteuzi zitakazotolewa na Katibu na kuwasilishwa kwake angalau saa ishirini na nne kabla ya Kikao cha Baraza cha uchaguzi wa Naibu Spika;
- (b) kila jina linalopendekezwa kwa uchaguzi wa Naibu Spika litaungwa mkono na Wajumbe wasiopungua wawili kwa kutia saini zao katika fomu za uteuzi;
- (c) uchaguzi wa Naibu Spika, utafanywa kwa utaratibu unaotumika kumchagua Spika kwa mujibu wa aya za (d) mpaka (k) za fasili ya (2) ya kanuni ya 4 ya Kanuni hizi, isipokuwa kwamba, Mjumbe ye yote hatakuwa na haki ya kushiriki katika uchaguzi wa Naibu Spika, iwapo hajaapa Kiapo cha Uaminifu.

Wenyeviti  
na  
upatikanaji  
wao.

7.-(1) Kutakuwa na Wenyeviti wawili wa Baraza ambao watachaguliwa kwa kuzingatia uwiano wa jinsia kutoka mionganoni mwa Wajumbe kwa utaratibu unaotumika kumchagua Naibu Spika na ye yote kati yao anaweza kuongoza shughuli za Baraza atakapoagizwa na Spika.

(2) Bila ya kuathiri masharti ya fasili ya (1) ya kanuni hii, endapo itatokezea walioomba kuchaguliwa Wenyeviti ni Wajumbe wa jinsia moja, uchaguzi utafanyika kwa Wajumbe hao walioomba kuchaguliwa.

(3) Mwenyekiti wa Baraza atachaguliwa kwa kura ya siri wakati wowote katika Mkutano wa Kwanza wa Baraza jipya au wakati mwengine utakaowekwa na Baraza au mara baada ya kutokea nafasi kuwa wazi.

(4) Mwenyekiti wa Baraza atakuwa na mamlaka na atatekeleza kazi na majukumu ambayo atapewa kwa mujibu wa Kanuni hizi.

**8.-**(1) Kutakuwa na Kiongozi wa Shughuli za Serikali katika Baraza ambaye kwa mujibu wa Katiba atakuwa ni Makamu wa Pili wa Rais.

(2) Kiongozi wa Shughuli za Serikali katika Baraza, atakuwa ndiye Msemaji Mkuu wa Serikali ndani ya Baraza.

**9.** Kutakuwa na Mnadhimu wa Serikali atakayeteuliwa na Serikali ambae atamsaidia Kiongozi wa Shughuli za Serikali katika Baraza kuratibu Shughuli za Serikali ndani ya Baraza.

**10.-**(1) Kutakuwa na Mnadhimu wa Chama kwa kila chama cha siasa chenye viti visivyopungua kumi ndani ya Baraza ambae attachaguliwa na Wajumbe wa chama hicho.

(2) Kwa kuzingatia fasili ya (1) ya kanuni hii, Wajumbe wa vyama vya siasa wanaweza kuungana ili wafikie kiwango kinachohitajika.

**11.** Wajumbe watagawika katika pande mbili rasmi ambazo ni upande wa Serikali unaojumuisha Kiongozi wa Shughuli za Serikali katika Baraza, Mawaziri, Mwanasheria Mkuu na Naibu Mawaziri kwa upande mmoja na wasiokuwa hao kwa upande wa pili.

**12.-**(1) Kutakuwa na Katibu wa Baraza atakayeteuliwa na Rais kwa mujibu wa Katiba.

(2) Katibu atakuwa ndie Mtendaji Mkuu wa Afisi ya Baraza na hatoanza kazi na majukumu yake hadi baada ya kuapishwa na Rais.

(3) Kwa madhumuni ya utekelezaji bora wa shughuli za Baraza, Katibu wa Baraza:

- (a) anaweza kuhudhuria vikao vyote vya Baraza na Kamati zake;
- (b) atawajibika kuweka kumbukumbu zinazotakiwa kuwekwa kwa mujibu wa Kanuni hizi na kwa kufuata maagizo ya Spika;
- (c) atatayarisha taarifa rasmi kwa mujibu wa Kanuni hizi;
- (d) atatayarisha siku hadi siku Kitabu cha Shughuli za Baraza na kukihifadhi ofisini kwake kikiwa kinaonesha:
  - (i) maagizo yote yaliyotolewa na Baraza;
  - (ii) shughuli zote zilizopangwa kufanywa siku yoyote ya baadae; na
  - (iii) taarifa zote za masuala na hoja zilizokubaliwa na Spika.
- (e) anaweza kushughulikia makosa ya kiuchapaji na kilugha katika miswada inayopitishwa na Baraza na marekebisho ya Kanuni za Kudumu za Baraza la Wawakilishi.

(4) Katibu atawajibika kuhakikisha utunzaji mzuri wa kumbukumbu za Baraza, miswada na hati nyengine zilizowasilishwa katika Baraza na Mjumbe ye yeyote anaweza kukagua kumbukumbu na hati hizo wakati wowote unaofaa na watu wengine wanaweza kuzikagua kwa kufuata utaratibu utakaowekwa na Spika.

(5) Katibu atawajibika kutunza na kuweka Kitabu cha Maamuzi ambamo ataingiza mara kwa mara kumbukumbu za maamuzi ya Baraza na maamuzi ya Spika, kuhusu suala la utaratibu katika Baraza.

(6) Katibu atawajibika kuhakikisha kuwa ukumbi wa Mikutano na mazingira yake, huduma kwa Wajumbe na vifaa vyenginevyo vinavyohusika na shughuli za Baraza viko katika hali inayofaa kuliwezesha Baraza kutekeleza wajibu wake.

**13.-1)** Kutakuwa na Mkurugenzi wa Idara ya Ushauri wa Kisheria wa Baraza ambaye atateuliwa na Tume ya Utumishi wa Baraza. Mkurugenzi  
wa Idara ya  
Ushauri wa  
Kisheria.

(2) Mkurugenzi wa Idara ya Ushauri wa Kisheria wa Baraza atatoa ushauri kwa Spika, Wajumbe na Kamati za Baraza juu ya mambo yanayohusiana na Katiba, sheria na kanuni na bila ya kuathiri masharti ya fasili hii:

- (a) atafanya mapitio na kuhakikisha kwamba miswada yote inazingatia matakwa ya Katiba;
- (b) atawawezesha Wajumbe kuifahamu miswada ili waweze kuichangia katika Kamati na Baraza;
- (c) atafanya mapitio, kutoa ushauri na taarifa juu ya masuala yanayohusiana na Kanuni hizi au mambo mengine yanayohusu Kanuni yanayoweza kupelekwa na Baraza au Spika kwenye Kamati;
- (d) atapitia mikataba iliyordhiwa na Serikali kwa madhumuni ya kutoa ushauri kwa Baraza na au Kamati zake pale itakapohitajika;
- (e) atasaidia kutayarisha Miswada ya Wajumbe na Kamati pamoja na hoja za Wajumbe;
- (f) kwa kushirikiana na Afisi ya Mwanasheria Mkuu ataiwakilisha Afisi ya Baraza Mahakamani kuhusiana na mashauri yoyote ya kisheria; na
- (g) atatekeleza kazi zozote zitakazopelekwa kwake na Katibu zinazohusiana na masuala ya sheria.

(3) Mkurugenzi wa Idara ya Ushauri wa Kisheria wa Baraza atakuwa ni Mwanasheria mwenye uzoefu usiopungua miaka saba.

(4) Mkurugenzi wa Idara ya Ushauri wa Kisheria wa Baraza anaweza kusaidiwa majukumu yake yaliyoelezwa katika fasili ya (2) ya kanuni hii na Maafisa Sheria watakaoajiriwa na Afisi ya Baraza.

Mkuu wa  
Divisheni  
ya Kamati  
na  
majukumu  
yake.

**14.-**(1) Kutakuwa na Mkuu wa Divisheni ya Kamati ambaye atakuwa ni Mratibu wa Kamati.

(2) Mratibu wa Kamati atakuwa na jukumu la kusaidia kuratibu shughuli za Kamati pamoja na kusimamia kazi za Katibu Kamati kama zilivyoelezwa na Kanuni hizi.

Makatibu  
Wasaidizi  
na kazi zao.

**15.-**(1) Kutakuwa na Makatibu Wasaidizi ambao watateuliwa na Katibu kutoka mionganini mwa watumishi wa Baraza.

(2) Makatibu Wasaidizi watajulikana kuwa ni Makatibu Kamati watakapokuwa wanatekeleza kazi za Kamati na watajulikana kuwa ni Makatibu Mezani watakapokuwa wanatekeleza shughuli za mezani ndani ya ukumbi wa Baraza.

(3) Kazi za Katibu Kamati ni:

(a) kuratibu vikao vya Kamati;

(b) kuwapa taarifa Wajumbe wa Kamati kuhusu kuitishwa kwa vikao vya Kamati (siku, wakati na pahala) baada ya kuagizwa na Mwenyekiti wa Kamati;

(c) kuwaarifu Wajumbe wa Kamati kuhusu ajenda za vikao vya Kamati kwa mujibu wa maelekezo ya Spika au Mwenyekiti wa Kamati;

(d) kuchukua na kuandaa kumbukumbu za vikao vya Kamati;

- (e) kutunza nyaraka zinazowasilishwa kwenye Kamati;
- (f) kuishauri Kamati kuhusu taratibu na Kanuni za Kudumu za Baraza la Wawakilishi;
- (g) kuwashauri Wajumbe wa Kamati kitaalamu katika fani mbali mbali;
- (h) kuandaa rasimu ya ripoti ya Kamati kwa kushirikiana na Mwenyekiti wa Kamati itakayothibitishwa na Wajumbe wa Kamati; na
- (i) kutekeleza majukumu mengine yoyote atakayopangiwa na Spika, Mwenyekiti wa Kamati na Katibu.

(4) Katibu wa Kamati atawajibika kutunza siri za Kamati kama sheria na kanuni zinavyoelekeza.

(5) Kazi za Katibu Mezani ni:

- (a) kumshauri Spika kuhusu taratibu za kikatiba, sheria, Kanuni za Kudumu za Baraza la Wawakilishi na desturi za uendeshaji wa shughuli za Baraza;
- (b) kuandika muhutasari wa maamuzi na mwenendo wa kikao;
- (c) kumshauri Spika kuhusiana na kuchunga muda wakati wa mijadala na kikao kwa ujumla;
- (d) kusaidia kusimamia shughuli za uchaguzi ndani ya Baraza;
- (e) kuandika maamuzi ya Spika yanayotokana na miongozo mbali mbali inayoibuka kwenye vikao; na

Wapambe  
wa Baraza.

- (f) kufanya kazi nyengine yoyote kama itakavyoolekezwa na Spika au Katibu wakati wa vikao.

**16.** Kutakuwa na Wapambe wa Baraza ambao watatekeleza shughuli mbali mbali za Baraza, kufuatana na maagizo watakayopewa na Spika au na Katibu kwa kadri itakavyokuwa.

Majukumu  
na kazi za  
Wapambe  
wa Baraza.

**17.-**(1) Pamoja na kutekeleza shughuli mbali mbali kwa mujibu wa masharti ya Kanuni hizi, Wapambe wa Baraza:

- (a) watabeba siwa na kumsindikiza Spika wakati wa kuingia na kutoka katika Baraza kwa kuzingatia utaratibu uliokubaliwa na Spika;
- (b) watahakikisha utulivu na amani katika sehemu wanapokaa Wageni na watawadhibiti kwa utaratibu unaofaa wanapoingia na wanapotoka;
- (c) watasimamia masuala yote ya ulinzi na usalama wa ofisi na kumbi za Mikutano za Baraza ikiwa ni pamoja na mali na vifaa vya Baraza;
- (d) watahakikisha kwamba Wageni wote wanafuata masharti na utaratibu uliowekwa katika kanuni ya 146 ya Kanuni hizi;
- (e) watahakikisha kwamba Mjumbe, Mtumishi na Mgeni atafuata na kutekeleza masharti yote yaliyoelezwa katika kanuni za 147 na 159 za Kanuni hizi; na
- (f) watatekeleza jukumu na kazi nyengine yoyote kama watakavyoolekezwa na Spika au Katibu kwa mujibu wa sheria na kanuni.

(2) Kwa madhumuni ya utekelezaji bora wa majukumu yao wakati wa vikao vya Baraza, Wapambe wa Baraza wanaweza

kutoa maagizo wanayoona yanafaa kutolewa kwa Wahudumu wa Baraza na Wahudumu hao watawajibika kutekeleza maagizo hayo ipasavyo.

(3) Wapambe wa Baraza watawajibika kuratibu na kushauri juu ya usalama wa kumbi, majengo, vyumba vyote vya Baraza na sehemu zote za majengo yanayotumiwa na Baraza au Kamati zake.

(4) Wapambe wa Baraza watakuwa na uwezo wa kutoa maagizo kwa Askari Polisi au Askari mwengine ye yeyote anayetekeleza shughuli zake katika maeneo ya Baraza yanayotumiwa kwa ajili ya kutekeleza shughuli za Baraza kwa mujibu wa Katiba, sheria na Kanuni hizi.

### **SEHEMU YA TATU MIKUTANO NA VIKAO**

**18.** Bila ya kuathiri masharti ya Katiba, Mkutano wa Kwanza <sup>Mkutano</sup> wa Baraza jipya utaanza tarehe ambayo Baraza jipya limeitishwa <sup>wa</sup> <sup>Kwanza</sup>. na Rais kukutana.

**19.(1)** Shughuli za Mkutano wa Kwanza wa Baraza jipya <sup>Shughuli za</sup> <sup>Mkutano</sup> <sup>wa Kwanza.</sup> zitakuwa:

- (a) Uchaguzi wa Spika;
- (b) Spika kuapa Kiapo cha Uaminifu;
- (c) Wajumbe wote kuapishwa Kiapo cha Uaminifu;
- (d) Uchaguzi wa Naibu Spika;
- (e) Uchaguzi wa Wenyeviti, isipokuwa pale ambapo Spika ataamua vyenginevyo;
- (f) Ufunguzi rasmi wa Baraza jipya utakaofanywa na Rais;

- (g) Hoja kuhusu Baraza kutafakari na kujadili hotuba ya Rais; na
- (h) Kufanywa shughuli nyengine yoyote inayohusiana na kuliunda Baraza kwa ukamilifu.
- (2) Mwanzoni mwa Kikao cha Kwanza cha Mkutano wa Kwanza wa Baraza jipya, Katibu atasoma Tangazo la Rais la kuliita Baraza jipya na baadae atasoma Dua.
- (3) Mara tu baada ya Dua kusomwa, Baraza litaingia katika shughuli ya uchaguzi wa Spika kwa Katibu kugawa karatasi za kura kwa Wajumbe waliohudhuria, baadae uchaguzi wa Spika utafanyika kwa kuzingatia utaratibu uliowekwa na kanuni ya 4 ya Kanuni hizi.
- (4) Baada ya uchaguzi wa Spika kumalizika na matokeo kutangazwa, Katibu ataagiza mtu aliyechanguliwa kuwa Spika aitwe katika Baraza kwa ajili ya kuapishwa na kukalia kiti chake.
- (5) Mara baada ya mtu aliyechanguliwa kuwa Spika kufika ndani ya Baraza, Katibu atasoma maelezo yafuatayo:
- “Mheshimiwa (atataja jina la Spika Mteule) ninayo heshima kukuarifu kwamba Wajumbe wa Baraza hili tukufu, katika kutekeleza Katiba ya Zanzibar na katika kutumia haki na fursa walizopewa kwa mujibu wa Sheria, wamekuchagua wewe kuwa Spika wa Baraza hili. Kutokana na kuchaguliwa kwako huko, sasa nakuita wewe Mheshimiwa (atataja jina la Spika Mteule) uape Kiapo cha Uaminifu, kisha ukalie kiti cha Baraza hili ukiwa Spika”.*
- (6) Katibu atamuapisha Spika Mteule na baada ya kiapo, Spika huyo anaweza kutoa shukurani zake kwa Baraza.
- (7) Baada ya kukaa kwenye kiti, Spika atawaapisha Kiapo cha Uaminifu Wajumbe wote waliomo ndani ya Baraza.

(8) Baraza litamchagua Naibu Spika na Wenyeviti kwa mujibu wa utaratibu uliowekwa na Kanuni hizi.

**20.-**(1) Endapo Rais atatoa taarifa kwa Spika kwamba anakusudia kutoa hotuba ya ufunguzi wa Baraza, Spika atalitangazia Baraza ni wakati gani Rais atalihutubia Baraza. Rais kulihutubia Baraza.

(2) Wakati Rais atakapofika kulihutubia Baraza, Spika atamkaribisha Rais kwa kutoa hotuba fupi na baadae atamuomba alihutubie Baraza.

(3) Rais akimaliza kutoa hotuba yake ya ufunguzi, Spika atatoa neno la shukurani na kusimamisha kikao kwa muda ili amsindikize Rais na baadae kikao kitaendelea au kitaahirishwa hadi siku nyengine kwa kadri itavyokuwa.

(4) Endapo hoja ya kujadili hotuba ya Rais itatolewa chini ya aya ya (g) ya fasili (1) ya kanuni ya 19 au fasili (3) ya kanuni ya 29 kwa kadri itavyokuwa, Spika atatoa nafasi kwa Wajumbe kujadili hotuba hiyo kama atakavyoona inafaa, isipokuwa kwamba, hotuba ya Rais ya ufunguzi wa Baraza jipya haitajadiliwa mpaka katika Mkutano wa Baraza utakaofuata.

**21.-**(1) Mkutano wa Kwanza wa Baraza utafanywa sehemu yoyote katika Zanzibar kama itakavyoamuliwa na Rais. Pahala pa kufanya Mkutano.

(2) Bila ya kuathiri masharti ya Kanuni hii, Baraza linaweza kuweka tarehe ya kukutana, isipokuwa Mkutano wa Kwanza wa Baraza jipya utanza tarehe itakayoamuliwa na Rais.

(3) Endapo kwa manufaa ya taifa itahitajika kuwa Baraza lisikutane tarehe ilioamuliwa katika Mkutano unaofuata na badala yake likutane tarehe ya mbele au nyuma zaidi, Spika iwapo atapewa Hati iliyotiwa saini na Rais yenye kueleza hivyo itabidi Baraza likutane tarehe hiyo iliyotajwa katika Hati ya Rais.

(4) Endapo Baraza litatakiwa kukutana tarehe ya mbele zaidi kuliko ile iliyowekwa na Baraza lenyewe, tarehe hiyo mpya

haitakuwa mbele zaidi ya siku kumi na nne kutoka tarehe ile iliyowekwa na Baraza lenyewe.

(5) Bila ya kuathiri masharti yoyote ya Katiba, Spika anaweza wakati wowote kuliitisha Baraza kwa jambo la dharura baada ya kupata ombi la Mjumbe, na Spika akiridhika kwamba sababu zilizolezwa katika ombi hilo ni za msingi na inafaa Baraza kuitishwa.

Nyakati za vikao.

**22.-**(1) Kila kikao cha Baraza katika kila Mkutano kitaanza saa tatu kamili asubuhi hadi saa tisa kamili mchana ambapo shughuli yoyote inayoendelea itasimamishwa na Spika bila ya kuwahoji Wajumbe.

(2) Bila ya kujali masharti ya fasili (1) ya kanuni hii, Baraza linaweza kuamua vyenginevyo kuhusu muda wa kuanza na kuahirisha vikao vyake endapo hoja ya kufanya hivyo itatolewa na Kiongozi wa Shughuli za Serikali katika Baraza au Waziri ye yoyote bila ya taarifa ya awali na kuamuliwa na Wajumbe kama hoja nyengine yoyote.

(3) Endapo wakati wa kusimamisha shughuli, Baraza litakuwa katika Kamati ya Baraza Zima, Mwenyekiti atasimamisha shughuli za Kamati hiyo na Baraza litarudia.

(4) Wakati uliotajwa katika fasili ya (1) ya kanuni hii, utatumika katika siku zote za kazi isipokuwa siku ya Ijumaa ambapo kwa siku hiyo kikao kitaanza saa tatu kamili asubuhi hadi saa sita kamili mchana.

(5) Bila ya kujali masharti yaliyowekwa chini ya kanuni hii, Spika anaweza kuamua muda wa kuanza kikao kutokana na shughuli husika.

(6) Wakati wa kusimamisha shughuli za Baraza unapokaribia, Spika ataliarifu Baraza kwamba yuko karibu kuliahirisha Baraza ili hoja ya kuongeza muda, kama itahitajika, iweze kutolewa na kuamuliwa kwa mujibu wa fasili ya (2) ya

kanuni hii, isipokuwa kwamba muda utakaoongezwa hautazidi saa moja na nusu.

(7) Baada ya kusimamishwa shughuli chini ya masharti ya fasili ya (6) ya kanuni hii, hakuna shughuli nyengine yoyote itakayofanywa katika kikao hicho isipokuwa kufikiria hoja ya kuongeza muda ambayo imetolewa kwa mujibu wa masharti ya fasili ya (2) ya kanuni hii.

(8) Endapo majadiliano yoyote katika Baraza au Kamati ya Baraza Zima yatasimamishwa na Spika kwa mujibu wa masharti ya kanuni hii, wakati yatakaporudiwa katika Baraza au katika Kamati ya Baraza Zima yataendelezwa kuanzia pale yaliposimamishwa kama kwamba mjadala uliendelea, na Mjumbe yeyote ambaye mchango wake ulikatishwa na Spika atapewa nafasi tena ya kuendelea kuchangia isipokuwa kama ataaeleza mwenyewe kuwa amemaliza kutoa mchango wake.

**23.-**(1) Spika atakahirisha Kikao cha Baraza bila ya kuwahoji Wajumbe, endapo shughuli zilizopangwa kwa kikao husika zimemalizika kabla ya kufikia muda wa kawaida wa kuahirisha Kikao cha Baraza. Kuahirisha  
kikao.

(2) Ikiwa kutatokea dharura yoyote au kama atakavyoona inafaa kwa mujibu wa mazingira yalivyo, Spika anaweza kusimamisha shughuli za Baraza kwa muda atakaona unafaa bila ya kuwahoji Wajumbe.

(3) Spika anaweza kusitisha kikao cha Baraza bila ya kuwahoji Wajumbe endapo muda uliobakia hautoshelezi kukamilisha shughuli iliyopangwa kwenye Orodha ya Shughuli za Baraza.

(4) Bila ya kuathiri masharti ya fasili ya (8) ya kanuni ya 61 ya Kanuni hizi, hoja ya kuahirisha Baraza kwa mujibu wa kanuni hii au hoja ya kuahirisha shughuli kwa mujibu wa kanuni ya 27 ya Kanuni hizi, inaweza kutumiwa kama fursa ya kuanzisha mjadala juu ya jambo lolote la dharura kwa idhini ya Spika.

Kuahirisha  
Mkutano.

**24.-**(1) Kila Mkutano wa Baraza utafungwa kwa kulahirisha Baraza hadi Mkutano unaofuata na hoja ya kuahirisha Mkutano wa Baraza itatolewa mbele ya Baraza na Kiongozi wa Shughuli za Serikali katika Baraza na ikiwa hayupo hoja hiyo itatolewa na Waziri anayeshughulikia masuala ya Baraza au Waziri mwengine atakayependekezwa na Kiongozi wa Shughuli za Serikali katika Baraza.

(2) Endapo shughuli zilizopangwa kwa ajili ya Mkutano husika zimeshamalizika, hoja ya kuahirisha Baraza itakuwa ni kuahirisha Baraza hadi Mkutano utakaofuata.

(3) Bila ya kuathiri masharti mengine katika Kanuni hizi, shughuli yoyote ambayo itabakia bila ya kufanya wakati Baraza litakapoahirishwa ili kufungwa Mkutano, itaahirishwa hadi kwenye Mkutano utakaofuata.

Lugha ya  
Baraza.

**25.** Majadiliano, nyaraka na shughuli za Baraza zitaendeshwa kwa lugha ya Kiswahili na ikihitajika kwa lugha ya Kiingereza.

Wimbo  
wa Taifa na  
kusomwa  
Dua.

## **SEHEMU YA NNE UTARATIBU WA SHUGHULI ZA BARAZA**

**26.-**(1) Wimbo wa Taifa wa Zanzibar utapigwa na kuimbwa katika kila Kikao cha Kwanza na cha Mwisho katika Mikutano yote ya Baraza kufuatana na utaratibu utakaowekwa na Baraza.

(2) Kabla ya kuanza kikao cha Mkutano wowote wa Baraza, Dua iliyowekwa na Baraza itasomwa na Spika au Katibu kadri itakavyokuwa kama ifuatavyo:

Dua ya kuionbea Serikali ya Mapinduzi ya Zanzibar na Baraza la Wawakilishi.

*“Tunakuomba Mwenyezi Mungu, Mwingi wa Rehema, Bwana wa Viumbe vyote, uiweke nchi yetu ya Zanzibar, ikiwa ni mionganini mwa nchi mbili zilizounda Jamhuri ya Muungano wa Tanzania,*

*chini ya himaya ya ulinzi wako, uibariki Zanzibar iwe nchi ya amani na wote wanaoishi humo wawe na upendo na umoja. Umjaalie Rais wa Zanzibar na Mwenyekiti wa Baraza la Mapinduzi afya njema na maisha marefu, umpe hekima na busara, ili akisaidiana na Viongozi wenzake, aweze kuongoza kwa haki na amani kwa manufaa ya Zanzibar na Jamhuri ya Muungano wa Tanzania.*

*Tunakuomba, utupe hekima na busara, sisi Wajumbe wa Baraza la Wawakilishi la Zanzibar; utuepusha na tamaa mbaya, chuki na ubinafsi na utuongoze daima katika kujadili mambo yote yatakayoletwa mbele yetu ili tuweze kushinda matatizo yetu kwa manufaa ya nchi hii na watu wake.*

*Amin”.*

(3) Baraza linaweza kuifanyia marekebisho Dua kama litakavyoona inafaa.

**27.-**(1) Shughuli yoyote ya kikao cha Baraza itaingizwa katika Orodha ya Shughuli za Baraza na itapangwa kwa kufuata <sup>Utaratibu</sup> <sub>wa</sub> <sub>Shughuli</sub> <sub>za Baraza.</sub> ufuatao:

- (a) Kuwaapisha Wajumbe wapya Kiapo cha Uaminifu;
- (b) Taarifa ya Rais;
- (c) Taarifa ya Spika;
- (d) Hati za kuwasilisha mezani;
- (e) Maswali ambayo taarifa zake zimetolewa;
- (f) Kuwasilisha maombi;
- (g) Hoja ya kuahirisha shughuli ili kujadili jambo muhimu la dharur;
- (h) Kauli ya Serikali;
- (i) Taarifa ya Serikali;

- (j) Maelezo binafsi ya Mjumbe;
- (k) Mambo yanayohusu Haki, Fursa na Kinga za Wajumbe au Uwezo wa Baraza;
- (l) Hoja ya Serikali;
- (m) Hoja ya Kamati; na
- (n) Hoja ya Mjumbe kwa mujibu wa fasili ya (3) ya kanuni hii.

(2) Wakati wa kuanza kwa kikao cha Mkutano wowote wa Baraza, baada ya Dua kusomwa na Spika kukalia kiti chake, endapo Spika amepata taarifa kuwa Rais anakusudia kulihutubia Baraza siku hiyo, Spika atalitangazia Baraza wakati ambao Rais atafanya hivyo.

(3) Bila ya kuathiri masharti ya kanuni hii, kutakuwa na siku moja kwa ajili ya kushughulikia hoja za Wajumbe katika Mkutano wa kawaida wa Baraza na siku tatu katika Mkutano wa Bajeti ya mwaka ya Serikali.

(4) Shughuli za Baraza katika kila kikao zitatekelezwa kwa kufuata Orodha ya Shughuli za Baraza au kwa kufuata utaratibu mwengine ambao Spika ataagiza ufuatwe kwa ajili ya uendeshaji bora wa shughuli za Baraza.

(5) Serikali au Mjumbe ye yote anaweza kuomba shughuli ziwekwe katika Orodha ya Shughuli za Baraza kwa mpangilio ambao Serikali au Mjumbe ataupendekeza.

**28.-**(1) Kila Mjumbe Mteule ataapa Kiapo cha Uaminifu Uaminifu. Kilichowekwa na sheria pamoja na Kanuni hizi, isipokuwa kwamba Mjumbe huyo anaweza kushiriki katika uchaguzi wa Spika kabla ya kuapa.

(2) Mtu ye yote ambaye si Mjumbe atakayechaguliwa kuwa Spika atatakiwa kabla ya kuanza kutekeleza madaraka yake kuapishwa katika Baraza Kiapo cha Uaminifu.

(3) Bila ya kuathiri masharti ya fasili ya (4) ya kanuni hii, maneno yafuatayo ndiyo yatakuwa Kiapo cha Uaminifu:

- (a) *Spika ataapa: "Mimi (Mtua atataja jina lake), naapa kwamba nitakuwa mwaminifu kwa Zanzibar katika kazi zangu za Uspika na nitaitumikia kwa moyo wangu wote na kwamba nitazihifadhi, nitazilinda na kuzitetea kwa dhati Katiba ya Zanzibar na Katiba ya Jamhuri ya Muungano wa Tanzania. Nakuomba Mwenyezi Mungu unisaidie";*
- (b) *Mjumbe ataapa; "Mimi (Mtua atataja jina lake), naapa kwamba nitakuwa mwaminifu kwa Zanzibar katika kazi zangu za Uwakilishi na nitaitumikia kwa moyo wangu wote na kwamba nitaihifadhi, nitailinda na kuitetea kwa dhati Katiba ya Zanzibar. Nakuomba Mwenyezi Mungu unisaidie".*

(4) Endapo Mjumbe yeote haamini kuwa kuna Mungu anaweza kuapa Kiapo cha Uaminifu kwa kuacha maneno "Nakuomba Mwenyezi Mungu unisaidie".

**29.-**(1) Taarifa ya Rais itasomwa na Spika mbele ya Baraza.

Taarifa  
ya Rais.

(2) Kila inapohitajika, taarifa ya Rais kulihutubia Baraza itasomwa mbele ya Baraza kwa mujibu wa kanuni ya 27 ya Kanuni hizi, lakini Spika anaweza wakati wowote kusimamisha shughuli za Baraza kwa madhumuni ya kutoa taarifa hiyo.

(3) Endapo hoja itatolewa, hotuba ya Rais inaweza kujadiliwa katika utaratibu ulioelezwa kwenye fasili ya (4) ya kanuni ya 20 ya Kanuni hizi.

**30.-**(1) Mjumbe yeote anaweza kuwasilisha katika Baraza maombi yoyote juu ya jambo lolote kwa niaba ya watu wanaofanya ombi hilo, isipokuwa kwamba ombi linalowasilishwa halitomuhusu yeeye binafsi.

Kuwasilisha  
maombi.

(2) Kila ombi litatolewa taarifa kwa kuwasilisha nakala yake kwa Katibu siku mbili kabla ya siku ya kuwasilishwa katika Baraza likionesa jina la Mjumbe na saini yake, madai ya msingi yaliyomo, madhumuni ya ombi hilo na kuambatanisha orodha ya majina ya watu wanaotoa ombi hilo na saini zao.

(3) Bila ya kuathiri masharti ya kanuni hii, Spika anaweza kuweka muongozo maalumu wa namna ambayo wananchi kuitia mwakilishi wao watakavyowasilisha maombi yao katika Baraza kwa njia za kielektroniki.

Baraza  
kushughu-  
likia  
maombi

**31.(1)** Baada ya kutimiza masharti ya kanuni ya 30 ya Kanuni hizi, Mjumbe anayewasilisha ombi hilo anaweza kutoa hoja kwamba Baraza lilijadili ombi hilo, isipokuwa kwamba hoja haitohitaji kutolewa taarifa na inaweza kuamuliwa bila ya mjadala wowote.

(2) Spika anaweza kuelekeza kwamba, ombi lililowasilishwa kwa mujibu wa fasili ya (1) ya kanuni hii, lipelekwe kwa Waziri anayehusika na Waziri huyo awasilishe taarifa ndani ya siku tisini au muda mwengine atakaoutaja.

Hati za  
kuwasili-  
shwa  
Mezani.

**32.-(1)** Kadri zitakavyotokezea kuwepo, hati zote ambazo zinakusudiwa kutumika ndani ya Baraza kwa ajili ya hoja au majadiliano ya hoja zitawasilishwa mezani na Waziri, Naibu Waziri, Mwenyekiti wa Kamati au Mjumbe ye yeyote katika kikao ambacho hati hiyo inakusudiwa kutumika au itatumika kwa kuzingatia utaratibu uliowekwa katika kanuni ya 27 ya Kanuni hizi, na bila ya kutolewa taarifa ya awali.

(2) Nakala za matoleo yote ya Gazeti, pamoja na nyongeza zake zenye sheria ndogo ndogo zote zilizotungwa kwa mujibu wa sheria yoyote na ambazo zimechapishwa kuanzia kikao cha mwisho cha Mkutano wa Baraza uliopita zitawasilishwa mezani na Waziri katika kikao cha kwanza cha kila Mkutano wa Baraza.

(3) Mjumbe anayehitaji atapatiwa na Katibu fursa ya kuona, kusoma, kunukuu sehemu au kupata nakala ya Gazeti iliyowasilishwa mezani.

(4) Kadri zitakavyotokeza kuwepo, Mwenyekiti wa Kamati atawapatia Spika, Katibu na Waziri anayehusika nakala za hotuba yake kabla ya kuiwasilisha rasmi katika Baraza.

(5) Kwa mujibu wa kanuni hii, neno “Hati” linajumuisha hati rasmi zote zinazotakiwa na Katiba, sheria au Kanuni hizi kuwasilishwa katika Baraza ikiwa ni pamoja na maelezo yoyote ambayo yapo katika maandishi na yanakusudiwa kuwasilishwa katika Baraza na Waziri au Mjumbe mwengine yejote.

**33.-**(1) Wakati wowote baada ya hati yoyote kuwasilishwa kwa mujibu wa kanuni ya 32 ya Kanuni hizi, Waziri au Mjumbe aliywasilisha hati hiyo au Mjumbe mwengine yejote anaweza kuomba kutoa hoja kwamba Baraza lijadili hati hiyo.

(2) Mjadala unaweza kugusia kila jambo lililomo katika hati.

(3) Waziri au Mjumbe yejote ambaye anaruhusika kulihiutubia Baraza kwa mujibu wa Kanuni hizi, ikiwa hakuiwasilisha hati yake kabla, Spika atamzuia Waziri au Mjumbe huyo asisome hati hiyo.

**34.-**(1) Waziri anaweza kuulizwa swali kuhusu jambo lolote la Swali. umma au jambo jengine linalosimamiwa na Wizara au Afisi yake.

(2) Mjumbe yejote anaweza kuulizwa swali kuhusu jambo lolote ambalo ameteuliwa na Baraza kulishughulikia.

(3) Madhumuni ya swali lolote litakaloulizwa yatakuwa ni kutaka kupatiwa taarifa kuhusu jambo mahususi ambalo Waziri au Mjumbe anayehusika anawajibika au kusisitiza utekelezaji wa jambo hilo.

**35.-**(1) Isipokuwa kwa ruhusa ya Spika, taarifa ya swali itatolewa kwa maandishi na itapelekwa kwa Katibu si chini ya siku ishirini na moja kabla ya tarehe ambayo swali hilo litaulizwa katika Baraza.

(2) Taarifa zote za maswali zitakazoruhusiwa na Spika zitaingizwa katika Kitabu cha Shughuli za Baraza. Endapo Mkutano wa Baraza utafungwa kabla ya siku ambayo swalii limepangwa kujibiwa, swalii hilo litajibiwa katika Mkutano unaofuata endapo yule aliyetoa taarifa ya swalii atakuwa bado ni Mjumbe.

(3) Mjumbe anayetaka swalii lake lijibiwe kwa maandishi, atatoa taarifa inayoonesha azma hiyo na swalii hilo litapelekwa kwa Waziri au Mjumbe aliyeulizwa na halitaingizwa kwenye Orodha ya Shughuli za Baraza za kila siku.

(4) Waziri au Mjumbe aliyeulizwa swalii kwa mujibu wa fasili ya (3) ya kanuni hii, atamjibu kwa maandishi Mjumbe aliyeuliza swalii moja kwa moja na kupeleka nakala yake kwa Katibu, au atamjibu kupitia Afisi ya Baraza ambapo kwa kadri itakavyokuwa, Katibu ataliingiza jibu hilo kwenye Taarifa Rasmi na atatoa nakala ya jawabu ya swalii hilo na kumpa Mjumbe mwenyewe na kwa maelekezo ya Spika atakapoona inafaa, majibu hayo atampa kila Mjumbe.

(5) Maswali yote katika Mkutano mmoja yatapewa nambari zinazofuatana kwa mpangilio na kila swalii litaingizwa katika Kitabu cha Shughuli za Baraza pamoja na nambari yake.

Masharti  
ya kuuliza  
swali.

**36.** Swalii linaweza kuulizwa kwa kuzingatia masharti yafuatayo:

- (a) halitamtaja mtu yejote kwa jina au maelezo yoyote mahususi, isipokuwa kulifanya swalii hilo lieleweke;
- (b) endapo lina maelezo yoyote mahususi, Mjumbe anayeuliza swalii hilo atawajibika kuhakikisha kuwa maelezo hayo ni sahihi, lakini hatanukuu dondoo kutoka katika hotuba, vitabu au magazeti;

- (c) lisiwe sababu ya kufanya mjadala na Mjumbe hatalihutubia Baraza kuhusu jambo analoliuzia;
- (d) lisiwe kubwa na lisiwe na maelezo ya dhihaka, masingizio au sifa zisizolazimu; na
- (e) lisiulizwe kwa njia inayoonesha jibu lake au kutambulisha mkondo fulani wa maoni.

**37.-**(1) Waziri au Mjumbe ye yeyote anayeulizwa swali ambalo ana madaraka nalo atawajibika kulijibu swali hilo kwa ukamilifu, kwa usahihi na kwa ufupi, isipokuwa kwamba, swali aliloulizwa Waziri au Mjumbe mmoja linaweza kujibiwa na Waziri au Mjumbe mwengine.

Wajibu na  
mipaka ya  
kujibu  
swali.

(2) Endapo Spika ataona kwamba Waziri au Mjumbe aliyeulizwa swali kwa kuzingatia masharti ya fasili ya (1) ya kanuni hii hakujibu swali aliloulizwa, anaweza kumtaka Waziri au Mjumbe huyo arudie kujibu swali hilo.

(3) Swali linalohusu jambo lolote kati ya yafuatayo halitaulizwa au kujibiwa katika Baraza, kama:

- (a) linakiuka kanuni yoyote ya Kanuni hizi;
- (b) linaanzisha upya jambo ambalo limekwisha kuamuliwa na Baraza au limejibiwa kwa ukamilifu na kwa usahihi katika Mkutano unaoendelea au katika Mikutano miwili iliyopita;
- (c) linahusu shughuli za Kamati za Baraza ambazo hazijawasilishwa katika Baraza kwa taarifa ya Kamati au ambazo Spika hajaarifiwa kuwa Kamati imemaliza kuzishughulikia;
- (d) linahusu mambo ambayo yamepelekwa kwenye Kamati kwa uchunguzi;
- (e) linahusu tabia ya mwenendo wa mtu ye yeyote ila tu

kama ni kuhusu mtu huyo katika kutekeleza wajibu wake kama Mtumishi wa umma;

- (f) linashutumu tabia au mwenendo wa mtu yeoyote ambaye mwenendo wake unaweza tu kujadiliwa kwa hoja maalumu itayotolewa kwa ajili hiyo;
- (g) linahitaji habari ambazo zinapatikana katika hati ambazo Mjumbe anaweza kujisomea ikijumuisha nakala za sheria au maandishi ya kumbukumbu za kawaida;
- (h) linatazamia mjadala juu ya jambo lililokwisha kuwekwa kwenye Orodha ya Shughuli za Baraza; na
- (i) linahusu jambo lolote ambalo wakati huo liko mbele ya Mahakama.

Kukataliwa  
kwa swali.

**38.-**(1) Endapo swali linakataliwa na Spika kwa sababu ya kutotimiza lolote kati ya masharti ya Kanuni hizi, Katibu atalirudisha swali hilo kwa Mjumbe anayependekeza kuliuliza pamoja na maelezo ya sababu za kukataliwa huko.

(2) Swali lililokataliwa chini ya fasili ya (1) ya kanuni hii, linaweza kukubaliwa tena kwa kibali cha Spika baada ya kufanyiwa marekebisho yanayostahiki.

Utaratibu  
wa  
kuuliza na  
kujibu  
swali.

**39.-**(1) Wakati ambapo swali limeingizwa katika Orodha ya Shughuli za Baraza, Mjumbe aliyeuliza swali atapatiwa majibu ya swali lake na swali hilo litakapofikiwa, Spika atamuita Mjumbe huyo kwa ajili ya kuliuliza.

(2) Endapo Mjumbe aliyeuliza swali hilo hayupo, Mjumbe mwengine anaweza kuuliza kwa niaba yake na atatoa taarifa kwa Spika au Katibu mapema iwezekanavyo kabla ya kufikiwa swali hilo na atakapoitwa kwa jina Mjumbe aliyeuliza swali, Mjumbe atakayeuliza swali hilo kwa niaba atasimama na kuuliza kwa niaba.

(3) Swali lolote halitaulizwa katika Baraza baada ya kupita muda wa saa moja na nusu tokea Baraza lilipoanza shughuli ya maswali, na kama swali halikufikiwa, litajibiwa katika kikao chengine.

(4) Endapo swali lililoordheshwa katika Orodha ya Shughuli za Baraza halikufikiwa hadi wakati wa kipindi cha maswali kumalizika, Spika anaweza kuongeza muda ikiwa kujibiwa kwa swali hilo kuna umuhimu na manufaa kwa taifa, isipokuwa muda utakaoongezwa hautazidi dakika kumi na tano.

(5) Mjumbe anayeuliza swali anaweza kuliondoa swali lake wakati wowote kabla halijajibiwa, ama kwa kumpa taarifa Katibu kwa maandishi siku moja kabla ya kikao au kwa kusimama wakati jina lake linapoitwa na kusema kuwa analiondoa swali lake.

**40.-**(1) Maswali ya nyongeza yanaweza kuulizwa na Mjumbe Maswali ya nyongeza. yeyote kwa madhumuni ya kutaka kuelezw zaidi juu ya jambo lolote lililotajwa katika jibu lililotolewa.

(2) Isipokuwa kama Spika ataelekeza vyenginevyo, hakutaruhusiwa kuulizwa zaidi ya maswali matatu ya nyongeza kwa kila swali moja la msingi.

(3) Mjumbe anaruhusiwa kuuliza swali moja tu la nyongeza kwa kila swali la msingi lakini anaweza kuliweka swali lake hilo kwenye sehemu zisizozidi mbili.

(4) Endapo Waziri atatoo ahadi ya kujibu swali la nyongeza kwa maandishi, jibu la swali hilo litawasilishwa kwa Spika ndani ya siku tatu tokea siku lilipoulizwa na litasomwa kama Taarifa ya Spika katika Baraza, isipokuwa kama hakutakuwa na kikao chengine cha Baraza, taarifa hiyo itatolewa katika Mkutano unaofuata.

(5) Endapo Waziri atashindwa kuwasilisha majibu ndani ya muda ulioelezwa chini ya fasili ya (4) ya kanuni hii, ataomba kwa Spika muda wa ziada usiozidi siku tatu.

(6) Baada ya Waziri husika kushindwa kujibu swali hilo kama ilivyoelezwa na fasili ya (5) ya kanuni hii, Afisi ya Baraza itatoa taarifa hiyo kwa Mkuu wa Shughuli za Serikali katika Baraza kwa hatua zake.

(7) Endapo masharti ya fasili ya (6) ya kanuni hii, hayakutekelezwa ndani ya siku tano za kazi, Spika atatoa taarifa ndani ya Baraza.

Masharti ya  
maswali ya  
nyongeza.

**41.** Spika hataruhusu swali la nyongeza ambalo halihusiani na swali la msingi au linakiuka masharti yaliyoainishwa katika Kanuni hizi.

Hoja ya  
kujadili  
jambo la  
dharura.

**42.-**(1) Mjumbe yejote anaweza kutoa hoja kuwa Baraza liahirishe shughuli zake zilizooneshwa katika Orodha ya Shughuli za Baraza na lijadili jambo la dharura na muhimu kwa umma kwa ruhusa ya Spika.

(2) Hoja ya namna hiyo itakuwa ni maalumu na inaweza kutolewa wakati wowote hata kama majadiliano yatakuwa yanaendelea.

(3) Hoja itatolewa na Mjumbe kwa kusimama mahali alipo na kuomba idhini ya Spika kutoa hoja ya kuahirisha shughuli za Baraza kwa madhumuni ya kujadili jambo la dharura na muhimu kwa umma.

(4) Kadri inavyowezekana, kabla ya kikao kuanza Mjumbe atakuwa amewasilisha kwa Spika, kwa maandishi au kwa kusema maelezo ya jambo analopenda lijadiliwe.

(5) Endapo Spika atalionya jambo hilo ni la dharura na la muhimu kwa umma, ataruhusu hoja hiyo itolewe na mjadala juu ya hoja hiyo utaendelea kwa muda usiozidi saa moja.

(6) Hoja ya dharura haitaruhusiwa iwapo inahusu jambo ambalo taarifa ya hoja imekwishatolewa au limekwisha kuwekwa katika Orodha ya Shughuli za Baraza.

(7) Hakutaruhusiwa hoja ya dharura zaidi ya moja katika kikao kimoja zenyenye kutaka kuahirisha shughuli za Baraza kwa kutumia kanuni hii.

(8) Jambo ambalo litajadiliwa kutokana na hoja ya kuahirisha shughuli za Baraza iliyotolewa kwa mujibu wa kanuni hii, halitaletwa tena katika Baraza ndani ya Mkuu huo.

**43.-**(1) Jambo linalotolewa kwa hoja chini ya kanuni ya 42 ya Kanuni hizi, litahesabiwa kuwa ni jambo la dharura iwapo: Masharti ya jambo la dharura.

- (a) ni jambo mahususi;
- (b) halikuwekwa katika lugha ya jumla au haligusii mambo tofauti;
- (c) halikusudii kujadili habari zisizo za uhakika au habari ambazo ukweli wake hauwezi kupatikana;
- (d) linahitaji mazingatio ya haraka kiasi kwamba haliwezi kusubiri kushughulikiwa katika njia ya kawaida katika siku za baadae; na
- (e) limetokea siku za karibuni na limeletwa bila ya kuchelewa.

(2) Kwa madhumuni ya fasili ya (1) ya kanuni ya 43 ya Kanuni hii, jambo lolote litahesabiwa ni muhimu kwa umma iwapo litagusia maslahi ya nchi au wananchi wake na utatuza wake utategemea hatua zaidi kuliko zile za utekelezaji wa kiutawala peke yake.

**44.-**(1) Kauli ya Serikali inaweza kutolewa na Kiongozi wa Shughuli za Serikali katika Baraza au Waziri na itazungumzia: Kauli ya Serikali.

- (a) Sheria za Muungano zitakazopelekwa mbele ya Baraza kwa mujibu wa kifungu cha 132 cha Katiba;

- (b) Ripoti ya Mdhhibit na Mkaguzi Mkuu wa Hesabu za Serikali itakayowasilishwa ndani ya Baraza chini ya kifungu cha 112 cha Katiba;
- (c) Majanga au matukio ambayo yataleta athari kwa jamii; au
- (d) Jambo jengine lolote ambalo Serikali inawajibika nalo.

(2) Kauli za aina hiyo zinaweza kutolewa kwa idhini ya Spika, katika wakati unaofaa kufuatana na mpangilio wa shughuli ambaao umewekwa chini ya kanuni ya 27 ya Kanuni hizi.

(3) Mwenyekiti wa Kamati inayohusika au Mjumbe mwengine aliyeidhinishwa na Kamati hiyo anaweza kupewa nafasi ya kutoa maoni ya Kamati juu ya kauli hiyo.

(4) Hakutokuwepo na majadiliano yoyote wala Wajumbe hawatohojiva kuhusu kauli yoyote iliyotolewa kwa mujibu wa kanuni hii, lakini Wajumbe wanaweza, kwa idhini ya Spika kumuuliza maswali yasiyozidi matatu Kiongozi wa Shughuli za Serikali katika Baraza au Waziri aliyetoa kauli hiyo, kwa madhumuni ya kueleweshwa zaidi juu ya maelezo ya kauli hiyo.

Taarifa ya Serikali.

**45.-**(1) Kiongozi wa Shughuli za Serikali katika Baraza au Waziri anaweza kuwasilisha taarifa ya Serikali katika Baraza kuhusiana na jambo ambalo Serikali inahitaji kulitaarifu Baraza.

- (2) Taarifa ya Serikali inaweza kuzungumzia:
  - (a) taarifa ambayo sheria husika imeelekeza;
  - (b) taarifa ya jambo lolote ambalo lilichunguzwa;
  - (c) taarifa kuhusiana na utekelezaji wa Serikali juu ya:

- (i) Maazimio ya Hoja ya Mjumbe;
  - (ii) Maazimio ya Kamati Teule; na
  - (iii) Maazimio yoyote ya Baraza ambayo Serikali inatakiwa kuwasilisha Taarifa kwa mujibu wa Kanuni hizi;
- (d) Jambo jengine lolote ambalo Serikali inawajibika nalo.

(3) Mwenyekiti wa Kamati inayohusika au Mjumbe mwengine aliyeidhinishwa na Kamati hiyo atapewa nafasi ya kutoa maoni kwa niaba ya Kamati kuhusiana na taarifa hiyo ya Serikali.

(4) Wajumbe wanaweza kujadili na kutoa maoni yao kuhusiana na taarifa ya Serikali iliyowasilishwa.

**46.-**(1) Mjumbe yejote anaweza, kwa idhini ya Spika, katika wakati unaofaa kufuatana na mpangilio wa Orodha ya Shughuli za Baraza ambao umewekwa chini ya kanuni ya 27 ya Kanuni hizi, kutoa maelezo yake binafsi kwa ajili ya kutoa ufanuzi zaidi juu ya jambo alilolizungumza mbele ya Baraza ambalo anahisi halikufahamika vyema.

Maelezo  
binafsi ya  
Mjumbe.

(2) Hakutakuwepo mjadala wowote kuhusu maelezo binafsi lakini Wajumbe wanaweza, kwa idhini ya Spika, kumuuliza maswali Mjumbe aliyetoa maelezo hayo.

**47.-**(1) Mjumbe anayetaka kuwasilisha hoja juu ya jambo ambalo anaamini linahusiana na Kinga, Uwezo na Fursa za Wajumbe au Uwezo wa Baraza atafanya hivyo wakati unaofaa kufuatana na mfululizo wa Orodha ya Shughuli za Baraza uliowekwa chini ya kanuni ya 27 ya Kanuni hizi, na atamuarifu Spika mapema kuhusu kusudio lake hilo na jambo ambalo anataka kuliwasilisha.

Hoja  
kuhusu  
haki za  
Wajumbe.

(2) Mjumbe atakapoitwa na Spika ataaeleza kwa ufupi sababu zinazofanya aamini kwamba jambo analoliwasilisha linahusu Kinga, Uwezo na Fursa za Wajumbe au Uwezo wa Baraza kwa mujibu wa Katiba, sheria inayohusiana na Kinga, Uwezo na Fursa za Wajumbe au Kanuni hizi.

(3) Bila ya kujali masharti yaliyoelezwa chini ya kanuni ya 27 na fasili ya (1) ya kanuni ya 47 ya Kanuni hizi, Spika, endapo atakubali kuwa jambo hilo linahusu Kinga, Uwezo na Fursa za Wajumbe au Uwezo wa Baraza, atamruhusu Mjumbe husika kutoa hoja yake hiyo, na hoja hiyo itapewa nafasi muhimu ya kutangulia shughuli nyengine zote za kikao kinachohusika.

Shughuli za kawaida za Baraza zitatekelezwa kwa njia ya hoja na maagizo mengine yatakayokuwa yamewekwa katika Orodha ya Shughuli za Baraza.

**48.-**(1) Shughuli za kawaida za Baraza zitatekelezwa kwa njia ya hoja na maagizo mengine yatakayokuwa yamewekwa katika Orodha ya Shughuli za Baraza.

(2) Shughuli za kawaida zitaanza wakati Spika atakapomwita Mjumbe wa kwanza aliyetoa taarifa ya kutoa hoja mwanzoni mwa shughuli za Baraza au atamwita Mjumbe anayehusika na hoja ya kwanza iliyoko mwanzoni mwa Orodha ya Shughuli za Baraza au atakapomwita Katibu kusoma Orodha ya Shughuli za Baraza.

(3) Mjumbe aliyeitwa, kwa ruhusa ya Spika, atawasilisha jambo ambalo Spika amemruhusu aliwasilishe na Mjumbe mwengine ye yeyote hawezi kuingilia mazungumzo ya Mjumbe aliyeruhusiwa kwa namna yoyote ile isipokuwa kwa ajili ya kutoa taarifa inayohusu utaratibu au taarifa chini ya kanuni ya 67 ya Kanuni hizi.

Mjadala  
kuanzishwa  
kwa hoja.

**49.-**(1) Mjadala wa jambo lolote ndani ya Baraza utaanzishwa kwa kutolewa hoja kwa kuzingatia Orodha ya Shughuli za Baraza.

(2) Bila ya kuathiri masharti ya Katiba na kanuni hii, Waziri au Mjumbe ye yeyote anaweza, kwa kutoa hoja kupendekeza kwamba suala lolote lijadiliwe katika Baraza na hoja hiyo itaamuliwa kwa kufuata masharti ya Kanuni hizi.

(3) Mtoa hoja yejote anaweza kuomba hoja yake ipelekwe moja kwa moja katika Baraza au kwenye Kamati inayohusika.

(4) Endapo hoja itapelekwa kwenye Kamati inayohusika, Kamati hiyo itaanza kuitafakari mapema iwezekanavyo, na hoja hiyo haitatolewa katika Baraza mpaka Mwenyekiti wa Kamati husika atakapomuarifu rasmi Spika kwamba Kamati yake imemaliza kuitafakari, isipokuwa kwamba, Kamati inayopelekewa hoja kwa mujibu wa kanuni hii haitakuwa na mamlaka ya kufanya mabadiliko katika hoja hiyo.

(5) Endapo hoja haikupelekwa kwenye Kamati na imewekwa kwenye Orodha ya Shughuli za Baraza au kama ilipelekwa kwenye Kamati, na Kamati hiyo imemaliza kuishughulikia na imewekwa kwenye Orodha ya Shughuli za Baraza, hoja hiyo itawasilishwa na kuamuliwa kwenye Baraza kwa kufuata utaratibu ufuatao:

- (a) jambo lolote linalohitaji uamuvi wa Baraza, litaamuliwa kwa Spika kuwahoji Wajumbe kutoa uamuvi juu ya hoja iliyoolewa na Mjumbe;
- (b) baada ya hoja kutolewa na kuungwa mkono, Spika ataaelekeza hoja inayopaswa kujadiliwa ijadiliwe na Wajumbe na baada ya mjadala kufanyika au endapo hakuna Mjumbe anayetaka kuchangia hoja hiyo, Spika atawahoji ili kupata uamuvi wa Baraza;
- (c) kama hoja moja inahusu masuala mawili au zaidi, Spika akiona inafaa, anaweza kuwahoji Wajumbe kwa maswali tofauti yanayohusiana na hoja hiyo;
- (d) kama imependekezwa kufanya mabadiliko katika suala lolote, hoja ya awali haitoondolewa mpaka pendektezo la kufanya mabadiliko liamuliwe kwanza;
- (e) endapo hoja inayohitaji kutolewa taarifa ya kuwasilishwa imewasilishwa na Waziri au Mjumbe

baada ya taarifa kutolewa, Spika anaweza kuweka kiwango cha muda utakaotumika kuijadili hoja hiyo; na

(f) endapo italazimu mjadala ukatizwe kwa sababu ya kiwango cha muda uliowekwa kumalizika, mjadala huo unaweza kuendelezwa katika kikao au Mkutano wa baadae.

(6) Waziri au Mjumbe yeoyote hatoruhusiwa kuanzisha tena hoja kuhusiana na jambo lolote ambalo Baraza imeshali amma katika Mkutano uliopo au uliotangulia, isipokuwa kwa kufuata masharti ya fasili ya (4) ya kanuni ya 50 ya Kanuni hizi.

Masharti  
ya hoja.

**50.-**(1) Kwa kuzingatia masharti ya Katiba na kanuni ya 49 ya Kanuni hizi, hoja itakayotolewa itazingatia masharti yafuatayo:

(a) iwe ni pendekezo lililokamilika na liliowekwa katika hali inayoweza kueleza uamuzi wa Baraza;  
na  
(b) iwe inahusu mambo ya wananchi kwa ujumla.

(2) Hoja yoyote itatolewa katika Baraza iwapo taarifa ya hoja hiyo imetolewa na kupokelewa angalau siku mbili kabla ya kikao ambacho hoja hiyo inakusudiwa kutolewa, isipokuwa kwa hoja zilizoainishwa katika kanuni ya 52 ya Kanuni hizi,

(3) Taarifa ya hoja iliyotolewa chini ya masharti ya fasili ya (2) ya kanuni hii, itatolewa kwa maandishi, itatiwa saini na Mto hoja na itapelekwa kwa Katibu.

(4) Taarifa ya hoja inayokusudia kurudisha tena jambo ambalo lilikwisha kuamuliwa na Baraza inaweza kukubaliwa, kwa idhini ya Spika, kurudishwa tena katika Baraza iwapo imepita zaidi ya miezi kumi na mbili kabla ya kikao kinachoendelea.

(5) Endapo hoja ambayo ilitolewa taarifa haitajadiliwa katika Mkutano uliokusudiwa, taarifa ya hoja hiyo itatenguka lakini inaweza kutolewa tena baadae.

(6) Mtoa hoja anaweza kuiondoa hoja yake wakati wowote kabla ya Baraza halijahojiva na kutoa maamuzi juu ya hoja hiyo.

**51.-**(1) Taarifa ya hoja ya kutaka kufanya mabadiliko katika hoja inayotolewa ama katika Baraza au Kamati ya Baraza Zima, itakuwa ni siku moja kabla ya kikao ambacho hoja hiyo inakusudiwa kutolewa.

Taarifa ya mabadiliko ya hoja.

(2) Kutokana na dharura au sababu nyengine yoyote, Spika anaweza kuruhusu hoja ya kutaka kufanya mabadiliko katika hoja itolewe bila ya taarifa kutolewa kwanza.

(3) Bila ya kujali masharti ya fasili ya (3) ya kanuni ya 50 ya Kanuni hizi, iwapo Mjumbe anayetoa taarifa ni Waziri, taarifa hiyo inaweza kusainiwa kwa niaba yake na Kaimu Waziri au Mwanasheria Mkuu.

(4) Bila ya kuathiri masharti ya fasili ya (5) ya kanuni hii, taarifa ya hoja, baada ya kupokelewa na Katibu, kukubaliwa na Spika na kuwekwa katika Orodha ya Shughuli za Baraza, itaingizwa katika Kitabu cha Shughuli za Baraza, isipokuwa kwamba, taarifa ya hoja iliyofanyiwa mabadiliko itaingizwa katika Kitabu cha Shughuli za Baraza, baada ya kukubaliwa kwa kuzingatiwa masharti ya Kanuni hizi.

(5) Taarifa itawekwa katika Orodha ya Shughuli za Baraza kama ilivyoletwa au baada ya kufanyiwa mabadiliko ambayo Spika, kwa kibali cha Mjumbe aliyetoa taarifa ataagiza yafanywe, isipokuwa kwamba Spika hataruhusu taarifa yoyote ya hoja iwapo inakiuka kanuni yoyote na iwapo ataikataa, Katibu atairudisha taarifa hiyo kwa Mjumbe pamoja na maelezo ya sababu za kukataliwa kwa hoja hiyo.

**52.-**(1) Hoja zifuatazo zinaweza kutolewa katika Baraza bila ya kutolewa taarifa:

Hoja zisizo-tolewa taarifa.

(a) Hoja ya kuweka kando kanuni yoyote kati ya Kanuni hizi;

- (b) Hoja ya kuahirisha Baraza au mjadala;
- (c) Hoja inayotolewa katika Kamati ya Baraza Zima, isipokuwa kama ni hoja ya kutaka kufanya mabadiliko katika hoja nyengine, Mswada au Makadirio ya fedha;
- (d) Hoja ya kumsimamisha kazi Mjumbe;
- (e) Hoja ya kutaka Wageni waondoke;
- (f) Hoja ya kwamba ripoti ya Kamati Teule au Kamati ya Kudumu ipelekwe kwenye Baraza au ichapishwe;
- (g) Hoja kuhusu jambo lolote linalohusiana na Kinga, Uwezo na Fursa za Wajumbe au Uwezo wa Baraza;
- (h) Hoja ya kutaka kubadilisha utaratibu wa shughuli za Baraza uliowekwa chini ya kanuni ya 27 ya Kanuni hizi; na
- (i) Hoja ya kuunda Kamati Teule.

(2) Kwa kuzingatia masharti ya aya ya (h) ya fasili ya (1) ya kanuni hii, endapo kikao cha Baraza kinaendelea limetokea jambo linalohusu Kinga, Uwezo na Fursa za Wajumbe au Uwezo wa Baraza, shughuli zote zinazoendelea zitasimamishwa isipokuwa kama wakati huo Baraza limeshahojiwa kutoa uamuzi katika jambo linaloendelea.

(3) Hakutakuwepo mjadala wowote kuhusiana na ombi la kutoa hoja ambayo kutolewa kwake hakuhitaji taarifa.

**53.-**(1) Endapo Mjumbe anapenda kufanya mabadiliko katika maneno aliyoyatumiya katika hoja aliyoitolea taarifa, anaweza kufanya hivyo kwa kutoa taarifa ya mabadiliko ya hoja angalau siku moja kabla ya siku ile ambapo hoja hiyo imepangwa ijadiliwe.

(2) Bila ya kujali taarifa ya hoja ya kutaka kufanya mabadiliko katika hoja ya awali imetolewa, mabadiliko yoyote

hayatakubaliwa iwapo kwa maoni ya Spika mabadiliko hayo yanageuza mambo ya msingi yaliyomo katika hoja ya awali au yanageuza kusudio au upeo wa hoja hiyo.

**54.-**(1) Mtoa hoja atakapoitwa na Spika kutoa hoja yake atasimama na atataja maneno yaliyomo katika hoja yake na baada ya kutoa maelezo mengine atakayopenda kuyatoa, atatamka “naomba kutoa hoja”.

(2) Kila hoja au mabadiliko katika hoja ambayo hayakuungwa mkono yatatenguka, na hapo Katibu ataandika maelezo katika Kitabu cha Shughuli za Baraza kwamba kwa kuwa hoja haikuungwa mkono, Spika hakuweza kuiruhusu hoja hiyo ijadiliwe.

(3) Hoja iliyotenguka inaweza kutolewa tena baada ya taarifa ya hoja hiyo kutolewa.

(4) Mjumbe anaweza kuunga mkono hoja kwa kusimama tu bila ya kusema lolote kuhusu hoja kisha akakaa na Mjumbe akisha kufanya hivyo anaweza kuzungumzia hoja hiyo hapo baadae.

(5) Endapo hoja itatolewa na kuungwa mkono, Spika ataruhusu hoja hiyo ijadiliwe na Wajumbe na katika kuchangia Mjumbe anaweza kutoa mchango wake kwa muda uliowekwa na Kanuni hizi.

(6) Endapo hoja imewekwa katika Orodha ya Shughuli za Baraza, na Mtoa hoja anapoitwa na Spika kuitoa anashindwa kuitoa hoja hiyo, hoja itatenguka ila kama Mjumbe mwengine aliyeidhinishwa rasmi na Mtoa hoja huyo, ataitoa kwa niaba yake au kama Mjumbe atatoa au ametoa taarifa ya kutaka kuiahirisha, lakini hoja inayohusiana na Shughuli za Serikali inaweza kutolewa na Waziri yeoyote.

(7) Endapo Baraza liko katika Kamati ya Baraza Zima, Hoja au Mabadiliko ya Hoja inaweza kutolewa bila ya kuungwa mkono.

Utaratibu  
wa kujadili  
hoja.

(8) Endapo hakuna Wajumbe zaidi wanaopenda kuzungumzia hoja iliyotolewa, Spika atawahoji Wajumbe ili upatikane uamuzi wa Baraza juu ya hoja hiyo.

Kubadilisha  
hoja katika  
Baraza.

**55.-**(1) Hoja ikishakutolewa katika Baraza ili iamuliwe inaweza kubadilishwa kwa:

- (a) kuondoa maneno fulani na kuingiza maneno mengine;
- (b) kuondoa maneno fulani; au
- (c) kuingiza au kuongeza maneno mengine.

(2) Isipokuwa kama taarifa imetolewa mapema na Mtoa hoja ya kubadilisha hoja, kabla ya kuitoa hoja hiyo, atamkabidhi Katibu maandishi yenye saini yake na yanayoonesha mabadiliko anayotaka yafanywe, lakini Spika anaweza kuruhusu mabadiliko yafanyike iwapo mabadiliko hayo ni madogo au ni ya kawaida.

(3) Kila badiliko linalopendekezwa lazima liwiane na hoja inayokusudiwa kufanyiwa mabadiliko na isipokuwa kama ni katika Kamati ya Baraza Zima, lazima badiliko hilo liungwe mkono na lisizushe suala lolote ambalo kwa maoni ya Spika linaweza kuwasilishwa kwa hoja maalumu baada ya kutolewa taarifa.

(4) Baada ya uamuzi kutolewa kuhusu badiliko katika sehemu yoyote ya hoja, sehemu yoyote inayotangulia sehemu hiyo katika hoja hiyo haiwezi tena kubadilishwa na iwapo hoja ya kubadilisha sehemu yoyote ya hoja imekwisha kutolewa na Spika ili iamuliwe, sehemu inayotangulia hoja hiyo haitabadilika mpaka pale hoja ya kuifanya mabadiliko iwe imekubaliwa.

(5) Hoja yoyote ya kutaka kufanya mabadiliko haitaruhusiwa kama inapingana na uamuzi wa nyuma uliokwisha kutolewa juu ya suala hilo.

(6) Hoja inaweza kutolewa kwa ajili ya kufanya mabadiliko katika hoja ya mabadiliko mengine iliyotolewa na Spika kwa Wajumbe ili iamuliwe.

(7) Endapo hoja ya mabadiliko inapendekeza kuondoa maneno fulani na kuingiza maneno mengine, hali ya mjadala juu ya suala la kufanya mabadiliko inaweza kuangaliwa kwa pamoa na yale maneno yanayopendekezwa yaingizwe na endapo hoja inapendekeza kuondoa maneno au kuingiza maneno, mjadala utahusu uondoaji au uingizaji wa maneno mapya, kadri itakavyokuwa.

(8) Hoja ya kufanya mabadiliko juu ya hoja ya kufanya mabadiliko lazima ihusiane na hoja ya kwanza ya mabadiliko na itatolewa ili ijadiliwe na kuamuliwa kama vile hoja ya pili ya mabadiliko ilikuwa ni hoja ya awali, mpaka mapendekezo katika hoja yatakapokuwa yamejadiliwa na kumalizika.

(9) Endapo hoja ya kufanya mabadiliko imetolewa na kuungwa mkono, Spika ataruhusu ijadiliwe kwa zile hoja zinazohitaji kujadiliwa na itaamuliwa kabla ya kuamuliwa hoja ya msingi.

(10) Spika atatoa hoja za mabadiliko ili ziamuliwe na Baraza kwa namna na kwa utaratibu ambao ataona unafaa.

**56.** Endapo mabadiliko yanayopendekezwa yanakusudia kuondoa baadhi ya maneno yaliyomo katika hoja na kuingiza maneno mapya, Spika atatamka kuwa “Hoja hiyo ya kufanya mabadiliko naomba iamuliwe”. Namna ya mabadiliko ya hoja.

**57.-**(1) Endapo Mjumbe anataka kupendekeza mabadiliko yafanywe katika hoja kwa kufuata masharti ya Kanuni hizi, anaweza kutoa hoja yake ya kufanya mabadiliko wakati wowote baada ya hoja hiyo anayotaka kuibadilisha kutolewa, lakin kabla ya Baraza halijahojiwa ili kutoa maamuzi juu yake. Utaratibu wa kujadili mabadiliko ya hoja.

(2) Endapo kuna mapendekezo mawili au zaidi ya kubadilisha hoja moja, Spika anaweza kuamua hoja ambayo itaanza kuamuliwa kabla ya nyengine.

(3) Endapo mapendekezo yote ya mabadiliko yameamuliwa, Spika, ama ataitoa tena hoja ya awali au ataitoa kama itakavyokuwa baada ya kufanyiwa mabadiliko kadri itakavyokuwa ili ijadiliwe na kuamuliwa.

Kubadilishwa mabadiliko ya hoja. **58.(1)** Hoja ya kufanya mabadiliko katika hoja nyengine ya kufanya mabadiliko, inaweza kutolewa wakati wowote baada ya hoja ya kwanza ya kufanya mabadiliko kutolewa, lakini kabla ya Baraza halijahojiwa ili kuiamu.

(2) Endapo hoja ya kufanya mabadiliko katika hoja ya kufanya mabadiliko imeamuliwa, Spika ama ataitoa tena hoja ya kwanza ya kufanya mabadiliko au ataitoa kama itakavyokuwa baada ya kufanyiwa mabadiliko kadri itakavyokuwa.

Utaratibu wa kuondoa hoja ya mabadiliko. **59.-(1)** Kwa idhini ya Spika, hoja ya kufanya mabadiliko inaweza kuondolewa wakati wowote kabla ya hoja hiyo hajitatolewa ili iamuliwe.

(2) Mtoa hoja anaweza kuiondoa hoja yake kwa kusimama na kusema “Naomba ruhusa kuiondoa hoja” na hoja hii itaamuliwa kwa mujibu wa Kanuni hizi.

(3) Hoja au hoja ya kufanya mabadiliko ambayo imeondolewa inaweza kutolewa tena baada ya taarifa kutolewa.

Taarifa ya utekelezaji wa hoja. **60.** Serikali itawasilisha katika Baraza, ndani ya miezi mitatu baada ya maazimio ya Baraza juu ya mjadala wa Hoja ya Mjumbe, Taarifa ya Utekelezaji wa Maazimio hayo, isipokuwa kwamba, ikiwa maazimio yametolewa katika Mkutano wa mwisho kabla ya kuvunjwa kwa Baraza, Taarifa ya Serikali itawasilishwa katika Mkutano wa Pili wa Baraza jipya.

## **SEHEMU YA TANO TARATIBU ZA MAJADILIANO**

**61.-**(1) Mjumbe akitaka kuchangia anaweza ama kumpelekea Spika ombi la maandishi au atasimama kimya na hataanza kuchangia mpaka Spika amuite ama kwa jina au kwa wadhifa wake, na kumruhusu kusema na hapo ndipo ataanza kuchangia, akielekeza maneno yake kwa Spika na baada ya kumaliza kuchangia atakaa, isipokuwa kwamba, endapo Wajumbe wawili au zaidi watasimama kwa wakati mmoja, Mjumbe atakayeitwa mwanzo na Spika ndiye atakayechangia.

(2) Katika mjadala wowote, Mawaziri na Naibu Mawaziri watatajwa kwa kutumia majina ya nyadhifa zao, Wajumbe wengine wowote watatajwa kwa kutumia neno “Mheshimiwa” kabla ya majina yao na Wenyeviti wa Kamati za Kudumu wataitwa kwa mujibu wa nyadhifa zao wanapowasilisha taarifa au ripoti za Kamati.

(3) Isipokuwa kama ameruhusiwa na Spika, Mjumbe hatasoma mchango wake, lakini kwa madhumuni ya kutilia nguvu maelezo yake, anaweza kunukuu dondo Kutoka katika kumbukumbu zilizoandikwa au kuchapishwa na anaweza kujikumbusha kwa kuangalia katika kumbukumbu alizozilandika.

(4) Mjumbe atachangia akiwa amesimama na atatumia vyombo maalumu vilivyowekwa kwa ajili ya kukuza sauti au kutafsiri na kwa idhini ya Spika, Mjumbe ambaye kutokana na ulemavu au ugonjwa hawezi kusimama, atachangia akiwa amekaa.

(5) Endapo wakati wa majadiliano katika Baraza, Spika atasimama, Mjumbe ambaye amesimama, atakaa na kubaki kimya ili Spika aweze kusikika bila ya matatizo.

(6) Hakuna Mjumbe ye yeyote atakayeruhusiwa kuchangia suala ambalo Spika tayari ameshawahoji Wajumbe na uamuzi juu yake kutolewa.

(7) Mjumbe anayejadili hoja ataruhusiwa kuchangia kwa muda usiozidi dakika kumi na tano katika Mkutano wa kawaida na dakika ishirini wakati wa Mkutano wa Bajeti, isipokuwa kwamba Spika akiona inafaa anaweza kuongeza au kupunguza muda usiozidi dakika tano.

(8) Spika anaweza kuongeza muda usiozidi dakika 30 bila ya kuwahoji Wajumbe kwa ajili ya kumalizia mjadala wa jambo husika.

(9) Mjumbe yejote anaweza kutoa mchango wake kwa maandishi, ambao atampelekea Waziri au Mjumbe mtoa hoja anayehusika, wakati ambapo hoja inaendelea kujadiliwa.

(10) Waziri au Mjumbe mtoa hoja ambae amepokea mchango wa maandishi kutoka kwa Mjumbe, atalazimika kuwasilisha mchango huo kwa Katibu ili uingizwe kwenye Taarifa Rasmi.

Mambo  
yanayofaa  
na  
yasiyofaa  
kuzungu-  
mzwa.

**62.-**(1) Mjumbe atalisema lile jambo ambalo liko katika mjadala na hatarudia rudia kwa namna yoyote ile, maneno yake au yale yaliyochangiwa na Wajumbe wengine.

(2) Endapo Spika ametoa masuala ya kujadiliwa zaidi ya moja, mjadala utafanyika kwa suala lililotolewa mwisho mpaka limalizike, ndipo mjadala urudie suala la kwanza.

(3) Mjumbe yejote anapokuwa anachangia katika Baraza, atawajibika kuwa na sababu ya msingi kwamba maeleo anayoyatao ni sahihi na sio mambo ya kubuni au ya kubahatisha, na Spika au Mjumbe mwengine yejote anaweza kumtaka Mjumbe huyo anayechangia atoe uthibitisho wa maeleo yake yanayohusika.

(4) Mjumbe yejote hatachangia jambo lolote ambalo linasubiri uamuzi wa Mahakama, lilijadiliwa katika Mkutano wowote uliopita na ambalo halikuletw rasmi kwa ajili ya mjadala unaoendelea na hatachangia kwa kutaka kupinga au vyenginevyo,

uamuzi wowote uliofanywa na Baraza, isipokuwa kwa kutoa hoja halisi inayopendekeza kuwa uamuzi huo ufutwe.

(5) Mjumbe ye yeyote hatachangia shughuli yoyote ya Kamati mpaka shughuli hiyo iwe imewasilishwa katika Baraza kama taarifa au ripoti ya Kamati juu ya shughuli hiyo.

(6) Mjumbe ye yeyote hatatumia jina la Rais au Makamu wa Rais kwa dhihaka katika mjadala au kwa madhumuni ya kutaka kushawishi Baraza kuamua jambo lolote kwa namna fulani.

(7) Mjumbe ye yeyote hatajadili au kuchangia katika Baraza mwenendo wa Rais, Makamu wa Rais, Spika, Wajumbe, Wabunge, Majaji, Mahakimu na watu wanaoshughulikia utoaji wa haki, na itakuwa ni kinyume na utaratibu wa Baraza kwa Mjumbe kujadili au kuchangia mwenendo wa watu waliotajwa wakati wa kuchangia juu ya hoja inayohusu jambo jengine lolote, isipokuwa kama kunatolewa hoja maalumu kuhusu jambo kama hilo.

(8) Mjumbe ye yeyote hataruhusiwa:

- (a) kutumia lugha au ishara ya matusi, kejeli, kashfa au lugha isiyokuwa ya staha itakayolishushia hadhi na heshima Baraza, Serikali, Mjumbe pamoja na yeye mwenyewe;
- (b) kutumia haki yake ya kuchangia kwa madhumuni ya kutaka kuchelewesha Shughuli za Baraza;
- (c) kumzungumza Mjumbe au mtu mwengine kwa nia mbaya au kumshambulia binafsi, isipokuwa kwa kutoa hoja halisi inayohusu mwenendo mahasusi wa Mjumbe au mtu huyo; na
- (d) kuijingiza katika mambo ya kuwasema Wajumbe wenzake.

(9) Mjumbe hatazungumza jambo lolote ambalo yeye mwenyewe ana maslahi nalo binafsi, isipokuwa baada ya kutaja namna halisi ya kiwango cha maslahi hayo na hatokuwa na haki ya kupiga kura kwenye hoja inayohusu jambo hilo.

Kuzungumza  
zaidi ya  
mara moja.

**63.-**(1) Mjumbe ye yeyote hataruhusiwa kuzungumza zaidi ya mara moja juu ya hoja husika, isipokuwa kwa idhini ya Spika, ikiwa:

- (a) wakati huo Baraza liko katika Kamati ya Baraza Zima;
- (b) anatumia haki yake ya kujibu;
- (c) anatoa maelezo zaidi juu ya sehemu muhimu ya mchango wake ambao umefahamika vibaya na wakati wa maelezo hayo hataongeza kitu kipyaa; au
- (d) anasema kuhusu utaratibu.

(2) Mjumbe ambaye amesema juu ya hoja anaweza kusema tena juu ya hoja ya kufanya mabadiliko katika hoja aliyoisema, na Mjumbe ambaye amesema juu ya hoja ya kutaka kufanya mabadiliko katika hoja ya awali anaweza kusema tena juu ya hoja ya awali baada ya kufanya mabadiliko katika hoja ya awali.

(3) Mjumbe mtoa hoja ya msingi au Mtoa hoja ya kutaka kufanya mabadiliko katika hoja nyengine, atakuwa na haki ya kujibu baada ya Wajumbe kupata fursa ya kuchangia katika Baraza na kabla ya uamuji juu ya hoja hiyo haujatolewa.

Masharti  
kwa  
Wajumbe  
katika  
Baraza  
wakati wa  
mjadala

**64.** Mjumbe aliye kuwepo katika Baraza wakati wa mjadala:

- (a) ataingia au kutoka katika ukumbi wa mjadala au Mikutano ya Baraza kwa staha na atainamisha kichwa kuelekea kwa Spika kila mara Mjumbe huyo atakapokuwa anakwenda au kutoka mahali pake;

- (b) atatulia na kukaa kwa heshima mahali pake na hatatangatanga katika ukumbi wa Mikutano;
  - (c) hatapita katikati baina ya kitu cha Spika na Mjumbe anayesema, au baina ya kitu cha Spika na meza ya Katibu;
  - (d) hatasikiliza redio, hatasoma kitabu chochote, gazeti au barua ila kama yatahusu shughuli za mjadala na kwa idhini ya Spika;
  - (e) hatazungumza kwa sauti ya juu;
  - (f) hatamkatiza Mjumbe anayesema, kwa maneno au makelele ya fujo au kwa namna nyengine yoyote ya fujo;
  - (g) hatatafuna ubani, hatavuta aina yoyote ya sigara, hatonusa tumbaku, kuvuta uraibu wa aina nyengine yoyote au hatofanya jambo jengine linalohusiana na hayo wakati wowote ndani ya ukumbi huo au pahala ambapo pamewekwa kwa ajili ya kukaa wageni;
  - (h) hatakula, hatakunywa, hatachukua chakula cha aina yoyote bila ya idhini ya Spika;
  - (i) haruhusiwa kuingia na aina yoyote ya silaha isipokuwa kwa idhini ya Spika;
- Kwa madhumuni ya fasili hii, “silaha” inajumuisha bunduki, bastola, rungu, gongo, panga, kisu au kitu chochote kinacholingana na hayo.
- (j) hatofanya kitendo chochote ambacho kitaharibu heshima yake na nidhamu ya Baraza; na
  - (k) hatalala au kusinzia.

Matumizi ya kifaa cha kielekrtroniki.

**65.-**(1) Mjumbe au mtu mwengine ye yote anaweza kuingia na kutumia kifaa cha kielektroniki ndani ya Baraza kwa kuhakikisha kwamba:

- (a) kifaa hicho hakitoi sauti;
- (b) hakiingilii mawasiliano ndani ya Baraza;
- (c) hakitumiki kwa mazungumzo; na
- (d) hakitoleta madhara yoyote ndani ya Baraza.

(2) Mjumbe au mtu ye yote ambaye atakiuka masharti ya fasili ya (1) ya kanuni hii, ataamriwa na Spika kutoka nje ya Baraza na hataruhusiwa kushiriki kikao kinachoendelea.

(3) Mjumbe ye yote ambaye atatolewa na Spika nje ya Baraza kwa mujibu wa masharti ya fasili ya (2) ya kanuni hii, hatalipwa posho anayostahiki kwa ajili ya kikao alichositishwa.

Kukatiza majadiliano.

**66.-**(1) Spika anaweza kutoa maelezo au maelekezo katika Baraza wakati wowote, na kwa ajili hiyo anaweza kumkatisha Mjumbe ye yote anayechangia na endapo Spika atasimama wakati wa mjadala, au akianza kusema, Mjumbe huyo, au ambaye amesimama mahali alipo akisubiri kuanza kusema atakaa, na Baraza litakuwa kimya ili Spika aweze kusikika kwa urahisi.

(2) Mjumbe hatamatisha Mjumbe anayesema, isipokuwa kwa idhini ya Spika, kama anataka:

- (a) kusema jambo linalohusu utaratibu;
- (b) kutoa taarifa;
- (c) kutoa ufanuzi juu ya jambo lililofahamika vibaya; au
- (d) kuomba ufanuzi zaidi juu ya jambo lolote.

**67.-**(1) Mjumbe anaweza kusimama wakati wowote na kusema maneno “kuhusu utaratibu” lakini Mjumbe anapofanya hivyo atataja kanuni iliyokiukwa, Mjumbe yejote ambaye wakati huo atakuwa anasema, papo hapo atakaa chini na Mjumbe anayesimama kusema kuhusu utaratibu atakaa chini akishakueleza jambo hilo la utaratibu, Mjumbe aliyekatishwa kusema kwa jambo la utaratibu, hatasimama kuendelea na maelezo yake mpaka Spika atakapokuwa ametoa kauli yake juu ya jambo hilo la utaratibu lililotajwa.

(2) Spika, anaweza ama papo hapo kutoa uamuzi wake juu ya jambo la utaratibu lililotajwa, kuahirisha kikao ili alifikirie zaidi jambo hilo kabla ya kutoa uamuzi, au kutoa uamuzi na baadae kutoa sababu za uamuzi huo au kuamuru Baraza liendelee na kuahidi kwamba atatoa uamuzi baadae na vyovyote ambavyo Spika atakavyoamua, Mjumbe aliyekuwa akichangia wakati jambo la utaratibu lilipotajwa anaweza kuendelea na mchango wake baada ya Spika kutoa uamuzi juu ya jambo hilo.

(3) Mjumbe anaweza kusimama wakati wowote ambapo hakuna Mjumbe mwengine anayezungumza na kuomba “Mwongozo wa Spika” kuhusu jambo ambalo limetokea katika Baraza kwa siku hiyo, ili Spika atoe ufanuzi kama jambo hilo linaruhusiwa au haliruhusiwi kwa majibu wa Kanuni na taratibu za Baraza na majibu ya Spika yatatolewa papo hapo au baadaye, kadri atakavyoona inafaa.

(4) Mjumbe yejote anaweza kusimama mahali pake na kusema neno “taarifa” na kwa ruhusa ya Spika, atatoa taarifa au ufanuzi kwa Mjumbe anayechangia, ambapo Spika atamtaka Mjumbe anayechangia kukaa na kusikiliza taarifa hiyo.

(5) Mto taarifa atakapomaliza na kukaa, Spika atamuuliza Mjumbe aliyekuwa akichangia mwanzo kama anaikubali au haikubali taarifa hiyo kabla ya kumruhusu kuendelea kuchangia hoja.

Taarifa  
kuhusu  
utaratibu.

(6) Uamuzi wa Spika juu ya suala lolote kuhusu utaratibu, mwongozo wa Spika au taarifa utakuwa ni wa mwisho.

**Kuahirisha mjadiliano.** **68.-**(1) Mjumbe mwenye sababu ya kutaka kuahirisha mjadala wowote unaoendelea anaweza kutoa hoja kwamba mjadala uahirishwe na atataja mjadala huo uahirishwe mpaka wakati gani.

(2) Mjadala kuhusu hoja ya namna hiyo utahusika na maelezo ya hoja hiyo ya kuahirisha mjadala.

(3) Kama Spika atakuwa na maoni kwamba kuwasilishwa kwa hoja hiyo ni kinyume cha utaratibu wa uendeshaji bora wa shughuli za Baraza, anaweza kukataa kutolewa ili iamuliwe au papo hapo kuwahoji Wajumbe juu ya hoja hiyo, kadri atakavyoona inafaa.

(4) Mjumbe yejote anaweza kuiunga mkono hoja ya namna hiyo kwa kusimama na kumuelekea Spika na kusema “Naunga mkono”, lakini kufanya hivyo hakutamuondolea Mjumbe huyo haki yake ya kuchangia hapo baadaye endapo mjadala unaotaka kuahirishwa utaendelea.

(5) Endapo hoja iliyowasilishwa itashindwa kupata kibali cha Baraza, mjadala kuhusu hoja iliyoko mbele ya Baraza utaendelea.

(6) Itakuwa ni kinyume na utaratibu kutoa hoja ya kutaka kufanya mabadiliko katika hoja iliyotolewa kwa mujibu wa kanuni hii.

**Kufunga mjadala.** **69.-**(1) Endapo bado kuna Wajumbe wanataka kuchangia katika jambo lilioko katika mjadala, utaratibu utakaotumika kufunga mjadala ni kutolewa hoja itakayoamuliwa na Wajumbe walio wengi.

(2) Hoja ya kufunga mjadala unaoendelea inaweza kutolewa wakati wowote baada ya Mjumbe anayechangia kumaliza mchango wake.

(3) Mjumbe yeote anayetaka mjadala ufungwe anaweza, wakati wowote baada ya hoja kutolewa ili iamuliwe, kusimama mahala alipo na kama yule aliyetoa hoja inayojadiliwa ana haki ya kujibu, kutoa hoja “kwamba mtoa hoja sasa apewe nafasi ya kujibu”.

(4) Spika atawahoji Wajumbe hapo hapo juu ya hoja hiyo bila ya mabadiliko yoyote wala mjadala.

(5) Endapo hoja “kwamba Mtoa hoja sasa apewe nafasi ya kujibu” itakubaliwa, Mtoa hoja atapewa nafasi ya kujibu na mara baada ya majibu kutolewa, Spika atawahoji Wajumbe juu ya hoja ya awali.

**SEHEMU YA SITA  
UDHIBITI WA AMANI, UTULIVU, HESHIMA NA  
UWAJIBIKAJI KATIKA BARAZA**

**70.-**(1) Mjumbe, pamoja na wajibu alionao chini ya vifungu Wajibu wa Mjumbe. vya Katiba, atakuwa pia na wajibu juu ya mambo yafuatayo:

- (a) kulinda hadhi ya Baraza na Kamati zake;
- (b) kutojiingiza kwa namna yoyote katika vitendo vya makusudi vya kutoliheshimu Baraza;
- (c) kutosababisha Baraza au Kamati zake kudharauliwa; na
- (d) kutumia vikao vya Baraza au Kamati kulinda haki na maslahi ya wananchi kwa mujibu wa masharti ya Katiba, Katiba ya Jamhuri ya Muungano wa Tanzania ya 1977 na Maadili ya Taifa.

(2) Mjumbe atawajibika pia kufuata kwa ukamilifu Kanuni za Maadili zilizopo kwenye Jadweli la Pili la Kanuni hizi.

Spika  
kusimamia  
Kanuni.

**71.-**(1) Spika atakuwa na wajibu wa kusimamia kanuni zote za Baraza.

(2) Spika anaweza kumtaka Mjumbe yeyote anayekiuka Kanuni hizi kujirekebisha mara moja, na Mjumbe yeyote anaweza kusimama na kumuarifu Spika kuwa Mjumbe fulani anakiuka kanuni ambayo ataitaja.

(3) Spika anaweza kutoa maamuzi katika kanuni yoyote inayohusu Kanuni hizi na endapo Mjumbe hatoridhika na uamuzi wa Spika, anaweza kuwasilisha sababu za kutoridhika kwake kwa Kamati ya Maadili, Kinga na Fursa za Wajumbe ambayo itatakiwa ikutane mara moja kufikiria na kutoa ushauri wake kwa Spika juu ya jambo hilo.

Mjumbe  
anaposema  
mambo  
yasiyofaa.

**72.-**(1) Baada ya kulijuilisha Baraza juu ya tabia ya Mjumbe anayeshikilia kusema mambo yasiyofaa kwa mujibu wa Kanuni hizi, Spika anaweza kumuamuru Mjumbe huyo kukatisha mchango wake na kukaa.

(2) Spika anaweza kumuamuru Mjumbe anayekataa kukaa baada ya kuamriwa, kutoka mara moja katika ukumbi wa Baraza kwa muda uliobakia wa kikao kinachoendelea.

Kusima-  
mishwa kwa  
Mjumbe.

**73.-**(1) Kwa kuzingatia masharti ya fasili ya (5) ya kanuni ya 61 ya Kanuni hizi, endapo Mjumbe ataendelea kusimama baada ya Spika kusimama au kuzungumza na akikataa kukaa baada ya kuamriwa kufanya hivyo au akiendelea kukatiza maelezo ya Spika, ataamriwa na Spika kutoka katika kikao cha Baraza kwa muda uliobaki wa kikao kilichopo au atatajwa na Spika kwa kudharau mamlaka ya Spika kinyume na kanuni hii.

(2) Endapo amri ya kutoka katika kikao cha Baraza kwa mujibu wa kanuni hii haitimizwi mara moja, Spika anaweza kumtaja Mjumbe kwa kufuata masharti ya Kanuni hizi.

Mjumbe  
kutokujali  
mamlaka  
ya Spika.

**74.-**(1) Endapo Mjumbe anaonesha kutokujali mamlaka ya Spika au akishikilia kukiuka Kanuni hizi au akikiuka mwenendo

bora wa Baraza kwa kuchelewesha shughuli za Baraza mara kwa mara au kwa makusudi au kwa njia nyengine yoyote, Spika atafuata utaratibu ufuatao:

- (a) endapo kosa hilo limetendeka ndani ya Kikao cha Baraza:
  - (i) Spika anaweza kumtaja Mjumbe aliyetenda kosa hilo;
  - (ii) Mjumbe huyo atapewa nafasi ya kujitetea iwapo utetezi atakuwa nao;
  - (iii) endapo utetezi wake utakuwa hautoshelezi, Spika anaweza kuamuru Mjumbe huyo atolewe nje ya Kikao cha Baraza kwa muda uliobaki;
  - (iv) endapo Spika hakuchukua hatua chini ya kipengele cha (iii) cha aya ya (a) ya fasili ya (1) ya kanuni hii, Mjumbe mwengine ye yote anaweza kutoa hoja kwamba Mjumbe huyo aliyetajwa asimamishwe kazi; na
  - (v) Spika atawataka Wajumbe watoe uamuzi kwa kupiga kura juu ya hoja “Kwamba Mjumbe huyo asimamishwe kazi”,

isipokuwa kwamba, hakutakuwa na mabadiliko ya hoja au kuahirishwa kwa hoja iliyotolewa na Mjumbe.

- (b) endapo kosa limetendeka katika Kamati ya Baraza Zima;
  - (i) Mwenyekiti atasimamisha shughuli za Kamati ya Baraza Zima na Baraza litarudia; na

- (ii) Spika atatoa taarifa kwa Baraza kuhusu mwenendo wa Mjumbe huyo na masharti ya kipengele vya (ii), (iii), (iv) na (v) vya aya ya (a) vya fasili hii yatatumika.
- (2) Spika hatotaja zaidi ya Mjumbe mmoja kwa wakati mmoja isipokuwa kwamba endapo Wajumbe kadhaa wanadharau mamlaka ya Spika kwa pamoja, anaweza kuwataja kwa pamoja.

(3) Ikiwa hoja yoyote chini ya kanuni hii itapitishwa na Mjumbe kusimamishwa kazi, ikiwa ni kosa la kwanza ataendelea kuwa amesimamishwa kwa muda wa siku ishirini na moja, kama ni kosa lapili hadi sikusitini, lakini kama ni kosa la tatu au zaidi Mjumbe huyo ataendelea kuwa amesimamishwa kazi hadi hapo Baraza litakapoamua kwamba usimamishwaji wa Mjumbe huyo umalizike.

Mjumbe  
aliyesima-  
mishwa  
kazi.

**75.** Mjumbe aliyesimamishwa kazi kwa mujibu wa kanuni ya 74 ya Kanuni hizi, atatoka katika Baraza na hataingia tena katika sehemu yoyote ya ukumbi wa Mikutano ya Baraza kwa muda wote atakapokuwa amesimamishwa, na malipo yoyote ambayo ana haki ya kulipwa kama Mjumbe wa Baraza, hatalipwa kwa muda wote atakaokuwa amesimamishwa kazi isipokuwa malipo ya mshahara, posho ya uwakilishi na posho ya nyumba.

Mjumbe  
kuomba  
radhi.

**76.-**(1) Endapo Spika atapokea maombi ya kuomba radhi kwa maandishi kutoka kwa Mjumbe aliyesimamishwa kazi, ataagiza maombi hayo yaingizwe katika Orodha ya Shughuli za Baraza kama taarifa ya Spika.

(2) Kwa kuzingatia masharti ya fasili ya (1) ya kanuni hii, Mjumbe ye yoyote anaweza kusimama na kutoa hoja ya kuridhiwa msamaha aliuomba Mjumbe aliyesimamishwa kazi na hoja hiyo itaamuliwa bila mabadiliko wala mjadala.

Fujo ndani  
ya ukumbi  
wa Baraza.

**77.-**(1) Mjumbe atalazimika kudhibiti amani, utulivu na kulinda heshima muda wote atakapokuwa katika ukumbi wa Baraza.

(2) Mjumbe ambaye ameamriwa kutoka katika ukumbi wa Baraza au amesimamishwa kazi kwa mujibu wa kanuni ya 74 ya Kanuni hizi, amekataa kutii amri ya Spika, Spika anaweza kuamuru hatua zinazofaa zichukuliwe ili amri yake itekelezwe.

(3) Endapo hatua zimechukuliwa kwa mujibu wa fasili ya (2) ya kanuni hii na Spika anaona kwamba kuna haja ya kutumika nguvu, anaweza kuahirisha Baraza bila hoja yoyote kutolewa au kusimamisha kikao kwa muda ambao yeye atautaja, wakati Mjumbe anatolewa kwa nguvu kutoka katika Baraza.

**SEHEMU YA SABA  
UHALALI WA SHUGHULI ZA MIKUTANO NA  
VIKAO VYA BARAZA**

**78.-**(1) Akidi ya kikao cha Baraza itakuwa ni nusu ya Wajumbe Akidi ya kikao. wote wa Baraza.

(2) Kwa kuzingatia masharti ya fasili ya (1) ya kanuni hii, klabla ya kikao cha Baraza kuanza Spika atahakikisha kuwa idadi ya Wajumbe waliopo ndani ya Baraza imefikia nusu ya Wajumbe wote wa Baraza na endapo idadi haikufikiwa atasimamisha shughuli za kikao kwa muda wa dakika kumi na huku Mhudumu, kwa maelekezo ya Katibu, akipiga kengele kwa vituo yaani sio mfululizo.

(3) Endapo Spika hatochukua hatua kama ilivyoelezwa katika fasili ya (2) ya kanuni hii, Mjumbe ye yeyote aliyehudhuria anaweza kusimama na kutoa taarifa kwa Spika kwamba, Wajumbe waliopo ni chini ya nusu ya Wajumbe wote, kama Spika atathibitisha kuwa taarifa iliyotolewa na Mjumbe ni sahihi, masharti ya fasili ya (2) ya kanuni hii yatafuatwa.

(4) Endapo Spika amesimamisha shughuli kwa mujibu wa fasili ya (2) na (3) ya kanuni hii, wakati wa Baraza kurudia shughuli baada ya wakati uliotajwa kumalizika atahakikisha kama idadi ya Wajumbe waliopo bado imepungua nusu ya Wajumbe wote, ataliahirisha Baraza mpaka kikao chengine kinachofuata.

(5) Masharti ya fasili ya (2) na (3) ya kanuni hii yanaweza kutumiwa na Katibu wakati wa kikao cha kumchagua Spika.

(6) Baraza halitazuilika kufanya shughuli zake kwa sababu ya nafasi yoyote iliyowazi katika Baraza.

Mahudhurio  
katika  
Baraza na  
Kamati  
zake.

**79.-**(1) Kutakuwa na Orodha ya Mahudhurio itayosainiwa na Wajumbe katika kila siku ya kikao.

(2) Mjumbe wa Baraza atastahiki kulipwa posho ya kikao cha siku pamoja na posho la kujikimu kama itakavyoamuliwa na Kamati ya Uongozi na Shughuli za Baraza, ambapo posho ya kikao cha siku itatolewa kwa Mjumbe aliyehuduria kikao na kusaini mahudhurio.

(3) Mjumbe atakayeshindwa kuhudhuria Kikao cha Baraza, hatolipwa posho la kikao cha siku hiyo.

(4) Mjumbe ambaye hakuridhika na uamuzi uliofanywa chini fasili ya (3) ya kanuni hii, atawasilisha lalamiko lake kwa Kamati ya Uongozi na Shughuli za Baraza.

(5) Masharti ya fasili za (1), (2) na (3) za kanuni hii, hayatatumika kwa Wajumbe wenye dharura zifuatazo wakati wa shughuli za Baraza au Kamati:

(a) Mjumbe mwanamke aliyejifungua akiwa katika kipindi cha ndani ya siku tisini tokea kujifungua, isipokuwa kama mtoto aliyejifungua atafariki ndani ya siku tisini atapewa wiki sita tokea siku aliyojifungua;

(b) Mjumbe mwanamke aliyefiwa na mume wake akiwa katika kipindi cha eda;

(c) Mjumbe mwanaume akiwa katika kipindi cha siku tatu za vikao tokea alipojifungua mke wake isipokuwa kama mtoto aliyezaliwa atafariki;

- (d) dharura itakayoamuliwa na Kamati ya Uongozi na Shughuli za Baraza; na
- (e) dharura nyengine yoyote itakayokubaliwa na Spika.
- (6) Mjumbe yejote atakayekosa kuhudhuria vikao vya Baraza au Kamati visiviyopungua vitano mfululizo bila ya kutoa taarifa kwa Spika au kwa Mwenyekiti wa Kamati na kukubaliwa, Mjumbe huyo atatangazwa kwenye Baraza kwamba ana tabia ya utoro na taarifa hiyo itapelekwa kwenye chama chake cha siasa.

**80.-**(1) Kwa kuzingatia masharti ya kifungu kidogo cha (1) cha kifungu cha 83 cha Katiba, mambo yote yanayohitaji kuamuliwa na Baraza yataamuliwa kwa kufuata mapendelekezo ya Wajumbe walio wengi waliohuduhuria na kupiga kura katika Baraza. Uamuzi  
kwa wingi  
wa kura.

(2) Endapo kuna mtu yejote ameshiriki katika Shughuli ya Baraza na kupiga kura bila ya kuwa na haki ya kufanya hivyo, maamuzi yaliyofanywa yatabaki kuwa ni halali.

**81.** Kwa kuzingatia masharti ya kifungu kidogo cha (2) cha kifungu cha 83 cha Katiba, mtu atakayekuwa anaongoza Kikao cha Baraza: Kura ya  
Spika.

- (a) ikiwa ni Spika, atakuwa na kura ya uamuzi na siyo kura ya asili; au
- (b) ikiwa siye Spika atakuwa na kura ya uamuzi pamoja na kura ya asili.

**82.(1)** Baada ya kumaliza majadiliano juu ya suala fulani iwe katika hali yake ya mwanzo au limebadilishwa kama itakavyokuwa, suala hilo litatolewa na Spika kwa ajili ya uamuzi wa Baraza kwa kusema “wale wanaokubali waoneshe mikono yao juu” na hapo Spika atahesabu idadi ya Wajumbe walioonesha mikono kukubali halafu atasema “wale wasiokubali waoneshe mikono yao juu”, Spika tena atahesabu idadi ya Wajumbe walioonesha mikono yao juu kukataa. Kupiga  
kura katika  
Baraza.

(2) Uamuzi utatolewa kwa kufuata wingi wa kura za Wajumbe za kukubali au kukataa jambo na matokeo yatatangazwa na Spika kwa kusema “Inavyoonekana waliokubali wameshinda” au “Inavyoonekana wasiokubali wameshinda” au kama itakavyokuwa, baada ya kusema hivyo Spika ataruhusu muda upite ili kutoa nafasi kuhakikisha uamuzi wa Baraza juu ya jambo hilo, na katika muda huo Mjumbe yejote anaweza kusimama mahali alipo na kusema “kura zihesabiwe”.

(3) Endapo hakuna Mjumbe aliyedai hivyo, Spika atatoa kauli ya uamuzi wa mwisho kwa kusema “Waliokubali wameshinda” au “Wasiokubali wameshinda”.

(4) Endapo Mjumbe yejote atadai kura zihesabiwe, Spika ataamuru kura zihesabiwe.

(5) Endapo Spika ataamuru kuwa kura zihesabiwe, Katibu atamtaka Mhudumu kupiga kengele ya kuhesabu kura kwa muda wa dakika mbili na baada ya muda huo, Katibu ataanza kuchukua kura, kwa kuita Mjumbe mmoja mmoja kwa jina lake na kuuliza anapiga kura yake upande gani na kuiandika kura hiyo ipasavyo, na baadae Katibu atatangaza idadi ya wale wanaokubali na ya wale wasiokubali na Spika atatangaza rasmi matokeo ya hesabu hiyo ya kura.

(6) Hoja ya kupitisha Mswada wa mabadiliko ya Katiba itaamuliwa kwa kuungwa mkono na idadi isiyopungua theluthi mbili ya Wajumbe wote wa Baraza wakati Mswada utakaposomwa kwa Mara ya Kwanza na kwa Mara ya Pili.

(7) Kura zinapohesabiwa, orodha kamili itatengenezwa inayoonesha namna kura zilivyopigwa na itaingizwa katika Kitabu cha Shughuli za Baraza kwa ajili ya kuweka kumbukumbu rasmi ya uamuzi wa Baraza.

## **SEHEMU YA NANE**

### **UTARATIBU WA MISWADA NA UTUNGAJI WA SHERIA**

**83.-**(1) Kutakuwa na Mswada wa Serikali, Kamati au Mjumbe ambao utawasilishwa ndani ya Baraza kwa mujibu wa masharti ya Kanuni hizi na utajumuisha Mswada wa Dharura.

Aina za  
Mswada na  
uwasilish-  
waji wake.

(2) Mswada wa Serikali ni Mswada unaowasilishwa katika Baraza na Waziri au Mwanasheria Mkuu.

(3) Mswada wa Kamati ni Mswada unaowasilishwa katika Baraza na Mwenyekiti wa Kamati ya Kudumu ya Baraza au Mjumbe ye yote wa Kamati ya Kudumu ya Baraza kwa niaba ya Kamati hiyo.

(4) Mswada wa Mjumbe ni Mswada unaowasilishwa katika Baraza na Mjumbe ye yote ambaye si Waziri au Mwanasheria Mkuu.

**84.-**(1) Mswada wa Serikali utatangazwa katika Gazeti katika Toleo angalau moja, lakini iwapo matoleo yatazidi moja, kuwepo na muda usiopungua siku saba kati ya Toleo la Kwanza na la Pili.

Utangazaji  
wa  
Mswada wa  
Serikali.

(2) Tangazo la kwanza la Mswada wa Serikali litatolewa angalau siku ishirini na moja kabla ya Mswada huo kusomwa kwenye Baraza kwa Mara ya Kwanza na litakuwa linaonesha Mswada mzima, pamoja na maelezo yaliyotiwa saini na Waziri yanayotaja madhumuni na sababu za Mswada huo.

(3) Mswada wa Serikali utahesabiwa kuwa umetangazwa kwa Mara ya Pili endapo kutatolewa taarifa katika Gazeti inayotaja jina la Mswada, nambari na tarehe ya Gazeti ambapo Mswada ilitangazwa kwa Mara ya Kwanza, na tarehe ya Mkutano wa Baraza ambapo inakusudiwa kutoa hoja ya Mswada huo kusomwa kwa Mara ya Kwanza.

(4) Haitakuwa lazima kwa Waziri au Mwanasheria Mkuu kutoa taarifa ya Mswada wa Serikali ambao anakusudia

Mswada  
wa Dharura.

kuuwasilisha kwenye Baraza iwapo Mswada umekwisha kutangazwa katika Gazeti.

**85.** Endapo shahada iliyotiwa saini na Rais itawasilishwa mbele ya Baraza na Waziri akitamka kwamba Mswada wa Serikali ni wa dharura na wa haraka sana ambapo haiwezekani kutimiza masharti ya kanuni ya 84 ya Kanuni hizi, basi masharti hayo yatawekwa kando kwa ajili ya Mswada huo na kanuni ya 84 ya Kanuni hizi itasita kutumika bila ya hoja yoyote.

Mswada wa  
Kamati na  
Mswada  
wa  
Mjumbe.

**86.-**(1) Kamati yoyote ya Kudumu ya Baraza inaweza kuuwasilisha kwenye Baraza Mswada wa Kamati.

(2) Mjumbe ye yoyote anaweza kuuwasilisha kwenye Baraza Mswada wa Mjumbe ambao si kwa maslahi yake binafsi.

(3) Taarifa ya hoja ya kuuwasilisha Mswada wa Kamati au Mswada wa Mjumbe itawasilishwa kwa Spika na itaeleza pamoja na mambo mengine jina la Mswada unaopendekezwa, madhumuni na sababu za Mswada huo.

(4) Mswada wa Kamati au wa Mjumbe utatangazwa kwenye Gazeti kama inavyotakiwa kwa Miswada ya Serikali kufuatana na masharti ya fasili za (1), (2) na (3) za kanuni ya 84 ya Kanuni hizi, na madhumuni na sababu yatatiwa saini na Mwenyekiti wa Kamati au Mjumbe huyo anayehusika, isipokuwa kwamba, Katibu ataratibu shughuli ya utangazwaji wa Mswada wa Kamati na Mjumbe.

(5) Baada ya Mswada kutangazwa katika Gazeti, Mwenyekiti wa Kamati au Mjumbe anaweza kutoa taarifa kwa Spika kuwa anakusudia kuuwasilisha Mswada huo kwenye Baraza, baadae utaratibu unaotumika kwa mujibu wa Kanuni hizi kuhusu hatua nyenginezo za kushughulikia Mswada huo zitafuatwa.

Kuwapatia  
Wajumbe  
nakala ya  
Mswada.

*Kanuni za Kudumu za Baraza la Wawakilishi*

**87.** Katibu wa Baraza ndiye atakayekuwa na wajibu wa kumpatia kila Mjumbe nakala moja ya kila Mswada uliotangazwa katika Gazeti kwa kufuata kanuni za 84 na 86 za Kanuni hizi na

atajitosheleza kwamba Mswada huo una maneno ya pembeni katika kila kifungu.

**88.-**(1) Kwa mujibu wa Kanuni hizi, Mswada wowote wa Sheria ambao umetangazwa kwenye Gazeti unaweza kuwasilishwa kwenye Baraza kufuatana na Orodha ya Shughuli za Baraza ili usomwe kwa Mara ya Kwanza na katika hatua hiyo Waziri, Mwenyekiti wa Kamati au Mjumbe atasoma jina refu la Mswada unaohusika, bila ya hoja yoyote kutolewa kwa ajili hiyo.

(2) Hakutakuwa na mjadala wowote wakati wa Mswada huo kusomwa kwa Mara ya Kwanza.

(3) Kila Mswada wa Sheria utakaowasilishwa kwenye Baraza utasomwa kwa Mara ya Kwanza katika Mkutano wa Baraza utakaowasilishwa na utasomwa kwa Mara ya Pili na kwa Mara ya Tatu katika Mkutano wa Baraza unaofuata.

(4) Bila ya kuathiri masharti ya fasili ya (3) ya kanuni hii, Mswada wa dharura uliowasilishwa kwenye Baraza kwa mujibu wa masharti ya kanuni ya 85 ya Kanuni hizi, unaweza kusomwa kwa Mara ya Kwanza, Mara ya Pili na Mara ya Tatu ndani ya Mkutano mmoja wa Baraza.

(5) Kwa madhumuni ya kupata maoni ya wananchi kuhusiana na Mswada wa sheria unaotaka kupilishwa na Baraza, kila Mjumbe atatakiwa kurudi kwa wananchi kukusanya maoni yao, kabla ya kuanza kwa majadiliano ya Mswada husika.

**89.-**(1) Mswada uliosomwa kwa Mara ya Kwanza chini ya fasili ya (1) ya kanuni ya 88 ya Kanuni hizi, utapelekwa na Spika kwenye Kamati husika na Kamati hiyo itaupitia Mswada huo, isipokuwa Mswada wa Kamati utachunguzwa na Wizara husika.

(2) Mswada wa Dharura unaweza kupelekwa kwenye Kamati husika mapema iwezekanavyo hata kama haujasomwa kwa Mara ya Kwanza.

(3) Endapo Waziri, Mwenyekiti wa Kamati au Mjumbe anayehusika atatoa taarifa kwa Spika kwamba hakusudii kusoma kwa Mara ya Pili Mswada uliokwisha kusomwa kwa Mara ya Kwanza, Spika anaweza kuchelewesha kuupeleka Mswada huo katika Kamati au Wizara inayohusika hadi wakati atakaofikiria kuwa unafaa.

(4) Mswada wa Serikali uliowasilishwa kwenye Kamati husika kwa mujibu wa fasili za (1) na (2) za kanuni hii, utawasilishwa na Waziri au Naibu Waziri.

(5) Kamati iliyopelekewa Mswada itatoa matangazo kwa ajili ya kupokea maoni kuhusiana na Mswada husika kwa lengo la kuisaidia katika uchambuzi wa Mswada huo.

(6) Kamati iliyopelekewa Mswada kwa mujibu wa kanuni hii, inaweza kumualika mtu yejote afike kutoa maoni yake mbele ya Kamati hiyo kwa lengo la kuisaidia katika uchambuzi wake kwa Mswada unaohusika.

(7) Mkurugenzi wa Idara ya Ushauri wa Kisheria wa Baraza au Mwakilishi wake atahudhuria katika Mkutano wa kila Kamati ya Kudumu inaposhughulikia Mswada wa Sheria.

(8) Mwanasheria Mkuu au Mwakilishi wake atahudhuria katika Mkutano wa kila Kamati ya Kudumu itakapokuwa inaufikiria Mswada wa Sheria wa Serikali.

Mswada  
kufanyiwa  
mabadi-  
liko.

**90.-**(1) Kamati iliyopelekewa Mswada kwa mujibu wa kanuni ya 89 ya Kanuni hizi, haitakuwa na uwezo wa kufanya mabadiliko katika Mswada huo lakini inaweza kumshauri Waziri anayehusika na Mswada huo kufanya mabadiliko katika Mswada wakati ukishafika kwenye Baraza isipokuwa kwamba, masharti ya kanuni hii pia yatatumika kwa Mswada wa Kamati na Mswada wa Mjumbe.

(2) Wakati Kamati inaujadili Mswada husika, Waziri au Mwenyekiti wa Kamati au Mjumbe anayehusika anataka kufanya

mabadiliko katika Mswada huo kutokana ama na kanuni hii au na sababu nyengine yoyote:

- (a) Waziri anaweza kufanya orodha ya mabadiliko au atamjuilisha Mwanasheria Mkuu atayariske Mswada mpya uliorekebishwa; au
- (b) Mwenyekiti wa Kamati au Mjumbe anayehusika anaweza kufanya Orodha ya Mabadiliko au kutayarisha Mswada mpya uliorekebishwa.

(3) Mswada uliotayarishwa upya kwa mujibu wa fasili (2) ya kanuni hii, utachapishwa upya katika Gazeti.

(4) Katibu atampatia kila Mjumbe ama:

- (a) nakala ya Mswada uliochapishwa upya, unaoonesha wazi mabadiliko yanayokusudiwa kufanywa; au
- (b) nakala ya Mswada unaorekebishwa pamoja na orodha ya mabadiliko yanayokusudiwa kufanywa.

**91.-**(1) Baada ya Mwenyekiti wa Kamati iliyopelekewa Mswada chini ya kanuni ya 89 ya Kanuni hizi kumaliza kuujadili Mswada, atamuarifu Spika na Spika anaweza kuagiza Mswada huo uwekwe katika Orodha ya Shughuli za Baraza kwa ajili ya kusomwa kwa Mara ya Pili siku ambayo Spika ataaelekeza.

(2) Hoja ya kutaka Mswada usomwe kwa Mara ya Pili itakuwa kama ifuatavyo:

*“Kwamba Mswada wa Sheria ya ..... sasa usomwe kwa Mara ya Pili” au kadri itakavyokuwa, “kwamba Mswada wa Sheria ya ..... kama ulivyobadilishwa kwa mujibu wa nakala mpya iliyochapishwa tarehe ..... au orodha ya mabadiliko iliyoingizwa katika au iliyoambatanishwa kwenye Orodha ya Shughuli za Baraza sasa usomwe kwa Mara ya Pili”.*

(3) Kwa kuzingatia masharti ya fasili ya (2) ya kanuni hii, Spika atamruhusu Waziri, Mwenyekiti wa Kamati au Mjumbe anayehusika kusoma kwa Mara ya Pili Mswada wake kwenye Baraza.

(4) Baada ya Mswada kuwasilishwa kwa kusomwa kwa Mara ya Pili, endapo ni Mswada wa Serikali au Mswada wa Mjumbe, Mwenyekiti wa Kamati iliyoshughulikia Mswada atatoa taarifa kuhusu maoni ya Kamati hiyo juu ya Mswada huo kama atahitaji kufanya hivyo na endapo ni Mswada wa Kamati, Waziri anayehusika atatoa maoni ya Serikali kuhusu Mswada huo.

(5) Wakati akiwasilisha maoni ya Kamati, Mwenyekiti wa Kamati au Mjumbe mwengine ye yote anayewasilisha kwa niaba ya Mwenyekiti wa Kamati, anaweza kutaja majina ya Wajumbe walio wachache ambao maoni yao yanatofautiana na maoni ya Wajumbe wengi wa Kamati endapo yatakuwepo.

(6) Mara baada ya kumaliza kutoa maoni kwa niaba ya Kamati kwa mujibu wa fasili ya (4) ya kanuni hii, Mwenyekiti wa Kamati au Mjumbe ye yote ali yewasilisha maoni ya Kamati, atakuwa na haki ya kupata muda wa ziada sawa na muda anaopata Mjumbe mwengine kwa ajili ya kutoa mchango wake binafsi katika mjadala unaoendelea na haki kama hiyo atapewa Waziri husika ali yeta maoni ya Serikali kwa Mswada wa Kamati au Mjumbe.

(7) Mjadala wakati wa Mswada kusomwa kwa Mara ya Pili utahusu ubora na misingi ya Mswada huo tu, lakini Mjumbe ye yote anaweza wakati wa mjadala huo:

- (a) kumuomba Waziri au Mjumbe anayehusika afanye mabadiliko katika Mswada huo ambayo atayaainisha;
- (b) kutoa taarifa ya mdomo kwamba anakusudia kuwasilisha hoja ya mabadiliko kwenye Mswada huo wakati wa Kamati ya Baraza Zima huku akitaja kifungu cha Mswada anachokikusudia; au

(c) kuwasilisha mapendekezo yake kwa Katibu kabla ya Mjumbe huyo hajaanza kutoa mchango wake kwenye Baraza na Katibu anaweza kuyagawa mapendekezo hayo kwa Wajumbe wote, isipokuwa endapo mabadiliko yanayopendekezwa yatalazimu mabadiliko yafanywe kwenye vifungu vyengine nya Mswada huo, Mjumbe anayetoa mapendekezo anaweza pia kupendekeza mabadiliko yafanywe kuhusiana na vifungu vyengine hivyo.

(8) Mjumbe aliyewasilisha mapendekezo yake chini ya aya ya (c) ya fasili ya (7) ya kanuni hii, atapatiwa na Spika nafasi ya kuchangia na katika mchango wake atafafanua marekebisho anayoyapendekeza yafanywe, isipokuwa kwamba, kwa idhini ya Spika, anaweza kubadilisha baadhi ya maneno yaliyomo kwenye taarifa yake ya mabadiliko au kuondoa taarifa yake ya mapendekezo ya mabadiliko wakati wowote kabla ya kutoa mchango wake kwenye Baraza.

**92.-**(1) Wakati Mswada unasomwa kwa Mara ya Pili haitakuwa halali katika hatua hii kutoa hoja ya kufanya mabadiliko katika hoja, isipokuwa kwa madhumuni ya:

Kuzuia  
Mswada  
Kusomwa  
kwa Mara  
ya Pili.

(a) kuahirishwa kusomwa kwa Mara ya Pili kwa Mswada mpaka baada ya muda fulani utakaotajwa kwa kutamka;

*“Kwamba Mswada huu sasa uahirishwe na usomwe kwa Mara ya Pili baada ya .....” (Kwa kutaja muda unaopendekezwa*

au

(b) kuzuia Mswada kusomwa kwa Mara ya Pili kwa kutamka;

*“Kwamba Baraza hili likatae Mswada huu kusomwa kwa Mara ya Pili kwa sababu zifuatazo .....” (na kutajwa sababu hizo).*

Kujibu  
hoja  
zinazohusu  
Mswada.

(2) Ni lazima kwa Mtoa hoja ya kuuzuia Mswada kusomwa kwa Mara ya Pili atoe kwa Katibu taarifa ya hoja angalau siku moja kabla ya hoja hiyo kuletwa kwenye Baraza.

**93.-**(1) Endapo Mswada umesomwa kwa Mara ya Pili na majadiliano kuhusu ubora wa misingi ya Mswada huo yamemalizika, Waziri, Mwenyekiti wa Kamati au Mjumbe aliyehusika na Mswada huo, atatoa taarifa kwa Spika kwamba atajibu hoja za Wajumbe mara tu baada ya michango ya Wajumbe au baada ya kupita muda usiopungua saa sita.

(2) Wakati utakapofika wa kujibu hoja za Wajumbe, Spika atamwita Waziri, Mwenyekiti wa Kamati au Mjumbe anayehusika ili ajibu hoja hizo.

(3) Wakati Waziri, Mwenyekiti wa Kamati au Mjumbe anayehusika anajibu hoja za Wajumbe:

(a) atatamka ni mabadiliko gani anayokubaliana nayo kati ya yale yaliyopendekezo wakati wa majadiliano na ni kwa sababu gani hakubaliani na baadhi ya mapendekezo;

(b) endapo Waziri, Mwenyekiti wa Kamati au Mjumbe ataona kwamba anahitaji mapendekezo yoyote ya mabadiliko yafikishwe kwenye Kamati, anaweza kuomba Mswada huo upelekwe kwenye Kamati iliyopitia Mswada huo au Kamati nyengine yoyote itakayoamuliwa na Spika.

Mswada  
kurudishwa  
kwenye  
Kamati au  
Wizara.

**94.-**(1) Endapo Mswada umesomwa kwa Mara ya Pili na Waziri, Mwenyekiti wa Kamati au Mjumbe anayehusika amemuomba Spika, ama kwa mujibu wa kanuni ya 93 ya Kanuni hizi au wakati wowote kabla ya Mswada haujapelekwa katika Kamati ya Baraza Zima, kuupeleka tena Mswada katika Kamati au Wizara inayohusika, Spika atafanya hivyo.

(2) Endapo Mswada umepelekwa tena kwenye Kamati au Wizara inayohusika, Mjumbe ye yote ambaye wakati wa Mswada kusomwa kwa Mara ya Pili alimuomba Waziri, Mwenyekiti wa Kamati au Mjumbe anayehusika kufanya mabadiliko katika Mswada na Mjumbe ye yote ambaye, kwa mujibu wa kanuni ya 91 ya Kanuni hizi ametoa kwa Katibu taarifa kwa maandishi ya kutaka kufanya mabadiliko katika Mswada, anaweza kuhudhuria katika Mkutano wa Kamati au Wizara na kushiriki katika majadiliano akielezea mabadiliko anayoyapendekeza, isipokuwa kama ni Mjumbe wa Kamati hiyo, hatakuwa na haki ya kupiga kura katika azimio au uamuzi wowote wa Kamati hiyo.

(3) Kamati au Wizara iliyopelekwa Mswada kwa mujibu wa kanuni hii, itakutana mapema iwezekanavyo na kufikiria mabadiliko yaliyopendekezwa.

(4) Kamati au Wizara inayohusika haitakuwa na mamlaka ya kufanya mabadiliko katika Mswada ulioperekwa kwake kwa mujibu wa kanuni hii, lakini inaweza kumuomba Waziri au Mwenyekiti wa Kamati au Mjumbe kadri itakavyokuwa afanye mabadiliko maalumu katika Mswada huo kwenye Baraza au kutoa taarifa maalumu katika Baraza kuhusu Mswada huo.

(5) Baada ya kumaliza kazi zake, Kamati au Wizara iliyoufikiria Mswada kwa Mara ya Pili itapeleka taarifa yake kwa Spika ili upangiwe muda wa kujadiliwa kwenye Baraza ambapo utawasilishwa na Mwenyekiti wa Kamati hiyo au Mjumbe mwengine kwa niaba yake au Waziri husika.

(6) Baada ya Taarifa hiyo kuwasilishwa kwenye Baraza na majadiliano kumalizika, Waziri, Mwenyekiti wa Kamati au Mjumbe anayehusika atapewa nafasi ya kukamilisha majumuisho ya majadiliano kuhusu Mswada huo.

**95.-**(1) Baada ya majumuisho ya Waziri, Mwenyekiti wa Kamati au Mjumbe anayehusika, Spika atalihoji Baraza kuhusu Mswada huo na baada ya uamuzi, Baraza litaingia katika Kamati ya Baraza Zima itakayo julikana kama Kamati ya Kutunga Sheria Mswada  
katika  
Kamati ya  
Kutunga  
Sheria.

ili kuchunguza vifungu mbali mbali vilivyomo katika Mswada huo.

(2) Kwa kuzingatia masharti ya fasili ya (1) ya kanuni hii, masharti na utaratibu uliowekwa na kanuni ya 78 na 118 ya Kanuni hizi utafuatwa.

(3) Kamati ya Kutunga Sheria itajadili na kuitisha au itafanya mabadiliko na kuitisha Mswada kifungu kimoja baada ya chengine kwa kura ya kutoa sauti, isipokuwa kwamba Mwenyekiti anaweza kutoa kwa Kamati ya Kutunga Sheria suala kuhusu kujadiliwa kwa kundi moja lenye vifungu kadhaa au viliviyomo katika sehemu moja ya Mswada.

(4) Mabadiliko yote yaliyopendekezwa na Waziri, Mwenyekiti wa Kamati au Mjumbe anayehusika ili yafanywe katika Mswada wakati uliposomwa kwa Mara ya Pili, pamoja na mabadiliko yaliyopendekezwa na Mjumbe mwengine ye yeyote kwa Waziri, Mwenyekiti wa Kamati au Mjumbe ye yeyote anayehusika wakati wa majadiliano ya hoja, yatajadiliwa na kuitishwa au kukataliwa au yatajadiliwa, yatabadilishwa na kuitishwa na Kamati ya Kutunga Sheria katika hatua hii kwa kufuata utaratibu uliowekwa na Kanuni hizi kwa ajili ya kushughulikia hoja na hoja za kufanya mabadiliko katika hoja.

Hoja ya  
kuitishwa  
Mswada.

**96.-**(1) Baada ya Kamati ya Kutunga Sheria kuwa imemaliza shughuli za kufikiria Mswada kwa mujibu wa kanuni ya 95 ya Kanuni hizi, Waziri, Mwenyekiti wa Kamati au Mjumbe anayehusika na Mswada huo, atatoa taarifa kwenye Baraza kwamba:

*“Kwa kuwa Kamati ya Kutunga Sheria imeufikiria  
Mswada huu na kuukubali bila ya marekebisho”.*

au kama kuna marekebisho yaliyofanywa, kwamba:

*“Kwa kuwa Kamati ya Kutunga Sheria ilifikiria  
Mswada huu na kuukubali pamoja na marekebisho yake”.*

na baadae atasema kuwa naomba kutoa hoja kwamba Mswada huu ukubaliwe rasmi na Baraza.

(2) Spika atalihoji Baraza juu ya kuikubali hoja ya Waziri, Mwenyekiti wa Kamati au Mjumbe anayehusika ya kuliomba Baraza liukubali rasmi Mswada uliopitishwa kwenye Kamati ya Kutunga Sheria na hoja hiyo itaamuliwa.

**97.-**(1) Baada ya Mswada kukubaliwa, Waziri, Mwenyekiti wa Kamati au Mjumbe anayehusika atatoa hoja ya kuomba Mswada usomwe kwa Mara ya Mswada  
kusomwa  
kwa Mara  
ya Tatu. Tatu na hoja itaamuliwa.

(2) Hoja ya kutaka Mswada usomwe kwa Mara ya Tatu itakuwa katika maneno yafuatayo:

*“Kwamba Mswada wa ..... (Jina lake) sasa  
ukubaliwe kusomwa kwa Mara ya Tatu.”*

au kama kuna marekebisho yaliyofanywa katika Mswada na Waziri, Mwenyekiti wa Kamati au Mjumbe anayehusika ameyakubali atasema maneno yafuatayo:

*“Kwamba Mswada ..... (Jina lake) pamoja na  
marekebisho yake sasa ukubaliwe kusomwa kwa Mara ya Tatu.”*

(3) Endapo kutajitokeza majadiliano juu ya hoja iliyoelezwa chini ya fasili ya (2) ya kanuni hii, majadiliano hayo yatahusu maneno ya hoja husika.

(4) Baada ya hoja ya Mswada kusomwa kwa Mara ya Tatu kukubaliwa, Katibu atasoma jina kamili la Mswada huo na baadae kutoa taarifa kama ifuatavyo:

*“Napenda kutoa taarifa kwamba Mswada wa (atataja  
jina la Mswada kwa kirefu) umepitishwa rasmi na  
Baraza la Wawakilishi la Zanzibar”.*

Kuuondoa  
Mswada  
katika  
Baraza.

**98.** Waziri, Mwenyekiti wa Kamati au Mjumbe yeote anayewasilisha Mswada, anaweza kutoa hoja kwamba Mswada uondolewe wakati wowote kabla ya Baraza kuhojiwa kutoa uamuzi wake kwa mujibu wa kanuni ya 96 ya Kanuni hizi.

Kibali cha  
Rais  
kukamilisha  
Mswada na  
kuwa  
Sheria.

**99.-**(1) Baada ya Mswada kusomwa kwa Mara ya Tatu, utahesabiwa kuwa umepitishwa, na nakala safi za Mswada huo kama ulivyopitishwa zitatayarishwa na Spika atapeleka nakala moja wapo kwa Rais ndani ya siku thelathini ili Rais atoe kibali chake au maagizo mengine atakayoona yanafaa.

(2) Baada ya Mswada uliopitishwa na Baraza kupata kibali cha Rais na kuwa Sheria, taarifa juu ya hatua ya kusainiwa Sheria hiyo na Rais itatolewa kama taarifa rasmi ya Spika kwenye Mkutano unaofuata wa Baraza.

(3) Endapo itatokea Mswada kurejeshwa kwa sababu zilizotajwa chini ya fasili ya (1) ya kanuni hii, Baraza litalazimika kujadili sababu zilizoainishwa na Rais kwa kuzingatia masharti ya kifungu cha 79 Katiba.

### **SEHEMU YA TISA UTARATIBU WA KUPITIA BAJETI NA KUTUNGA SHERIA YA MAMBO YA FEDHA**

Baraza  
kujadili  
Mwelekeo  
wa Mpango  
wa Taifa.

**100.-**(1) Katika Mkutano wa mwezi wa Januari au wakati mwengine wowote, Baraza linaweza kujadili na kushauri kuhusu Mapendekezo ya Mwelekeo wa Mpango wa Taifa unaokusudiwa kutekelezwa na Serikali katika mwaka wa fedha unaofuata utakaowasilishwa na Waziri mwenye dhamana ya mambo ya Mipango.

(2) Pamoja na mambo mengine, taarifa kuhusu Mwelekeo wa Mpango wa Taifa itakayotolewa kwa mujibu wa fasili ya (1) ya kanuni hii, itajumuisha tathmini ya hali ya uchumi kwa mwaka wa fedha unaoendelea, matarajio kwa mwaka wa fedha unaofuata, malengo katika ukusanyaji wa kodi kwa mwaka wa fedha unaofuata pamoja na taarifa nyengine zinazolingana na hizo.

(3) Kabla ya kuwasilishwa kwenye Baraza, Mapendekezo ya Mwelekeo wa Mpango wa Taifa yatawasilishwa kwanza kwenye Kamati ya Bajeti.

(4) Kamati ya Bajeti itawaalika Wenyeviti wa Kamati au Makamu Wenyeviti pamoja na wadau kutoa maoni yao kuhusu Mwelekeo wa Mpango wa Taifa na Bajeti Kuu ya Serikali.

**101.-**(1) Makadirio ya Wizara kwanza yatajadiliwa na Kamati husika kabla ya kujadiliwa na Baraza na hayatopelekwa kwenye Baraza wala Kamati ya Matumizi mpaka Mwenyezeki wa Kamati iliopewa kazi hiyo atakapomuarifu Spika kwamba Kamati yake imemaliza kuyafikiria Makadirio hayo.

(2) Katika kutekeleza masharti ya fasili ya (1) ya kanuni hii, nyaraka yoyote inayohusiana na Makadirio ya Wizara itapatiwa Kamati husika angalau siku mbili kabla ya Makadirio hayo kujadiliwa na Kamati, isipokuwa kwamba, masharti haya yatatumika kwa taarifa mbali mbali zinazohusiana na kazi za Kamati.

(3) Wakati wa kujadiliwa Makadirio hayo Kamati husika itakuwa na mamlaka ya kumshauri Waziri na kutoa mapendekezo yake kuhusiana na Makadirio husika.

(4) Kwa madhumuni ya kupata maoni ya wananchi kuhusiana na Mswada wa Makadirio ya Matumizi ya Fedha kwa mwaka unaotaka kuitishwa na Baraza, kila Mjumbe atatakiwa kurudi kwa wananchi kukusanya maoni yao, kabla ya kuanza kwa majadiliano.

**102.-**(1) Pamoja na masharti yaliyomo katika kifungu cha 106 cha Katiba, Makadirio ya Mwaka ya Mapato na Matumizi ya Fedha za Serikali katika Kanuni hizi, yataitwa kwa kifupi “Makadirio”.

(2) Masharti ya kanuni ya 84, 86 na 93 za Kanuni hizi, yanayohusu utangazaji wa Miswada katika Gazeti na uchunguzi *Kanuni za Kudumu za Baraza la Wawakilishi*

Makadirio  
kuwasilish-  
wa kwenye  
Kamati.

wa vifungu baada ya kupita saa sita hayatatumika katika Mswada wowote wa Makadirio.

Majadiliano ya Makadirio ya Wizara **103.-**(1) Upitishaji wa Makadirio ya Wizara mbali mbali kwenye Baraza, utaanza mwazoni mwa mwezi wa Mei.

(2) Katibu atapatiwa nyaraka yoyote inayohusiana na Makadirio ya Wizara angalau siku mbili kabla ya Makadirio hayo kujadiliwa na Baraza, isipokuwa kwamba, masharti haya yatatumika kwa taarifa mbali mbali zitakazowasilishwa ndani ya Baraza.

(3) Mjadala katika Baraza kuhusu Makadirio utaanza kwa Hotuba ya Makadirio ya Ofisi ya Makamu wa Pili wa Rais na kufuatiwa na Hotuba za Makadirio za Wizara nyengine zote kwa utaratibu utakaopangwa na Spika baada ya kushauriana na Kamati ya Uongozi na Shughuli za Baraza.

(4) Bila ya kujali masharti ya fasili ya (3) ya kanuni hii, Kiongozi wa Shughuli za Serikali katika Baraza au Waziri anayehusika na Wizara hiyo atawasilisha utekelezaji wa Bajeti wa mwaka uliopita wa Serikali, isipokuwa kwamba, Waziri anayehusika na Wizara hiyo atawasilisha na kutoa hoja ya Makadirio ya Wizara hiyo.

(5) Waziri anayehusika na uwasilishaji wa hotuba ya Makadirio ya Wizara yake, atawasilisha kwenye Baraza hotuba yake kwa ufupi kwa muda usiozidi saa moja na nusu, endapo muda uliopangwa kwa ajili ya uwasilishaji utamalizika kabla Waziri hajakamilisha Hotuba yake, Waziri atatamka kwamba sehemu ya Hotuba iliyobaki iingizwe katika taarifa rasmi kama ilivyo katika kitabu cha Hotuba.

(6) Baada ya Waziri kuwasilisha Makadirio ya Wizara yake, Mwenyekiti wa Kamati au Mjumbe mwengine ye yote wa Kamati husika atawasilisha maoni ya Kamati kuhusu Makadirio ya Wizara hiyo kwa idhini ya Mwenyekiti wa Kamati hiyo.

(7) Bila ya kuathiri masharti ya kanuni ya 27 ya Kanuni hizi, majadiliano juu ya Makadirio yote yatajadiliwa baada ya kumalizika kipindi cha maswali na kabla ya shughuli nyengine zozote mpaka yatakapomalizika isipokuwa kama itaelekezwa vyenginevyo.

(8) Mjadala kwenye Baraza utakuwa ni wa jumla na mjadala kwenye Kamati ya Matumizi utahusu vifungu mahasusi.

(9) Wakati majadiliano ya kuchangia Hotuba ya Makadirio ya Wizara yanakaribia kumalizika, Spika atatoa taarifa ya majina ya Wajumbe watakaopata nafasi za mwisho za kuchangia ili Wajumbe ambao watakosa nafasi za kuzungumza kwenye Baraza waweze kutoa michango yao kwa maandishi.

(10) Baada ya majadiliano kumalizika, Waziri anayehusika na uwasilishaji wa Hotuba ya Makadirio yake, atapewa nafasi ya kujibu hoja zinazotokana na michango ya Wajumbe kwa muda usiozidi saa moja.

**104.-**(1) Bajeti Kuu ya Serikali itawasilishwa na Waziri mwenye dhamana na mambo ya fedha mbele ya Kamati ya Bajeti mwishoni mwa mwezi wa Aprili.

Bajeti Kuu  
ya Serikali  
kupitiwa na  
Kamati.

(2) Baada ya Bajeti Kuu ya Serikali kuwasilishwa mbele ya Kamati ya Bajeti, Kamati hiyo itaahirisha shughuli zake kwa muda wa siku moja ili kutoa nafasi kwa Wajumbe wa Kamati hiyo kuyapitia kwa makini zaidi makadirio hayo kabla ya kuanza kujadiliwa.

(3) Kamati ya Bajeti itapokea maoni ya Wenyeviti wa Kamati au Makamu Wenyeviti pamoja na Wadau kuhusu utekelezaji wa bajeti ya mwaka unaomalizika kwenye Wizara mbali mbali na matarajio ya Kamati za Kudumu kuhusu bajeti ijayo.

(4) Kamati ya Bajeti itachunguza na kufanya uchambuzi wa Bajeti Kuu ya Serikali inayopendekezwa kwa kutathmini  
*Kanuni za Kudumu za Baraza la Wawakilishi*

Muda wa  
Kufikiria  
Makadirio.

utekelezaji wa bajeti ya mwaka unaomalizika na Mapendekezo ya Makadirio ya mwaka unaofuata.

**105.** Siku arubaini za kazi zitawekwa kwa ajili ya Baraza kushughulikia Makadirio ya kila Wizara pamoja na Bajeti Kuu ya Serikali, isipokuwa kwamba hoja ya kuongeza muda ikitolewa na ambayo itaamuliwa bila mjadala wala mabadiliko, muda huo unaweza kuongezwa kwa siku ambazo zitatajwa katika hoja yenye, lakini hazitozidi siku tano.

Uwasil-  
ishwaji wa  
Bajeti  
Kuu ya  
Serikali  
katika  
Baraza.

**106.-**(1) Bajeti Kuu ya Serikali itapitishwa na kukubaliwa na Baraza baada ya kupitishwa Makadirio ya kila Wizara.

(2) Siku ya uwasilishaji wa Bajeti Kuu ya Serikali, Waziri anayehusika na mambo ya Mipango atatoa maelezo kuhusu Mwelekeo wa Hali ya Uchumi na Mpango wa Maendeleo kwa jumla mbele ya Baraza.

(3) Waziri anayehusika na mambo ya Fedha atawasilisha Bajeti Kuu ya Serikali kwenye Baraza katika wiki ya pili ya mwezi wa Juni na baada ya uwasilishaji huo Baraza litaahirisha shughuli zake kwa muda wa siku moja ya kazi ili kutoa nafasi kwa Wajumbe kuiflkiria kwa makini Bajeti hiyo kabla ya kuanza kujadiliwa.

(4) Bila ya kujali masharti ya kanuni ya 22 ya Kanuni hizi, Bajeti Kuu ya Serikali itawasilishwa kwenye Baraza saa kumi kamili za jioni.

(5) Kabla ya mjadala kuhusu hotuba ya Bajeti Kuu ya Serikali kuanza, Mwenyekiti wa Kamati ya Bajeti au Mjumbe mwengine wa Kamati kwa niaba ya Mwenyekiti wa Kamati atawasilisha maoni ya Kamati juu ya Bajeti hiyo.

(6) Siku, muda na saa iliotajwa katika kanuni hii, inaweza kubadilishwa na Kamati ya Uongozi na Shughuli za Baraza kama itakavyoona inafaa.

(7) Majadiliano juu ya Bajeti Kuu ya Serikali hayatazidi siku tano bila ya kuhesabu muda atakaochukua mtoa hoja kutoa hoja na hotuba ya majibu na siku za mapumziko.

**107.-**(1) Hoja ya kupunguza fungu la Makadirio itatolewa wakati kifungu kinachohusika cha fungu hilo kitakapokuwa kinajadiliwa na Kamati ya Matumizi kwa namna ifuatayo: Hoja ya kupunguza fungu.

- (a) kwa kutoa shilingi moja ikiwa ni ishara ya kutoafiki matumizi ya kifungu maalumu; au
- (b) kwa kupunguza kiasi fulani cha fedha ikiwa ni ishara ya kutoridhika na jambo maalumu ambalo Mjumbe alilitolea taarifa wakati wa mjadala kwenye Baraza,

isipokuwa taarifa itatolewa kabla ya Kamati ya Matumizi kukaa na majadiliano yatahusu jambo maalumu lililotolewa taarifa.

(2) Bila ya kuathiri masharti ya fasili ya (1) ya kanuni hii, Mjumbe anaweza kuomba ufanuzi au maelezo zaidi katika fungu husika wakati litakapofikiwa na Kamati ya Matumizi.

(3) Mjumbe ye yeye anaweza kutoa hoja ya mabadiliko juu ya fungu lolote la Makadirio, isipokuwa hakuna hoja itakayotolewa kwa ajili ya kuongeza katika fungu lolote.

(4) Endapo hoja ya kupunguza shilingi moja au kiasi fulani cha fedha katika fungu lolote imekubaliwa, fungu hilo litakuwa limepitishwa likiwa na upungufu wa shilingi moja au upungufu wa kiasi cha fedha kilichopunguzwa.

**108.-**(1) Mjumbe anaweza kuweka nia ya kuzuia kifungu au programu ndogo ikiwa: Hoja ya kupunguza kifungu au programu ndogo.

- (a) hakuridhika na kiwango cha fedha kilichotengwa katika kifungu au programu ndogo husika;

(b) anataka kuhamishwa kwa fedha kutoka kwenye kifungu au programu ndogo moja kwenda katika kifungu au programu ndogo nyengine; au

(c) hakuridhika na utekelezaji wa kifungu au programu ndogo husika katika mwaka wa fedha unaomalizika.

(2) Bila ya kuathiri masharti ya fasili ya (1) ya kanuni hii, Mwenyekiti, kwa sababu nyengine yoyote atamruhusu Mjumbe kusimamia hoja yake.

Masharti ya  
Hoja ya  
kupunguza  
fungu au  
kifungu.

**109.-**(1) Hoja ya kupunguza fungu au kifungu itatolewa kwa kuzingatia masharti yafuatayo:

- (a) haishutumu tabia au mwenendo wa mtu ye yote ambaye mwenendo wake unaweza kujadiliwa kwa hoja maalumu kwa mujibu wa kanuni ya 62 ya Kanuni hizi;
- (b) haihusiani na jambo ambalo halisimamiwi na Serikali ya Mapinduzi ya Zanzibar;
- (c) haihusiani na jambo ambalo wakati huo liko mbele ya Mahakama yoyote katika Zanzibar au Jamhuri ya Muungano wa Tanzania;
- (d) hairudishi mjadala juu ya jambo ambalo limejibowi kikamilifu katika Mkutano uliopo au Mkutano uliotangulia bila ya sababu za msingi;
- (e) haitaanzisha mjadala juu ya jambo lolote ambalo limepangwa lijadiliwe katika Mkutano huo; na
- (f) haihusiani na jambo lisilo na uzito wowote.

(2) Mjumbe anayetaka kutoa hoja ya kupunguza fungu au kifungu wakati anachangia Makadirio ya Wizara inayohusika na Matumizi hayo:

- (a) ataaeleza nia yake hiyo; na
- (b) ataaeleza kwa ufanuzi na kwa ushahidi kama upo, sababu za nia yake ya kutoa hoja hiyo.

(3) Mjumbe ye yote aliye weka nia ya kupunguza fungu au kifungu wakati wa mjadala ataorodheshwa na Katibu kwenye Fomu Maalumu iliyoandaliwa kwa ajili hiyo.

(4) Hoja ya kupunguza fungu au kifungu chochote itaamuliwa kwa kukubaliwa au kukataliwa na Kamati ya Matumizi.

(5) Endapo hoja ya kupunguza fungu kwa kupunguza kifungu au programu ndogo yoyote imekubaliwa au kukataliwa, hoja nyengine si zaidi ya mbili zinaweza kuruhusiwa kwa Wajumbe wawili tofauti juu ya kupunguza kifungu au programu ndogo hiyo.

**110.-**(1) Baada ya Waziri kufanya majumuisho, na endapo Mjumbe mtia nia hakuridhika na majibu ya Waziri, atapewa nafasi ya kueleza hoja yake mahasusi kwa ufupi, kwa ufasaha bila ya kurudia rudia, wala kuanzisha mjadala upya na Waziri anayehusika, atajibu hoja hiyo kwa ufupi na kwa usahihi.

(2) Endapo Waziri anayehusika atashindwa kumtosheleza Mjumbe mtia nia, Kiongozi wa Shughuli za Serikali katika Baraza au Waziri mwengine ye yote anaweza kutoa ufanuzi zaidi kwa Mjumbe husika, isipokuwa kwamba Mjumbe huyo hatoruhusiwa kusimama zaidi ya mara tatu kwa hoja moja.

(3) Masharti ya fasili ya (2) ya kanuni hii yatatumika, endapo Mjumbe ametoa hoja ya kupunguza fungu kwenye Kamati ya Matumizi na ambapo Waziri anayehusika au Kiongozi wa Shughuli za Serikali kwenye Baraza anaweza kutoa ahadi

ya kuondoa au kutekeleza jambo ambalo ni msingi wa hoja ya Mjumbe.

(4) Endapo hatua iliyoelezwa katika fasili ya (3) ya kanuni hii haikukubaliwa, na Mjumbe mtia nia akasimamia hoja yake, itapigwa kura.

(5) Mwenyekiti atawahoji Wajumbe kwa kila kifungu, programu ndogo au programu kuu ya Makadirio ya kila Wizara kama atakavyoona inafaa.

(6) Mwenyekiti ataruhusu Wajumbe wasiozidi watatu kwa kila kifungu au programu ndogo walioweka nia ya kuzuia kifungu au programu ndogo husika kutoa hoja zao wakati wa Kamati ya Matumizi, isipokuwa kwamba Mwenyekiti anaweza kuongeza Mjumbe mwengine pale atakapoona inafaa.

(7) Kila Mjumbe ataaeleza hoja yake ya kuzuia kifungu au programu ndogo chini ya fasili ya (6) kwa muda usiozidi dakika tatu.

(8) Baada ya suala la kukubaliwa kwa fungu lolote kuwa limetolewa na Mwenyekiti, hakuna hoja itakayoruhusiwa kwa ajili ya kufanya mabadiliko au kujadiliwa kuhusu fungu hilo ila kwa ruhusa ya Mwenyekiti.

Kuongeza  
muda wa  
kushughu-  
likia fungu.

**111.-**(1) Endapo zimebakia dakika kumi kabla ya kufikia muda wa kuahirisha Kikao cha Baraza na Kamati ya Matumizi bado hajjamaliza kupitisha programu, Mwenyekiti anaweza kuongeza muda usiozidi dakika thelathini bila ya kuihoji Kamati ya Matumizi ili kukamilisha shughuli ya kupitisha programu zilizobaki.

(2) Endapo zimebakia dakika kumi kabla ya kumalizika muda ulioongezwa chini ya fasili ya (1) ya kanuni hii, na Kamati ya Matumizi bado hajjamaliza kupitisha programu zote, Mwenyekiti atafunga mjadala unaoendelea na papo hapo atawahoji Wajumbe kuhusu programu zilizobakia, kama zipo, kwa pamoja.

**112.** Isipokuwa kama itaamuliwa vyenginevyo, mnamo siku ya mwisho ya siku zilizotengwa kwa ajili ya kushughulikia Makadirio hakuna shughuli nyengine itakayofanywa, isipokuwa ya kushughulikia Makadirio ambayo itafanywa hadi imekamilika. Siku ya mwisho ya kushughulikia Makadirio.

**113.-**(1) Baada ya Kamati ya Matumizi kumaliza shughuli za kufikiria Makadirio na kuyakubali au kuyakataa pamoja na mabadiliko au bila ya mabadiliko, Baraza litarudia, na Waziri anayehusika atatoa taarifa ya kukamilika kwa shughuli ya Kamati ya Matumizi na atatoa hoja kuwa Makadirio yaliyopitishwa na Kamati ya Matumizi yakubaliwe na Baraza. Kukubaliwa kwa Makadirio.

(2) Baada ya Baraza kukamilisha mjadala wa Makadirio ya Wizara zote, ndani ya siku tatu kabla ya Hotuba ya Bajeti kusomwa kwenye Baraza, Kamati ya Bajeti kwa kushauriana na Serikali itafanya majumuisho kwa ajili ya kuzingatia hoja zilizojitokeza wakati wa kujadili utekelezaji wa bajeti za Wizara kwa mwaka wa fedha unaoisha na Makadirio ya Wizara hizo kwa mwaka wa fedha unaofuata.

(3) Mwenyekiti au Mjumbe yejote wa Kamati ya Bajeti kwa niaba ya Mwenyekiti wake atawasilisha mbele ya Baraza hotuba ya majumuisho yaliyoelezwa chini ya masharti ya fasili ya (2) ya kanuni hii, kabla ya kuwasilishwa kwenye Baraza Mwelekeo wa Mpango wa Taifa na hakutokuwa na mjadala wowote ndani ya Baraza.

(4) Baada ya Hoja ya Makadirio ya Serikali kukubaliwa, Waziri anayehusika atawasilisha Mswada wa Matumizi katika Baraza ambao utapitishwa kwa mujibu wa utaratibu wa kupitisha Miswada isipokuwa hautapelekwa kwenye Kamati ya Kudumu na utasomwa kwa Mara ya Kwanza, kwa Mara ya Pili na kwa Mara ya Tatu katika Mkutano husika.

(5) Mswada wa Sheria za Fedha utasomwa kwa Mara ya Kwanza, kwa Mara ya Pili na kwa Mara ya Tatu katika Mkutano wa Bajeti na utapitishwa kabla ya kuanza kwa mwezi wa Julai.

(6) Baada ya Mswada wa Matumizi kuwa umesomwa kwa Mara ya Tatu na kuwa Sheria kwa kupata kibali cha Rais, Sheria ya Matumizi itatangazwa kwenye Gazeti.

Mswada wa  
Matumizi ya  
Nyongeza.

**114.-**(1) Mashauri yote kwa ajili ya Matumizi kutokana na fedha za Serikali au kwa ajili ya kutoa fedha yoyote kwa ajili ya kutozwa malipo yoyote katika mapato ya Serikali, kupata fedha zaidi ya fedha zilizoruhusiwa, yatapelekwa kwenye Kamati ya Matumizi kwa mujibu wa masharti ya kanuni ya 110 ya Kanuni hizi na baada ya hapo yataitwa Nyongeza ya Makadirio. Masharti ya kifungu cha 106 cha Katiba yatatumika kwenye Nyongeza ya Makadirio.

(2) Masharti ya fasili ya (8) ya kanuni ya 103, kanuni za 109, 112 na 113 za Kanuni hizi yatatumika pamoja na mabadiliko yanayolazimu kwenye Nyongeza ya Makadirio.

### **SEHEMU YA KUMI KAMATI ZA BARAZA**

Kamati za  
Vyama vya  
Siasa.

**115.** Wajumbe wa kila chama chenye uwakilishi katika Baraza wanaweza kuunda Kamati ya Wajumbe wote wa chama hicho kwa kuzingatia Katiba ya Nchi, Kanuni za Kudumu za Baraza la Wawakilishi na taratibu za chama kinachohusika.

Mikutano ya  
Kamati za  
Vyama vya  
Siasa.

**116.-**(1) Kamati iliyoundwa kwa mujibu wa kanuni ya 115 ya Kanuni hizi, itajiwekea kanuni zake kwa ajili ya kuendesha shughuli zake.

(2) Kamati za Vyama vya Siasa zinaweza kukutana si zaidi ya siku mbili kabla ya kuanza Mkutano wa Baraza na vikao hivyo ndivyo vitakavyopata hadhi na nafuu zote kwa Wajumbe wa Baraza zinazotolewa na Afisi ya Baraza.

Kamati ya  
Baraza  
Zima.

**117.-**(1) Kutakuwa na Kamati ya Baraza Zima ambapo itakapokuwa inashughulikia Miswada ya Sheria itajulikana kuwa ni Kamati ya Kutunga Sheria na itakapokuwa inashughulikia Makadirio itajulikana kuwa ni Kamati ya Matumizi.

(2) Kwa kufuata yaliyomo katika Orodha ya Shughuli za Baraza au kwa mujibu wa Kanuni hizi, ukifika wakati wa Baraza kuingia katika Kamati ya Baraza Zima, kama ni wakati wa Baraza kushughulikia Miswada ya Sheria, Katibu atatamka:

*“Kamati ya Kutunga Sheria”*

au kama ni wakati wa kushughulikia Makadirio, Katibu atatamka:

*“Kamati ya Matumizi”*

(3) Kwa kuzingatia masharti ya fasili ya (2) ya kanuni hii, Spika ataondoka katika kiti chake bila ya hoja yoyote kutolewa na atakaa katika sehemu ya Katibu Mezani atajulikana kuwa ni Mwenyekiti.

**118.-**(1) Kamati ya Baraza Zima itafuata masharti ya kanuni ya 78 ya Kanuni hizi pamoja na masharti mengine yaliyowekwa na Kanuni hizi kuhusu mwenendo wa Baraza, isipokuwa kwamba katika Kamati ya Baraza Zima:

- (a) hoja ikitolewa haihitaji kuungwa mkono;
- (b) kwa idhini ya Spika, Mjumbe anaweza kuzungumza zaidi ya mara moja juu ya suala moja.

(2) Endapo shughuli za Kamati ya Baraza Zima zimekamilika, Katibu atatamka:

*“Baraza linarudia”*

na maneno haya yatatamkwa endapo hoja ya kuahirishwa kwa Kamati ya Baraza Zima itakapokubaliwa, kwa kufuata masharti ya fasili ya (3) ya kanuni hii.

(3) Mjumbe anayetaka kutoa hoja kwamba majadiliano ya Kamati ya Baraza Zima yaahirishwe mpaka wakati mwengine, anaweza kutoa hoja yake hiyo wakati wowote na kuelezea sababu

za hoja yake ambayo itaamuliwa bila ya mjadala na endapo itakubaliwa Kamati ya Baraza Zima itaahirishwa na Baraza litarudia.

(4) Baraza litakaporudia, Waziri atatoa hoja ambayo haitajadiliwa na kutamka kwamba:

*“kwa vile Kamati ya Baraza Zima imeshughulikia Mswada wa Sheria ya ..... au Makadirio ya Wizara ya ..... lakini kazi hiyo haikumaliza, naomba ruhusa itolewe kwa Kamati ya Baraza Zima kukutana tena siku ya ..... tarehe ..... saa .....”*

Isipokuwa kwamba, Kamati ya Baraza Zima itakaposhughulikia Mswada wa Kamati au Mswada wa Mjumbe, Mwenyekiti wa Kamati au Mjumbe, kwa kadri itakavyokuwa, atatoa hoja ya kuomba ruhusa kwa Kamati ya Baraza Zima kukutana tena.

(5) Marudio ya majadiliano juu ya shughuli zozote ambazo Kamati ya Baraza Zima imeshindwa kumaliza, yatafanywa katika kikao kinachofuata, isipokuwa kama Waziri, Mwenyekiti wa Kamati au Mjumbe anayehusika atachagua kikao cha baadae.

(6) Kamati ya Baraza Zima itayafikiria mambo yatakayopelekwa kwenye Kamati hiyo na Baraza.

(7) Kamati ya Baraza Zima inaweza kuamua, baada ya hoja kutolewa, kuwa shughuli iliyo mbele yake irudishwe au ipelekwe kwanza katika Kamati ya Kudumu inayohusika.

(8) Kamati ya Baraza Zima itakapomaliza shughuli zake, Mwenyekiti ataondoka katika sehemu ya Katibu Mezani na Baraza litarudia.

Kamati za  
Kudumu  
za Baraza.

**119.-**(1) Kutakuwa na Kamati za Kudumu za Baraza kama zitakavyoainishwa katika Jadweli la Kwanza la Kanuni hizi.

(2) Spika anaweza kufanya marekebisho katika Jadweli la Kwanza kwa kadri itakavyohitajika na marekebisho hayo yatathibitishwa mapema iwezekanavyo na Kamati ya Uongozi na Shughuli za Baraza.

(3) Majukumu ya Kamati yatakuwa kama yalivyoainishwa katika Jadweli la Kwanza la Kanuni hizi.

**120.-**(1) Mjumbe yeote wa Baraza asiyekuwa Makamu wa Pili wa Rais, Naibu Spika, Waziri, Naibu Waziri au Mwanasheria Mkuu anaweza kuteuliwa kuwa Mjumbe wa Kamati ya Kudumu yoyote ambayo inahusika na Kanuni hizi, isipokuwa kwamba, Makamu wa Pili wa Rais, Naibu Spika na Waziri aliyeteuliwa kwa mujibu wa Kanuni hizi au sheria husika watakuwa Wajumbe wa Kamati ya Uongozi na Shughuli za Baraza.

Uteuzi wa  
Wajumbe  
wa Kamati.

(2) Waziri au Naibu Waziri wenyе dhamana ya jambo lolote linaloshughulikiwa na Kamati watakuwa Wajumbe wa Kamati hiyo itakapokuwa inashughulikia jambo hilo isipokuwa hawatopiga kura.

(3) Kwa Kadri inavyowezekana, Wajumbe wa Kamati watateuliwa na Spika na katika uteuzi huo, Spika:

- (a) atateua idadi ya Wajumbe iliyо sawa kwa kila Kamati isipokuwa kama inaelekezwa vyenginevyo katika Kanuni hizi;
- (b) atazingatia sifa na aina mbali mbali za Wajumbe;
- (c) atazingatia mapendekezo ya Wajumbe wenywewe;
- (d) atazingatia haja kwa kila Kamati kuwa na Wajumbe wenyе uzoefu na ujuzi maalumu kuhusu kazi za Kamati hiyo; na
- (e) atashauriana na Wanadhimu wa vyama vyenye Wajumbe kwenye Baraza.

(4) Katibu atahakikisha kuwa Wajumbe wote wanapewa orodha inayoonesha jinsi walivyogawanywa katika Kamati mbali mbali.

(5) Wajumbe walioteuliwa kuingia katika Kamati Fulani ya Kudumu, wataendelea kuwa Wajumbe wa Kamati hiyo kwa kipindi cha miaka miwili na miezi sita kuanzia siku ya uteuzi wao kwenye Kamati hiyo.

Uchaguzi  
wa Viongozi  
na mahud-  
hurio ya  
Wajumbe  
katika  
Kamati.

**121.-**(1) Wajumbe wa Kamati watamchagua Mjumbe mmoja kutoka miongoni mwao kuwa Mwenyekiti wa Kamati hiyo na Mjumbe mwengine awe Makamu Mwenyekiti kwa kura ya siri kwa masharti kwamba katika uchaguzi wa nafasi hizo itazingatiwa jinsi kwa kadri itakavyowezekana.

(2) Bila ya kuathiri masharti ya fasili ya (1) ya kanuni hii, Mwenyekiti wa Kamati ya Kusimamia Masuala ya Fedha atachaguliwa na Wajumbe kutoka katika chama cha siasa ambacho hakikushika madaraka na Makamu Mwenyekiti atachaguliwa kutoka katika chama kilichoshika madaraka.

(3) Endapo Wajumbe watatokana na chama kimoja cha siasa, Mwenyekiti wa Kamati na Makamu Mwenyekiti wa Kamati ya Kusimamia Masuala ya Fedha watachaguliwa kutoka miongoni mwa Wajumbe hao.

(4) Mnadhimu wa Chama hatochaguliwa kuwa Mwenyekiti wa Kamati.

(5) Mwenyekiti wa Kamati na Makamu Mwenyekiti watashika wadhifa wao kwa muda wote wa maisha ya Kamati.

(6) Mwenyekiti wa Kamati au Makamu Mwenyekiti, anaweza kuondolewa kwenye wadhifa huo kwa maamuzi ya zaidi ya nusu ya kura za Wajumbe wote wa Kamati endapo Mwenyekiti au Makamu Mwenyekiti atashindwa kutekeleza majukumu yake ipasavyo au atakwenda kinyume na maadili.

(7) Bila ya kujali masharti ya fasili ya (5) ya kanuni 120 ya Kanuni hizi, ikiwa bila ya sababu inayokubaliwa na Spika, Mjumbe wa Kamati anashindwa kuhudhuria na kufanya kazi za Kamati kwa muda wa miezi sita mfululizo, Spika anaweza kumuondoa Mjumbe huyo katika Kamati.

(8) Kutakuwa na Mahudhurio ya Wajumbe katika kila kikao cha Kamati, ambapo Mjumbe atastahiki kulipwa posho kwa kuhudhuria kikao na kusaini mahudhurio.

(9) Kamati itafanya vikao vyake kwa kuzingatia Bajeti ya Kamati husika ambayo imeidhinishwa kwa mwaka huo wa fedha.

**122.-**(1) Mwenyekiti wa Kamati ataongoza vikao vyote vya Kamati na ikiwa hayupo kutokana na sababu yoyote, Kamati itaongozwa na Makamu Mwenyekiti, endapo Mwenyekiti wa Kamati na Makamu Mwenyekiti hawapo, Wajumbe waliohudhuria watamchagua Mjumbe mmoja mionganini mwao kuongoza kikao hicho, isipokuwa kwamba, endapo Kamati itakutana kupiga kura ya kumuondoa Mwenyekiti wa Kamati au Makamu Mwenyekiti, Kikao cha Kamati hakitaongozwa na yeote mionganini mwao ambaye anapigiza kura ya kuondolewa.

Utaratibu  
wa Vikao  
vy  
Kamati.

(2) Kikao cha Kamati kitafanyika wakati wowote kitakapoitishwa na Spika au Mwenyekiti wa Kamati baada ya kushauriana na Spika.

(3) Akidi ya kikao chochote cha Kamati itakuwa theluthi moja ya Wajumbe wote wa Kamati.

(4) Endapo itakosekana akidi katika Kamati husika, Spika anaweza kuongeza idadi ya Wajumbe wengine wasiozidi watatu kutoka Kamati nyengine kwa madhumuni ya kupata akidi kwenye kazi za msingi za Kamati au kazi nyengine muhimu ambazo Spika ataruhusu na Wajumbe hao watakuwa na haki na fursa sawa na Wajumbe wa Kamati hiyo kwa muda wote watakapokuwa wanafanya kazi hiyo.

(5) Isipokuwa kama imeelezwa vyenginevyo katika Kanuni hizi, mambo yote yanayofikiriwa na Kamati yataamuliwa kwa wingi wa kura za Wajumbe wa Kamati hiyo waliohudhuria na kupiga kura.

**123.-**(1) Waziri au Naibu Waziri atashiriki katika vikao vy Kamati katika nyakati zifuatizo:

- (a) wakati wa kujadili Miswada ya Sheria;
- (b) wakati wa kujadili Bajeti;
- (c) wakati wa kuthibitisha ratiba ya kazi za Kamati;
- (d) wakati wa majumuisho ya kazi za Kamati;
- (e) wakati wa kujadili taarifa au kauli za Serikali za Wizara husika;
- (f) wakati wa kujadili taarifa ya utekelezaji wa Mapendekezo ya Kamati; na
- (g) wakati mwengine wowote atakapohitajika na Kamati.

(2) Waziri atakapokuwa na dharura itakayomfanya kushindwa kuhudhuria katika kazi za Kamati kwa mujibu wa fasili ya (1) ya kanuni hii, atawajibika kuwasiliana na kukubaliana na Mwenyekiti wa Kamati angalau siku mbili kabla ya kikao husika kufanyika, isipokuwa kwa yale matukio yanayotokea kwa ghafla, atawajibika kuwasiliana na Mwenyekiti wa Kamati wakati wowote.

(3) Endapo Waziri hatohudhuria kikao na kushindwa kuwasiliana na Mwenyekiti wa Kamati kama ilivyoelezwa na fasili ya (2) ya kanuni hii, atalazimika kubeba dhima ya kufanya kikao chengine.

**124.-**(1) Kamati itawasilisha Ripoti ya shughuli zake mbele Ripoti za Kamati. ya Baraza katika Mkutano wa mwezi wa Februari au wakati mwengine ambapo Kamati ya Uongozi na Shughuli za Baraza itaamua, na masharti ya kanuni ya 133 ya Kanuni hizi, yatatumika kuhusu utaratibu wa kuwasilisha ripoti hiyo.

(2) Ripoti ya Kamati iliyoelezwa chini ya fasili ya (1) ya kanuni hii itajumuisha mambo yafuatayo:

- (a) Utangulizi, ambao utaonesha hadidu rejea ambazo Kamati ilipewa, maelekezo yoyote yaliyotolewa kwa Kamati, njia au mbinu zilizotumika na Kamati katika kutekeleza majukumu yake, pamoja na mambo mengine kama yapo, ambayo yalijitokeza wakati wa uchunguzi;
- (b) Maudhui ambayo yatatoa maelezo kamili kuhusu jambo au mambo yote yaliyofanyiwa uchunguzi na Kamati; na
- (c) Hitimisho ambalo litatoa Maoni na Mapendekezo ya Kamati kwa Baraza.

(3) Kila Wizara itapaswa kuwasilisha mbele ya Baraza, Ripoti ya Utekelezaji wa Maagizo ya Kamati kuhusiana na Wizara husika, mara moja kwa mwaka katika Mkutano wa mwezi wa Septemba au wakati mwengine wowote Kamati ya Uongozi na Shughuli za Baraza itakapoamua, isipokuwa Ripoti ya Utekelezaji wa Maagizo ya Kamati ya Kusimamia Masuala ya Fedha na Kamati ya Bajeti itawasilishwa na Waziri anayehusika na Fedha na Ripoti ya Utekelezaji wa Maagizo ya Kamati ya Kanuni na Sheria Ndogo itawasilishwa na Waziri anayehusika na Sheria.

(4) Ripoti ya Utekelezaji wa Maagizo ya Kamati itawasilishwa kwanza na Waziri mwenye dhamana kwenye Kamati husika kabla ya kupelekwa kwenye Baraza kwa ajili ya kujadiliwa.

(5) Ripoti na Hotuba za Kamati zitapitiwa, kujadiliwa na kuthibitishwa na Wajumbe wa Kamati husika kabla ya kuwasilishwa katika Baraza.

Utaratibu  
wa jumla  
wa Kamati.

**125.-**(1) Masharti ya kanuni hii yatatumika katika Kamati zote isipokuwa masharti ya fasili ya (3) ya kanuni ya 122, fasili ya (3) ya kanuni ya 123 na fasili za (4), (5), (6) na (7) za kanuni hii, hayatatumika kwa Kamati ya Uongozi na Shughuli za Baraza.

(2) Bila ya kuathiri masharti ya Kanuni hizi, kila Kamati itajiwekea mwenendo na utaratibu mzuri wa kutekeleza majukumu na kazi zake.

(3) Kazi za Kamati zitafanywa kwa kuzingatia mambo ambayo Kamati imejipangia mionganoni mwa kazi zake baada ya kushauriana na Spika.

(4) Kamati baada ya kushauriana na Spika, inaweza kuwaruhusu Wajumbe wa Baraza wasiokuwa Wajumbe wa Kamati inayoshughulikia jambo fulani au watu amba si Wajumbe kuhudhuria na kushiriki katika shughuli za Kamati lakini hawatokuwa na haki ya kupiga kura.

(5) Mahojiano na shughuli zote za kawaida zinazofanyika katika utendaji wa kazi za Kamati zitaendeshwa kwa uwazi, ambapo Kamati inaweza kuwaalika wadau ili kupata maoni na ushauri wao kwa ajili ya kuimarisha Mswada au jambo lolote ambalo litakuwa linashughulikiwa na Kamati, na endapo kutakuwa na sababu za msingi, Kamati inaweza kuwaondoa wadau wakati shughuli za Kamati zinaendelea.

(6) Spika anaweza kuupeleka Mswada au jambo jengine lolote kujadiliwa kwenye Kamati yoyote na Kamati hiyo itahesabika kuwa ndio inayohusika na Mswada huo au jambo hilo.

(7) Endapo kwa sababu yoyote Mjumbe atashindwa kufanya kazi zake kwenye Kamati, Spika anaweza kwa kushauriana na Mnadhimu wa Chama husika kumteua Mjumbe mwengine ye yoyote kushika nafasi yake.

(8) Kamati yoyote inaweza kuunda Kamati ndogo miongoni mwa Wajumbe wake kwa ajili ya uendeshaji bora wa shughuli zake kama itakavyoona inafaa ambapo Kamati ndogo itakayoundwa itapangiwa kazi na Kamati inayohusika.

(9) Katika utekelezaji wa majukumu yake Kamati haitashughulikia jambo lolote ambalo linasubiri uamuzi wa Mahakama.

**126.-**(1) Kutakuwa na Kamati ya Uongozi na Shughuli za Muundo wa Kamati ya Uongozi na Shughuli za Baraza ambayo itakuwa na Wajumbe wafuatao:

- (a) Spika ambaye atakuwa Mwenyekiti;
- (b) Naibu Spika ambaye atakuwa Makamu Mwenyekiti;
- (c) Kiongozi wa Shughuli za Serikali katika Baraza;
- (d) Mnadhimu wa Chama cha Siasa katika Baraza;
- (e) Mwenyekiti wa Baraza;
- (f) Mwenyekiti wa Kamati ya Kudumu au kama hayupo Makamu Mwenyekiti;
- (g) Waziri anayehusika na mambo ya Baraza; na
- (h) Katibu wa Baraza ambaye ndiye atakayekuwa Katibu wa Kamati hii.

(2) Endapo itatokea Wenyeviti wa Kamati za Kudumu wote ni wanaume, Spika atateua Wajumbe wawili wanawake ambao si Mawaziri au Naibu Mawaziri kuwa Wajumbe wa Kamati ya Uongozi na Shughuli za Baraza.

(3) Endapo Chama ambacho hakikushika madaraka hakikupata uwakilishi katika Kamati ya Uongozi na Shughuli za Baraza, Spika anaweza kuteua Mjumbe mmoja kuwa Mjumbe wa Kamati hiyo.

**127.-**(1) Majukumu ya Kamati ya Uongozi na Shughuli za Baraza yatakuwa ni:

- (a) kufikiria na kumshauri Spika juu ya mambo yote yanayohusu maslahi na stahiki za Wajumbe;
- (b) kusimamia maendeleo ya kazi za Baraza na Kamati zake;
- (c) kuweka utaratibu wa mambo na aina ya huduma zitakazotolewa kwa Wajumbe, na pia maslahi ya wafanyakazi wakati wa vikao vyta Baraza au Kamati zake;
- (d) kufikiria na kupanga mambo yanayohusiana na mishahara, posho na stahiki nyengine kwa Wajumbe;
- (e) kuandaa programu ya shughuli za Baraza;
- (f) kulishauri Baraza kuhusu uendeshaji wa shughuli zake; na
- (g) kufanya kazi nyengine yoyote kama itakavyoonekana inafaa chini ya Kanuni hizi au sheria nyengine yoyote.

(2) Katika kutekeleza kazi zilizotajwa katika aya ya (b) ya fasili ya (1) ya kanuni hii, Kamati ya Uongozi na Shughuli za Baraza itakuwa na uwezo wa kuweka muda wa kumalizika shughuli yoyote ya Kamati na kabla au baada ya kumalizika muda huo au muda ulioongezwa, Mwenyekiti wa Kamati inayohusika atawasilisha taarifa ya Kamati kuhusiana na utekelezaji wa kazi hiyo.

**128.-**(1) Akidi ya kikao cha Kamati ya Uongozi na Shughuli za Baraza itakuwa ni zaidi ya nusu ya Wajumbe wote wa Kamati hiyo.

(2) Kamati ya Uongozi na Shughuli za Baraza kupertia Mwenyekiti wake inaweza kumualika mtu ye yeyote kuhudhuria katika kikao cha Kamati ya Uongozi na Shughuli za Baraza isipokuwa kwamba mtu huyo hatokuwa na haki ya kupiga kura.

**129.-**(1) Kutakuwa na Sekretarieti ya Kamati ya Uongozi na Shughuli za Baraza itakayoongozwa na Katibu. Sekretarieti ya Kamati ya Uongozi na Shughuli za Baraza.

(2) Sekteratieti ya Kamati ya Uongozi na Shughuli za Baraza itatekeleza shughuli zake kama itakavyoelekezwa na Katibu.

(3) Sekteratieti ya Kamati ya Uongozi na Shughuli za Baraza itajumuisha:

(a) Wakurugenzi wa Idara wa Afisi ya Baraza;

(b) Mkuu wa Kitengo cha Uhasibu; na

(c) Mkuu wa Kitengo cha TEHAMA.

(4) Katibu anaweza kumualika Mtumishi ye yeyote wa Afisi ya Baraza kushiriki katika Sekretarieti ya Kamati ya Uongozi na Shughuli za Baraza.

**130.-**(1) Kutakuwa na Kamati ya Maadili, Kinga na Fursa za Wajumbe ambayo itakuwa na Wajumbe wasiopungua wanne na wasiozidi kumi, kama itakavyoamuliwa na Spika. Kamati ya Maadili, Kinga na Fursa za Wajumbe.

(2) Wajumbe wa Kamati hii watateuliwa na Spika kutoka miongoni mwa Wajumbe wa Kamati nyengine za Kudumu.

(3) Kamati ya Maadili, Kinga na Fursa za Wajumbe itatekeleza majukumu yake kwa mujibu wa Jadweli la Kwanza na la Pili la Kanuni hizi.

**131.-**(1) Baraza linaweza kuunda Kamati Teule kwa ajili ya jambo fulani. Kamati Teule.

(2) Kamati Teule itapendekezwa kwa njia ya hoja itakayotolewa na Mjumbe na kuamuliwa na Baraza na Taarifa ya hoja hiyo haitajadiliwa.

(3) Kamati Teule itakuwa na Wajumbe wasiopungua watano ambao watateuliwa na Spika ambapo Mjumbe aliyependekeza kuundwa kwa Kamati Teule atakuwa mionganini mwa Wajumbe wa Kamati lakini si lazima kuwa Mwenyekiti wa Kamati hiyo.

(4) Katika mkutano wao wa kwanza, Wajumbe wa Kamati Teule watamchagua Mwenyekiti kutoka mionganini mwao.

(5) Endapo Mwenyekiti hatokuwepo kutokana na sababu yoyote, Wajumbe wa Kamati Teule watamchagua Mjumbe mwengine mionganini mwao awe Mwenyekiti wa muda.

(6) Mwenyekiti wa Kamati Teule atakuwa na kura ya asili na hatakuwa na kura ya uamuzi, na endapo kura zitakuwa sawa, jambo husika litakuwa halijakubaliwa na Kamati Teule.

Akidi na utaratibu wa Kamati Teule.

**132.-**(1) Akidi ya kikao cha Kamati Teule itakuwa ni zaidi ya nusu ya idadi ya Wajumbe wote.

(2) Kikao cha Kamati Teule kitafanyika pahala na wakati wowote kitakapoitishwa na Spika au Mwenyekiti wa Kamati baada ya kushauriana na Spika.

(3) Endapo kwa sababu yoyote, Mjumbe wa Kamati Teule hawezi kufanya kazi zake, Spika anaweza kumteua Mjumbe mwengine badala yake na atatoa taarifa kwenvye Mkutano unaofuata wa Baraza.

(4) Majadiliano ya Kamati Teule yatahusu mambo yaliyopelekwa kwake na Baraza na kama kutakuwa na mabadiliko, majadiliano yatafanywa kwa mujibu wa mabadiliko hayo.

(5) Majadiliano ya Kamati Teule yatakuwa ni siri mpaka taarifa yake itakapowasilishwa mbele ya Baraza.

**133.-**(1) Mwenyekiti wa Kamati Teule atatayarisha rasimu ya taarifa na kuipeleka mbele ya Kamati hiyo ili ijadiliwe.

Taarifa ya  
Kamati  
Teule.

(2) Rasimu mbali mbali za taarifa zinaweza kutayarishwa na Wajumbe wengine wa Kamati hiyo, isipokuwa kwamba, taarifa itakayokubaliwa mwishoni itakuwa ambayo imekubaliwa na Wajumbe wote wa Kamati hiyo au itakayokubaliwa na Wajumbe walio wengi wa Kamati hiyo.

(3) Mjumbe mwenye pingamizi yoyote juu ya taarifa au sehemu yoyote ya taarifa, iliyokubaliwa na Wajumbe walio wengi, anaweza kueleza kwa maandishi sababu zake za kutofautiana na walio wengi na maelezo hayo yatapelekwa kwenye Baraza pamoja na taarifa ya Kamati hiyo.

(4) Kamati Teule itapelekwa taarifa yake kwenye Baraza kuhusu maoni ya uchunguzi wake pamoja na kumbukumbu za ushahidi uliochukuliwa mbele yake.

(5) Taarifa itakayowasilishwa chini ya (4) ya kanuni hii, itapigwa chapa au itashughulikiwa vyenginevyo kama Baraza litakavyoelekeza, itawasilishwa kwenye Baraza na Mwenyekiti au Mjumbe mwengine ye yoyote aliyeidhinishwa na Kamati.

(6) Endapo hoja itatolewa ya kujadili taarifa ya Kamati Teule, na majadiliano kufanyika, hoja itatolewa kuhusiana na Azimio la kukubali taarifa hiyo pamoja na marekebisho yake au bila ya marekebisho na kuchukuliwa hatua kama itakavyoweza kuamuliwa na Baraza.

(7) Katibu wa Kamati Teule ataweka kumbukumbu za mahudhurio ya Wajumbe na maamuzi yaliyofikiwa na kutiwa saini na Mwenyekiti wa Kamati hiyo na zitapelekwa kwa pamoja na taarifa ya Kamati katika Baraza.

(8) Utaratibu unaotumiwa na Kamati Teule, unaweza kutumika kwenye Kamati nyengine za Kudumu za Baraza.

(9) Kamati Teule itamaliza muda wa kazi mara baada ya Mwenyekiti wa Kamati hiyo kuwasilisha Taarifa yake katika Baraza.

(10) Serikali itawasilisha katika Baraza, ndani ya miezi mitatu baada ya maamuzi ya Baraza juu ya Taarifa ya Kamati Teule, taarifa ya utekelezaji wa maamuzi hayo, isipokuwa kwamba, ikiwa Taarifa imetolewa katika Mkutano wa mwisho kabla ya kuvunjwa kwa Baraza, taarifa ya Serikali itawasilishwa katika Mkutano wa Pili wa Baraza jipya.

(11) Bila ya kujali masharti ya fasili ya (9) ya kanuni hii, Kamati Teule inaweza kukutana wakati wowote ili kujadili na kutayarisha maoni yake kutokana na Ripoti ya Serikali ya Utekelezaji wa Maagizo ya Kamati Teule hiyo.

(12) Katibu wa Kamati Teule atateuliwa na Katibu wa Baraza kutoka mionganini mwa Watumishi wa Afisi ya Baraza.

### **SEHEMU YA KUMI NA MOJA KUMUONDOA MADARAKANI RAIS, MAKAMU WA RAIS, SPIKA, NAIBU SPIKA NA MWENYEKITI**

Taarifa ya hoja ya kumshtaki Rais.

**134.** Kwa kuzingatia masharti ya kifungu cha 37 cha Katiba, hoja ya kumshtaki Rais inaweza kutolewa na Mjumbe.

Kuondoa hoja ya kumshtaki Rais.

**135.** Mjumbe aliyetoa Taarifa ya hoja ya kutaka kumshtaki Rais, anaweza kuiondoa hoja yake kwa kueleza nia yake ya kufanya hivyo kwa maandishi kabla hoja hiyo haijafikishwa mbele ya Baraza kuamuliwa isipokuwa kwamba, Mtoa hoja anaweza kuiondoa hoja yake ikifikishwa katika Baraza kwa idhini ya Baraza.

(2) Mjumbe ye yeyote anaweza kutoa Taarifa ya Maandishi, iliyotiwa saini na kuungwa mkono na Wajumbe wasiopungua nusu ya Wajumbe wote wa Baraza, na kupelekwa kwa Spika siku thelathini kabla ya kuwasilishwa katika Baraza, taarifa hiyo

itafafanua tuhuma za makosa aliyoyatenda Rais na kupendekeza kuwa Kamati Maalumu ya Uchunguzi iundwe ili kusikiliza shauri la kushitakiwa kwa Rais.

(3) Spika akiridhika kuwa masharti ya kuleta hoja yametimizwa, atalitaka Baraza bila ya majadiliano, lipige kura juu ya hoja ya kuunda Kamati Maalumu ya Uchunguzi.

(4) Bila ya kuathiri masharti ya Katiba au sheria nyengine yoyote, upigaji kura ndani ya Baraza kwa mujibu ya kanuni hii utakuwa ni siri.

(5) Hoja hiyo ikiungwa mkono na Wajumbe wasiopungua theluthi mbili ya Wajumbe wote, Spika atatangaza majina ya Wajumbe wa Kamati Maalumu ya Uchunguzi kwa mujibu wa aya ya (c) ya kifungu kidogo cha (3) cha kifungu cha 37 cha Katiba na endapo idadi ya Wajumbe wanaounga mkono hoja hiyo haitafikia theluthi mbili ya Wajumbe wote, hoja hiyo itatenguka.

**136.-**(1) Endapo Kamati Maalumu ya Uchunguzi italitafakari na italicichunguza shauri la kumshtaki Rais na ikatoa taarifa kwa Baraza kwamba jambo hilo la mashtaka dhidi ya Rais halina msingi, Baraza halitaendelea kuishughulikia zaidi hoja ya kumshtaki Rais kuhusiana na jambo hilo.

(2) Endapo Kamati Maalumu ya Uchunguzi itatoa taarifa kwa Baraza kwamba mashtaka dhidi ya Rais ni ya msingi, suala la kushtakiwa kwa Rais litawasilishwa mbele ya Baraza na Baraza linaweza baada ya mjadala, kwa kura za Wajumbe wasiopungua theluthi mbili ya Wajumbe wote, kupitisha Azimio kuwa mashtaka dhidi ya Rais yamethibitika na kwamba hatastahiki kushika kit cha Rais na hapo Rais atawajibika kujuzulu kwa kuzingatia masharti ya kifungu kidogo cha (5) cha kifungu cha 37 cha Katiba.

(3) Bila ya kuathiri msharti ya Katiba au sheria nyengine yoyote, upigaji kura ndani ya Baraza kwa mujibu ya kanuni hii utakuwa ni siri.

Taarifa ya  
Kamati  
Maalumu  
ya  
Uchunguzi.

Taarifa ya  
Azimio la  
kumshtaki  
Rais.

**137.-**(1) Spika atawasilisha rasmi kwa Rais pamoja na kwa Mwenyekiti wa Tume ya Uchaguzi ya Zanzibar, taarifa ya Azimio la Baraza kuhusu kuthibitika kwa mashtaka ya Rais.

(2) Kwa kuzingatia masharti ya kifungu kidogo cha (7) cha kifungu cha 37 cha Katiba, hakuna shughuli yoyote kwa mujibu wa kanuni hii itakayoanzishwa au itakayoendelezwa kwa ajili ya kumshtaki Rais wakati wowote ambapo Baraza limeahirishwa.

Hoja ya  
kutokuwa  
na imani na  
Makamu  
wa Rais.

**138.-**(1) Kwa kuzingatia masharti ya kifungu cha 41 cha Katiba, hoja ya kutokuwa na imani na Makamu wa Rais inaweza kutolewa na Mjumbe.

(2) Mjumbe ye yeyote anaweza kutoa taarifa ya maandishi iliyotiwa saini na kuungwa mkono na Wajumbe wasiopungua nusu ya Wajumbe wote, inayoeleza nia na madhumuni ya kuleta hoja ya kutokuwa na imani na Makamu wa Rais na ataiwasilisha kwa Spika angalau siku kumi na nne kabla ya hoja hiyo kuwasilishwa katika Baraza.

(3) Spika akiridhika kuwa hoja hiyo haikiuki masharti ya Kanuni hizi, ataipeleka katika Baraza kwa kuamuliwa na Spika ataisoma hoja hiyo na kuomba Baraza liamue.

(4) Bila ya kuathiri masharti ya Katiba au sheria nyengine yoyote, upigaji kura ndani ya Baraza kwa mujibu wa kanuni hii, utakuwa ni siri.

(5) Endapo hoja iliyoiezwa chini ya fasili ya (1) ya kanuni hii, ikiungwa mkono na Wajumbe wasiopungua nusu ya Wajumbe wote, Spika atatamka siku na tarehe ya kujadiliwa hoja hiyo katika Baraza, isipokuwa siku na tarehe hiyo itakuwa katika kipindi kisichozidi siku kumi tangu siku ya kuamuliwa katika Baraza.

(6) Endapo idadi ya Wajumbe waliouna mkono haikufikia nusu ya Wajumbe wote, hoja hiyo itatenguka kwa mujibu wa utaratibu uliowekwa katika kanuni ya 54 ya Kanuni hizi.

**139.** Hoja inayotolewa chini ya kanuni ya 137 ya Kanuni hizi, itawekwa kwenye Orodha ya Shughuli za Baraza baada ya kipindi cha maswali na itajadiliwa kwa mujibu wa masharti yaliyowekwa na kanuni za 54 na 57 ya Kanuni hizi. Muda wa kujadili hoja.

**140.** Mjumbe aliyetoa Taarifa ya hoja ya kutokuwa na imani na Makamu wa Rais anaweza kuiondoa hoja yake kwa kueleza nia yake ya kufanya hivyo kwa maandishi kabla hoja hiyo haijafikishwa mbele ya Baraza kwa kuamuliwa isipokuwa kwamba, Mtoa hoja anaweza kuiondoa hoja yake ikifikishwa katika Baraza kwa idhini ya Baraza. Kuondoa hoja ya kutokuwa na imani na Makamu wa Rais.

**141.-**(1) Azimio la hoja ya kura ya kutokuwa na imani na Makamu wa Rais litakuwa limepitishwa na Baraza endapo hoja hiyo itaungwa mkono na Wajumbe wasiopungua theluthi mbili ya Wajumbe wote. Azimio la kutokuwa na imani na Makamu wa Rais.

(2) Bila ya kuathiri masharti ya Katiba au sheria nyengine yoyote upigaji kura ndani ya Baraza kwa mujibu wa kanuni hii, utakuwa ni siri.

**142.-**(1) Makamu wa Rais aliyejiuzulu Umakamu wa Rais baada ya Baraza kuitisha Azimio la kutokuwa na imani, kwa Maelezo ya kijiuzulu. kibali cha Spika, anaweza kutoa maelezo ya kijiuzulu kwake siku yoyote wakati wa Mkutano wa Baraza unaoendelea baada ya kijiuzulu; kama kijiuzulu huko kutatokea wakati Baraza halikutani, atatoa maelezo yake sio zaidi ya siku tatu tangu Baraza lianze Mkutano.

(2) Spika atapewa nakala ya maelezo hayo siku moja kabla ya siku ya maelezo hayo kutolewa mbele ya Baraza.

**143.-**(1) Mjumbe anayetaka kutoa taarifa yenye azma ya kumuiondoa Spika, Naibu Spika au Mwenyekiti kwenye madaraka chini ya masharti ya aya ya (c) ya kifungu kidogo cha (3) cha kifungu cha 73 na aya ya (d) ya kifungu kidogo cha (3) cha kifungu cha 74 vya Katiba, atafanya hivyo kwa kutoa taarifa ya azma kwa maandishi kwa Katibu kwa kutoa maelezo kamili ya azma hiyo. Taarifa yenye azma ya kumuiondoa Spika, Naibu Spika au Mwenyekiti.

Masharti ya  
azma  
kupelekwa  
katika  
Baraza.

(2) Katibu ataiweka azma hiyo kwenye Orodha ya Shughuli za Baraza ikionesa jina la Mjumbe aliyetoa azma, isipokuwa siku hiyo itakuwa ni siku yoyote baada ya siku kumi na nne kupita tangu azma hiyo itolewe taarifa.

**144.** Kwa kuzingatia masharti ya fasili ya (1) ya kanuni ya 143 ya Kanuni hizi, azma itapelekwa mbele ya Baraza ikiwa imetimiza masharti yafuatayo:

- (a) iwe na tuhuma za msingi;
- (b) iwe imetolewa maelezo sahihi yenyewe kueleweka;
- (c) iwe imeungwa mkono na Wajumbe wasiopungua ishirini na tano; na
- (d) isiwe na visingizio, matusi wala kejeli.

Kuongoza  
mjadala.

**145.-**(1) Spika, Naibu Spika na Mwenyekiti hatoongoza mjadala wakati wa kujadili azma ya kutaka kumuondoa kwenye madaraka, isipokuwa atakuwa na haki ya kujitetea wakati wa mjadala.

(2) Bila ya kuathiri masharti ya Katiba au sheria nyengine yoyote, Spika, Naibu Spika au Mweyekiti atakuwa ameondolewa kwenye madaraka kwa kura si chini ya theluthi mbili ya idadi ya Wajumbe wote ambapo Baraza litapiga kura ya siri.

(3) Majadiliano yatahusu sababu za msingi zilizoelezwa kwenye azma.

### **SEHEMU YA KUMI NA MBILI WAGENI KATIKA BARAZA**

Waandishi  
wa Habari.

**146.-**(1) Mwandishi wa Habari wa chombo chochote au wa kujitegemea ana haki ya kuhudhuria katika Vikao vyta Baraza au Kamati katika sehemu maalumu iliyotayarishwa kwa ajili ya wasikilizaji.

(2) Mwandishi wa Habari atawajibika kufuata taratibu na Kanuni kwa kukaa na kusikiliza na kufuutilia shughuli za Baraza kwa nidhamu na utulivu.

(3) Spika wakati wowote anaweza kuiondoa ruhusa aliyoitao kwa Mwandishi wa Habari wa chombo chochote cha habari, iwapo chombo hicho kitatoa taarifa yoyote kuhusu shughuli za Baraza ambayo si ya kweli.

(4) Masharti ya kanuni ya 153 ya Kanuni hizi, yatatumika kwa Waandishi wa Habari wa vyombo vya habari isipokuwa kama Baraza litaamua vyenginevyo.

**147-.(1)** Wageni wanaweza kuruhusiwa kuingia katika ukumbi Ruhusa kwa Wageni. wa Mkutano katika sehemu maalumu ya ukumbi huo ambayo Spika ataitoa kwa ajili hiyo.

(2) Mgeni ye yote hataruhusiwa kuingia katika Baraza bila ya ruhusa ya Spika na kwa utaratibu uliowekwa.

(3) Endapo Wageni watakuwa ndani ya ukumbi wa Mkutano, watalazimika kufuata na kuzingatia masharti yafuatayo:

(a) watakaa kimya na kwa heshima hadi watakapotoka nje ya ukumbi huo;

(b) watavaa inavyostahiki kabla ya kuingia katika maeneo maalumu yaliyotengwa kwa ajili ya Wageni wa Baraza na hawataruhusiwa kuvaan guo:

(i) za kubana mwili, zisizokuwa na mikono na zisizofunika magoti;

(ii) zeny picha au mapambo yasiyokuwa na maadili na heshima katika jamii;

(iii) zeny nembo inayowakilisha chama chochote cha siasa; na

(iv) ya suruali aina ya jinzi.

- (c) wataingia na kutoka kwenye ukumbi kwa heshima na utii;
- (d) wasasimama wakati Spika anaingia na anatoka katika ukumbi;
- (e) hawatatangatanga bila ya sababu ya msingi;
- (f) hawatasoma kitabu chochote, gazeti, barua, hati yoyote isiyokuwa inayohusu mambo yaliyomo katika Orodha ya Shughuli za Baraza;
- (g) hawatavuta sigara wala kulewa wakati wowote ndani ya ukumbi au katika maeneo ya Baraza;
- (h) hawataruhusiwa kutumia vifaa vya kielektroniki bila ya idhini ya Spika;
- (j) hawatashangiria wala kuzomea; na
- (g) masharti yote yaliyotajwa katika kanuni za 64 na 65 za Kanuni hizi, ambayo yanahusu Wajumbe wakiwa ndani ya ukumbi wa Baraza, yanawahusu Wageni na Waandishi wa Habari.

Mamlaka  
ya  
kuwaondoa  
Wageni  
katika  
Baraza.

**148.-**(1) Spika anaweza, wakati wowote atakapoona inafaa, kuamuru Wageni watoke nje ya sehemu yoyote ya ukumbi au eneo la Baraza na kuamuru milango ya ukumbi wa Mkutano wa Baraza ifungwe.

(2) Ikiwa kwenye Kikao chochote cha Baraza, Mjumbe ye yoyote atatoa hoja kwamba Wageni au Waandishi wa Habari waondoke, Spika papo hapo atawahoji Wajumbe.

Mgeni  
Rasmi.

**149.-**(1) Mgeni Rasmi anaweza kulizuru Baraza kwa utaratibu utakaopangwa na Spika.

(2) Mgeni Rasmi anaweza, kwa idhini ya Spika:

- (a) kulihutubia Baraza likiwa liko katika Kikao; au
- (b) kuyazuru majengo na maeneo mengine ya Baraza.

### **SEHEMU YA KUMI NA TATU UKAAJI NDANI YA BARAZA**

**150.-**(1) Spika atakaa kwenye kitikitakachowekwa mbele ya Baraza pahali ambapo atawezekana kuwaona Wajumbe wote kwa urahisi. Ukaaji wa Spika na Katibu Mezani.

(2) Katibu Mezani atakaa sehemu maalumu ndani ya Baraza itakayotengwa kwa ajili yake kwa idhini ya Spika.

**151.** Bila ya kujali tofauti ya Vyama vya Siasa, ukaaji wa Wajumbe ndani ya Baraza utakuwa kama ifuatavyo: Ukaaji wa Wajumbe ndani ya Baraza.

- (a) Kiongozi wa Shughuli za Serikali katika Baraza, Mwanasheria Mkuu, Mnadhimu wa Serikali katika Baraza pamoja na Mawaziri watakanasafu ya mwanzo kutoka alipo Spika.
- (b) Naibu Mawaziri, Naibu Spika, Wenyeleviti na Wanadhimu wa Vyama vya Siasa watakanasafu inayofuata.
- (c) Wajumbe waliobaki watakanasafu zilizobakia.

**152.** Wapambe wa Spika, Watumishi wa Baraza na Watumishi wa Serikali wenye shughuli maalumu ndani ya Baraza na Waandishi wa Habari, watakanasafu sehemu ambazo zimetengwa kwa ajili yao kwa idhini ya Spika. Ukaaji wa Watumishi.

**153.** Bila ya kuathiri masharti ya kanuni ya 146 ya Kanuni hizi, Wageni ndani ya Baraza watatengewa sehemu maalumu ya kukaa kwa idhini ya Spika. Ukaaji wa Wageni ndani ya Baraza.

## SEHEMU YA KUMI NA NNE ITIFAKI YA BARAZA

Alama za Baraza.

**154.** Kutakuwa na Alama za Baraza ambazo ni Siwa, Bendera na Nembo.

Siwa la Baraza na matumizi yake.

**155.-**(1) Siwa au alama nyengine itakayokubaliwa na Baraza itakuwa ndio kielelezo cha mamlaka ya Spika na utukufu wa Baraza na itawasilihwa kabla ya kikao kuanza na itakuwepo muda wote Baraza linapokuwa katika vikao vyake visivyokuwa vya Kamati za Kudumu, Kamati Teule na Kamati ya Baraza Zima.

(2) Siwa au alama nyengine yoyote itakayokubaliwa na Baraza, itahifadhiwa na kutunzwa mahala ambapo Spika ataaelekeza.

(3) Heshima na uchukuaji wa Siwa au alama itakayokubaliwa na Baraza itakuwa kama atakavyoolekeza Spika.

Bendera ya Baraza na matumizi yake.

**156.-**(1) Bendera ya Baraza itapeperushwa katika maeneo yafuatao:

- (a) afisi ya Mjumbe ndani ya Jimbo lake;
- (b) katika mkutano usiokuwa wa kampeni za uchaguzi au wa chama cha siasa utakaoitishwa na Mjumbe; au
- (c) katika gari binafsi ya Mjumbe akiwa safarini ndani ya Zanzibar, isipokuwa hatapeperusha Bendera hiyo katika gari inayotumika katika shughuli za biashara.

(2) Bila ya kuathiri masharti yaliyotangulia ya Kanuni hizi, Bendera ya Baraza itapepea kuanzia saa kumi na mbili kamili za asubuhi na haitapepea ifikapo saa kumi na mbili kamili za jioni.

(3) Bendera ya Baraza itaendelea kupepea katika gari

ya Mjumbe baada ya saa kumi na mbili kamili za jioni endapo Mjumbe huyo atakuwa safarini hadi pale atakapomaliza safari yake.

**157.** Nembo ya Baraza itatumika kwa shughuli za Baraza au kwa shughuli nyengine yoyote kama itakavyo elekezwa katika muongozo utakaowekwa na Spika. Nembo ya Baraza na matumizi yake.

**158.-**(1) Itakuwa ni kosa kwa mtu ye yoyote kwenda kinyume na taratibu zilizowekwa chini ya kanuni za 155, 156 na 157 za Kanuni hizi. Matumizi mabaya ya Alama za Baraza.

(2) Utaratibu ulioelezwa katika fasili ya (1) na (2) za kanuni ya 73, kanuni za 76 na 173 za Kanuni hizi, utatumika kwa Mjumbe ye yoyote atakayefanya kosa lilioelezwa chini ya fasili ya (1) ya kanuni hii.

(3) Mtu ye yoyote atakayekwenda kinyume na masharti ya fasili ya (1) ya kanuni hii, atazuiwa kuhudhuria Vikao vya Baraza na maeneo yote ya Baraza kwa muda ambao utaainishwa na Spika au anaweza kupewa adhabu kwa mujibu wa sheria husika.

**159.-**(1) Bila ya kuathiri masharti yafuatayo ya kanuni hii, kila mtu anayeingia katika Ukumbi wa Baraza na mazingira yake atawajibika ku vaa kitambulisho maalumu, nguo na mavazi safi na yenye kuhifadhi heshima yake, hadhi ya Baraza na utamaduni wa Zanzibar. Mavazi.

(2) Bila ya kuathiri masharti ya fasili nyengine za kanuni hii, kila Mjumbe atavaa mavazi safi na yenye kuhifadhi heshima yake, hadhi ya Baraza, utamaduni wa Zanzibar na yasiyokuwa na nembo inayowakilisha chama chochote cha siasa.

(3) Spika, Naibu Spika na Mwenyekiti watavaa joho na kivazi chengine chochote kati ya kanzu au suti ya kimataifa, viatu nya buti, makubadhi au ‘sandals’ za ngozi ya rangi moja.

(4) (a) Mjumbe mwanamme atavaa:

- (i) kofia ya kiutamaduni wa Mzanzibari, kanzu na koti, na viatu vya “sandals” au makubadhi;
  - (ii) suti kamili ya kitaifa ya rangi moja yenyе ukosi wa kukata au isiyo na ukosi na viatu vya buti;
  - (iii) koti lisilo na ukosi la rangi moja na suruali refu rangi yoyote na viatu vya buti;
  - (iv) suti kamili ya kimataifa ya rangi moja, isipokuwa kwamba kofia ya kiutamaduni wa Mzanzibari inaweza kuvaliwa pamoja na mavazi yoyote kati ya yaliyotajwa; au
  - (v) ‘Blazer’ na suruali refu rangi yoyote na viatu vya buti.
- (b) Mavazi yaliyoelezwa katika aya ya (a) ya fasili hii, hayatokuwa mepesi yenyе kuonesha maumbile ya mwili wa Mjumbe.
- (5)(a) Mjumbe mwanamke atavaa kama ifuatavyo:
- (i) suti kamili;
  - (ii) nguo ya kitenge;
  - (iii) kilemba au mtandio kwa atakayependa; au
  - (iv) baibui.
- (b) Mavazi yaliyoelezwa chini ya aya ya (a) ya fasili hii yatakuwa:
- (i) yenyе mikono;
  - (ii) yasiyobana;

- (iii) yasiyoonesha maumbile ya mwili au nguo za ndani; na
- (iv) yanayofunika magoti.
- (6) Mjumbe atavaa viatu vya buti, makubadhi au “*sandals*” za ngozi, isipokuwa atakapoelekezwa vyenginevyo na Spika.
- (7) Katibu atavaa:
- (a) suti kamili yenyе rangi ya joho la Spika, yenyе ukosi wa kulala na mikono mirefu, au suti isiyo na ukosi na joho;
  - (b) suti ya kimataifa ya rangi ya joho la Spika na joho;
  - (c) viatu vya buti vya rangi nyeusi au rangi nyengine itakayoamuliwa na Spika;
  - (d) kofia ya kiutamaduni wa Mzanzibari endapo atapenda; na
  - (e) kilemba au mtandio akipenda endapo ni mwanamke.

(8) Mpambe wa Baraza, wakati wa vikao vya Baraza, atavaa suti yenyе rangi ya joho la Spika, shati jeupe, tai inayolingana na suti yake na viatu vya buti ya ngozi nyeusi au rangi yoyote kama itakavyoamuliwa na Spika.

(9) Mhudumu, wakati anatoa huduma ndani ya Ukumbi wa Baraza, atavaa:

- (a) suti ya kitaifa yenyе ukosi wa kulala au isiyo na ukosi ya rangi yoyote kama itakavyoamuliwa na Spika;

- (b) viatu nya buti nya ngozi vyenye rangi nyeusi au nya rangi nyengine kama itakavyoamuliwa na Spika;
- (c) kofia ya utamaduni wa Mzanzibari endapo atapenda; na
- (d) kilemba au mtandio akipenda endapo ni mwanamke.

**SEHEMU YA KUMI NA TANO  
UTARATIBU WA UCHAGUZI WA WAWAKILISHI WA  
BARAZA WANAOINGIA KATIKA BUNGE LA  
JAMUHURI WA MUUNGANO**

Wajumbe  
wa kuingia  
katika  
Bunge

**160.-**(1) Kutakuwa na Wajumbe watano watakaochaguliwa na Baraza, kwa mujibu wa masharti ya aya ya (c) ibara ndogo ya (1) ya ibara ya 66 ya Katiba ya Jamhuri ya Muungano wa Tanzania 1977 ili kuliwakilisha Baraza katika Bunge la Jamhuri ya Muungano wa Tanzania.

(2) Kila chama chenyе Wajumbe katika Baraza kitakuwa na haki ya kupata Mbunge mmoja kwa kila viti kumi ambavyo chama husika kimepata miongoni mwa Wajumbe wa kuchaguliwa kwenye Majimbo, isipokuwa kwamba, chama chenyе haki ya kupata Wabunge wawili au zaidi basi angalau nafasi moja itakuwa ya Mjumbe mwanamke.

(3) Chama kilichopata Wajumbe zaidi ya nusu ya viti kumi kitakuwa na haki ya kutoa Mbunge mmoja kwa ajili ya kukamilisha idadi ya Wajumbe watano wa kuliwakilisha Baraza.

(4) Endapo chama kimegomea shughuli za Baraza, nafasi yake itatumwa na chama kinachoshiriki katika shughuli za Baraza.

(5) Kwa kupitia Azimio maalumu, Baraza linaweza kutoa agizo mahususi kwa Wajumbe waliochaguliwa chini ya fasili ya (1) ya kanuni hii, ili liweze kutekelezwa kwa niaba ya Baraza.

(6) Wajumbe watano watakaochaguliwa na Baraza kwa mujibu wa kanuni hii, watamchagua Mjumbe mmoja mionganoni mwao kuwasilisha katika Baraza Ripoti itakayoleza mrejesho wa Azimio lililotolewa chini ya fasili ya (5) ya kanuni hii, kwenye Mkutano wa Baraza wa mwezi Februari au wakati mwengine ambao Baraza litaona inafaa.

(7) Ripoti iliyotajwa chini ya fasili ya (6) ya kanuni hii, maana yake ni “Ripoti ya Wajumbe watano waliotajwa chini ya fasili ya (1) ya kanuni hii, itakayotolewa na kuamuliwa kwa hoja katika Baraza na itakayotayarishwa kwa kufuata masharti ya Kanuni hizi juu ya utayarishaji wa Ripoti za Kamati”.

(8) Baada ya Mjumbe aliyetajwa chini ya fasili ya (6) ya kanuni hii kuwasilisha Ripoti husika, Wajumbe wengine wanaotaka kuchangia Ripoti hiyo wanaweza kuchangia na baada ya majadiliano hayo hoja itaamuliwa.

(9) Mjumbe atakayechaguliwa chini ya masharti ya kanuni hii, hataweza kuwa Mwenyekiti wa Baraza au Mwenyekiti wa Kamati ya Kudumu.

**161.-**(1) Chama chenyehaki ya kugombea nafasi ya Ubunge katika Baraza, kitateuwa Wajumbe wasiozidi watatu kwa kila nafasi moja kutoka mionganoni mwa Wajumbe wa chama hicho.

Masharti na  
utaratibu  
wa  
kuchagu-  
liwa.

(2) Wajumbe watakaoteuliwa kugombea nafasi hizo wataorodheshwa majina yao na Katibu siku moja kabla ya tarehe ya uchaguzi itayotajwa na Katibu katika Kikao cha Baraza.

(3) Chama ambacho kimeshindwa kutimiza sharti la fasili ya (1) na (2) ya kanuni hii, kitapoteza haki ya kupata nafasi ya Ubunge kwa kadri kitavyoshindwa kutimiza masharti hayo.

(4) Katibu atawasilisha orodha ya Wagombea mbele ya Baraza kwa kupigiwa kura ya siri.

(5) Mgombiea wa nafasi ya Ubunge atapewa nafasi ya kujieleza kwa muda usiozidi dakika tano mbele ya Wajumbe ndani ya Baraza kabla ya kupigwa kura na Wajumbe wanaweza kumuuliza Mgombiea huyo maswali yasiyozidi matatu.

(6) Endapo kutatokea uwiano wa kura katika kutimiza idadi inayotakiwa, kura hiyo itarudiwa kwa wale Wagombea waliofungana.

(7) Endapo nafasi ya Uwakilishi katika Bunge itakuwa wazi, utaratibu wa kujaza nafasi hiyo utakuwa kama ilivyoolezwa katika kanuni hii.

### **SEHEMU YA KUMI NA SITA MASLAHI NA STAHIKI ZA VIONGOZI NA WAJUMBE**

Maslahi na stahiki za Viongozi na Wajumbe yataangaliwa, kuzingatiwa na kuamuliwa na Kamati ya Uongozi na Shughuli za Baraza.

(2) Kwa kuzingatia masharti yaliyoelezwa katika aya ya (d) ya fasili ya (1) ya kanuni ya 127 ya kanuni hizi, Kamati ya Uongozi na Shughuli za Baraza ndio itakayokuwa mara kwa mara ikiangalia namna ya maslahi na stahiki kwa kila Kiongozi na Mjumbe kuzipata.

(3) Katibu, kwa kufuata maelekezo ya Kamati ya Uongozi na Shughuli za Baraza, atatoa matoleo kuelezea maslahi na stahiki zilizoamuliwa kwa mujibu wa fasili ya (1) na (2) za kanuni hii.

(4) Nakala zilizochapishwa kwa kufuata utaratibu huu, zitahesabiwa kuwa ni nakala halisi za Kanuni za Kudumu za Baraza la Wawakilishi zilizofanyiwa mabadiliko.

## **SEHEMU YA KUMI NA SABA MAMBO MENGINEYO**

**163.-**(1) Kutakuwa na Taarifa Rasmi ya majadiliano katika Baraza, ikiwa katika lugha iliyotumiwa na Msemaji, yakiwa ni maneno halisi aliyoyatamka na itatayarishwa chini ya usimamizi wa Katibu.

(2) Taarifa Rasmi inaweza kutayarishwa katika Kamati Teule au Kamati nyengine kama itakavyoamuliwa na Spika.

(3) Taarifa Rasmi itachapishwa kwa namna atakavyoagiza Spika, na kila Mjumbe atakuwa na haki ya kupata nakala ya Taarifa hiyo.

**164.-**(1) Kwa kuzingatia masharti ya Sheria ya Kuwaenzi Viongozi wa Kitaifa namba 5 ya mwaka 2019, Spika ndiye atakayekuwa na mamlaka ya kutangaza kifo cha Mjumbe.

(2) Mara baada ya kupokea taarifa ya kifo cha Mjumbe, Spika ataunda Kamati ya maziko ambayo itaandaa na kusimamia utaratibu wote wa maziko kama ilivyoelezwa na Sheria husika na muongozo utakaotolewa na Spika.

(3) Kamati iliyoundwa chini ya fasili ya (2) ya kanuni hii, itajumuisha wafuatao:

(a) Wajumbe;

(b) Watumishi wa Baraza; na

(c) Familia ya marehemu.

**165.** Endapo Mjumbe atakosa kuhudhuria Mikutano ya Baraza mitatu mfululizo bila ya ruhusa ya Spika, atakuwa amepoteza uwakilishi wake.

**166.-**(1) Kwa idhini ya Baraza, yoyote kati ya kanuni hizi inaweza kutengwa kando kwa madhumuni mahasusi baada ya Mjumbe yejete kutoa hoja kwa ajili hiyo.

(2) Hoja inayotolewa kwa mujibu wa kanuni hii haitotolewa taarifa na itaamuliwa bila mabadiliko wala majadiliano yoyote.

(3) Maelezo ya hoja yoyote ya kutaka kutenga kando kanuni yoyote yatakuwa ni pamoja na maelezo kuhusu madhumuni ya kutaka kanuni hiyo itengwe kando.

(4) Kanuni yoyote inayotengwa kando chini ya masharti ya kanuni hii, itafanywa hivyo kwa madhumuni yaliyokusudiwa.

Marekebisho  
ya Kanuni. **167.-**(1) Baraza linaweza wakati wowote kupitisha Azimio la kuifanyia marekebisho kanuni yoyote ya Kanuni hizi.

(2) Kwa kuzingatia masharti ya fasili ya (1) ya kanuni hii, Katibu ataandaa Rasimu ya Mapendekezo ya Marekebisho ya Kanuni na kuiwasilisha mbele ya Kamati ya Uongozi na Shughuli za Baraza mapema iwezekanavyo kwa kujadiliwa.

(3) Kwa kuzingatia masharti ya fasili ya (2) ya kanuni hii, na baada ya kupokea maelekezo ya Spika, Mwenyekiti wa Kamati ya Kanuni na Sheria Ndogo, atawasilisha mbele ya Baraza Azimio kwa lengo la kupata ridhaa ya Baraza.

(4) Baada ya Baraza kupitisha Azimio, Spika ataielekeza Kamati ya Kanuni na Sheria Ndogo kulifanya kazi Azimio hilo na kuwasilisha maoni yake katika Mkutano unaofuata wa Baraza, isipokuwa kwamba, endapo Mjumbe yejete anapenda kufanya marekebisho katika kanuni zisizopungua kumi za Kanuni hizi, atatoa taarifa kuhusiana na dhamira yake hiyo na atawasilisha jadweli la marekebisho ambalo litaambatanishwa na Rasimu ya marekebisho yanayokusudiwa.

(5) Baada ya Kamati ya Kanuni na Sheria Ndogo kukamilisha kazi zake, itamuarifu Spika na hoja ya kupitisha

marekebisho ya Kanuni itawekwa katika Orodha ya Shughuli za Baraza kwa ajili ya kuwasilishwa mbele ya Baraza.

(6) Baada ya Mwenyekiti wa Kamati ya Kanuni na Sheria Ndogo kuwasilisha maoni ya Kamati, Wajumbe wengine wanaweza kuchangia hoja hiyo na baada ya majadiliano hayo hoja itaamuliwa.

**168.-**(1) Afisi ya Baraza inaweza kuanzisha Baraza la Baraza la Wawakilishi la Vijana la Zanzibar chini ya usimamizi wa Spika. Wawakilishi la Vijana.

(2) Baraza la Wawakilishi la Vijana litaendeshwa kwa mujibu wa Kanuni zitakazopitishwa na Baraza hilo.

(3) Mapendekezo yatakayotolewa katika Baraza la Wawakilishi la Vijana yatawasilishwa katika Kamati inayoshughulikia masuala ya vijana na baada ya Kamati hiyo kuridhika mapendekezo hayo yatawasilishwa katika Baraza kama sehemu ya taarifa ya Kamati hiyo.

**169.-**(1) Baraza linaweza kuanzisha Jumuiya au Klabu mbali mbali za Kitaifa au Kimataifa kwa ajili ya kusaidia utekelezaji Jumuiya au klubu za Wajumbe. mzuri wa kazi za Baraza.

(2) Jumuiya au Klabu haitaanzishwa hadi hoja ya kuanzisha Jumuiya au Klabu hiyo itakapojadiliwa na kukubaliwa na Baraza.

(3) Viongozi wa Jumuiya au Klabu zilizoazishwa chini ya fasili ya (1) ya kanuni hii, watachaguliwa katika Mkutano wa Kwanza wa Baraza au wakati mwengine wowote utakaoamuliwa na Spika, isipokuwa kwa zile Jumuiya au Klabu ambazo zinawahusu Wajumbe mahasusi.

(4) Kwa kuzingatia masharti ya fasili ya (3) ya kanuni hii, Spika, Naibu Spika, Waziri au Naibu Waziri hatakuwa Mwenyekiti, Makamu Mwenyekiti, Katibu au Mshika Fedha wa Jumuiya au Klabu yoyote ilioanzishwa na Baraza.

**170.-**(1) Mtu yejote asiyekuwa Mjumbe ambaye atajisikia kuwa amepata athari mbaya kutokana na kauli, maneno au shutuma zilizotolewa ndani ya Baraza au Kamati kumhusu yeye binafsi, anaweza kupeleka malalamiko pamoja na maelezo yake ya kujitetea kwa Spika.

- (2) Malalamiko na maelezo yaliyoainishwa chini ya fasili ya (1) ya kanuni hii, yatafuata masharti yafuatayo:
- (a) yawasilishwe kwa Spika ndani ya wiki mbili baada ya kutamkwa na Mjumbe;
  - (b) yawe yameandikwa kwa lugha fasaha na ya heshima na yanahitimishwa kwa maelezo ya jumla kuhusu madhumuni yake;
  - (c) yawe yanatoa hoja mahususi ambayo si ya uzushi, uongo, uchochezi au chuki binafsi;
  - (d) yawe yamewasilishwa na mtu binafsi;
  - (e) yaoneshe wazi kuwa, kwa dhahiri mhusika aliaithirika yeye binafsi kutokana na kauli au maneno au shutuma zilizotolewa ndani ya Baraza au Kamati;
  - (f) yaeleze kwa ufasaha ni jinsi gani mhusika amepata athari mbaya, kama vile kuchafuliwa jina lake au heshima yake katika jamii au kuharibu sifa, uhusiano na ushirikiano wake na wengine au kazi yake anayoifanya katika jamii; na
  - (g) yatoe ombi kwamba, endapo kwa utaratibu uliowekwa na Kanuni hizi yatakubaliwa, basi maelezo ya utetezi au ufanuzi yaliyotolewa na mhusika kwa ajili ya kujisafisha yachukuliwe na Baraza kuwa ndio majibu sahihi ya kauli au maneno au shutuma zilizotolewa ndani ya Baraza au Kamati.

(3) Mara baada ya kupokea malalamiko na maeleo yaliyowasilishwa, Spika atayachambua na akijiridhisha kuwa yamefuata masharti ya fasili ya (2) ya kanuni hii:

- (a) atayashughulikia na kuyawasilisha mbele ya Baraza kuwa ni Taarifa ya Spika; au
- (b) atayawasilisha katika Kamati ya Maadili, Kinga na Fursa za Wajumbe.

(4) Endapo Mjumbe aliyetao maeleo juu ya mtu huyo hakuridhika na maeleo ya taarifa ya Spika yaliyotolewa kwa mujibu wa aya ya (a) ya fasili ya (3) ya kanuni hii, Mjumbe huyo atatoa sababu za kutokuridhika kwake huko na ataliomba Baraza kuyawasilisha malalamiko hayo mbele ya Kamati ya Maadili, Kinga na Fursa za Wajumbe kwa ajili ya kuyatafakari na kulishauri Baraza.

(5) Katika kuyafanyia kazi malalamiko yaliyopelekwa kwake na Spika kwa mujibu wa aya ya (b) ya fasili ya (3) ya kanuni hii, Kamati ya Maadili, Kinga na Fursa za Wajumbe inaweza kumhoji mtu aliyewasilisha malalamiko kwa Spika kuhusiana na kauli, maneno au shutuma zilizotolewa dhidi yake.

(6) Endapo malalamiko yatamhusu Mjumbe aliyemo kwenye Kamati ya Maadili, Kinga na Fursa za Wajumbe, Mjumbe huyo hatashiriki kwenye kikao kitakachojadili malalamiko hayo.

**171.-**(1) Endapo litatokea jambo lolote ambalo mhusika wake au mwathirika wa jambo hilo anastahili kupewa pungezi au pole na Wajumbe, Spika atatoa pungezi au pole kwa mhusika au mwathirika wa jambo hilo kwa niaba ya Wajumbe wote. Shukurani, pungezi na pole.

(2) Baada ya Spika kutoa pungezi au pole kwa mhusika au mwathirika wa jambo lolote kwa ajili ya kuokoa muda wa majadiliano, Mjumbe ye yote hataruhusiwa kutoa pungezi au pole kwa mhusika au mwathirika wa jambo hilo wakati wowote wa majadiliano ndani ya Baraza.

(3) Kwa upande wa Serikali, Kiongozi wa Shughuli za Serikali katika Baraza atatoa pungezi au pole kwa mhusika wa jambo lolote kwa niaba ya Serikali.

(4) Baada ya Kiongozi wa Shughuli za Serikali katika Baraza kutoa pungezi au pole kwa mhusika au mwathirika wa jambo lolote, kwa ajili ya kuokoa muda wa majadiliano, Waziri ye yeyote hataruhuswa kutoa pungezi au pole kwa mhusika au mwathirika wa jambo hilo wakati wowote wa majadiliano ndani ya Baraza.

Mambo  
yasiy-  
owe-kewa  
masharti.

**172.** Endapo jambo au shughuli yoyote haikuwekewa masharti katika Kanuni hizi, Spika kwa kuzingatia Katiba, sheria za nchi na uzoefu wa Nchi za Jumuiya ya Madola, ataamua utaratibu wa kufuatwa katika jambo au shughuli hiyo na uamuzi huo pia utaingizwa katika Kitabu cha Maamuzi ili kuongoza mwenendo wa baadae.

Adhabu ya  
jumla.

**173.-**(1) Mjumbe au mtu yeyote ambaye atatenda kosa dhidi ya Kanuni hizi ambalo adhabu yake haijaainishwa kwenye Kanuni hizi, atapewa adhabu kwa kufuata muongozo utakaowekwa na Kamati ya Uongozi na Shughuli za Baraza.

(2) Bila ya kujali masharti ya Kanuni hizi, Baraza halitazulika kumchukulia hatua Mjumbe au mtu yeyote kwa mujibu wa masharti ya sheria yoyote inayotumika nchini.

Ukagazi.

**174.-**(1) Kutakuwa na utaratibu wa kumkagua mtu yeyote anayeingia katika maeneo ya Baraza kwa kuzingatia:

(a) staha na heshima; na

(b) tofauti ya jinsi.

(2) Endapo katika kufanya ukagazi mtu yeyote atapatikana na kifaa ambacho kwa asili yake au kwa maoni ya Walinzi ni cha hatari, kifaa hicho atakiacha kwa Walinzi waliopo mlangoni.

(3) Mjumbe, Mtumishi au Mgeni yeote atakayekataa kukaguliwa au kukabidhi kitu chochote ambacho Walinzi wataona kwamba ni cha hatari, hataruhusiwa kuingia ndani ya Ukumbi wa Baraza au maeneo ya Baraza.

**175.-**(1) Spika kwa kushauriana na Kamati ya Uongozi na Shughuli za Baraza anaweza kuandaa miongozo kuhusiana na utekelezaji bora wa masharti ya Kanuni.

(2) Kwa kuzingatia masharti ya fasili ya (1) ya kanuni hii, miongozo itakayoandalialiwa inaweza kujikita katika masuala yafuatayo:

- (a) utaratibu wa maziko ya Mjumbe;
- (b) namna ya uchukuaji habari na matukio wakati wa shughuli za Baraza;
- (c) Wageni wenye mahitaji maalumu ili kuwarahisishia ushiriki na ufuatiliaji wa shughuli za Baraza;
- (d) namna ya utumiaji bora wa Alama za Baraza;
- (e) namna ya kuripoti taarifa za shughuli za Baraza; na
- (f) jambo jengine lolote linalohusiana na utaratibu wa uendeshaji wa shughuli za Baraza.

**176.-**(1) Endapo Kanuni za Kudumu za Baraza la Wawakilishi zitafanyiwa marekebisho, Spika ataagiza Kanuni hizo zichapishwe upya na kutangazwa kwenye Gazeti kwa madhumuni ya kuchanganya marekebisho yote yaliyofanywa.

(2) Nakala zilizochapishwa, zitahesabiwa kuwa ni nakala halisi za Kanuni za Kudumu za Baraza la Wawakilishi zilizofanyiwa marekebisho.

Kufuta na  
kubakiza.

**177.-**(1) Kanuni za Kudumu za Baraza la Wawakilishi, Toleo la mwaka 2020 zinafutwa .

(2) Bila ya kujali masharti ya fasili ya (1) ya kanuni hii, jambo, amri, uteuzi, agizo au suala jengine lolote lililofanyika kwa mujibu wa Kanuni za Kudumu za Baraza la Wawakilishi, Toleo la mwaka 2020 halitakuwa batili na litaendelea kuwa halali hadi litakapobatilishwa, kufutwa au kuagizwa vyenginevyo kwa mujibu wa Kanuni hizi.

**JADWELI LA KWANZA  
KAMATI ZA BARAZA LA WAWAKILISHI  
(Chini ya Kanuni ya 119)**

(1) Kutakuwa na Kamati za Kudumu za Baraza kama ifuatavyo:

**I. KAMATI ZISIZO ZA KISEKTA**

- (a) Kamati ya Uongozi na Shughuli za Baraza; na
- (b) Kamati ya Maadili, Kinga na Fursa za Wajumbe.

**II. KAMATI ZA KISEKTA**

- (a) Kamati ya Utalii, Biashara na Kilimo;
- (b) Kamati ya Kusimamia Ofisi za Viongozi Wakuu wa Kitaifa;
- (c) Kamati ya Mawasiliano, Ardhi na Nishati; na
- (d) Kamati ya Ustawi wa Jamii.

**III. KAMATI ZA USIMAMIZI WA MASUALA YA FEDHA**

Kamati ya Hesabu za Serikali (PAC).

**IV. KAMATI ZA SEKTA MTAMBUKA**

- (a) Kamati ya Kanuni na Sheria Ndogo; na
- (b) Kamati ya Bajeti.

**KAMATI YA BAJETI**

Kamati ya Bajeti itakuwa na majukumu yafuatayo:

- (a) kujadili na kutoa maoni na ushauri kuhusu uandaaji wa mwongozo wa kutayarisha Mpango na Bajeti ya Serikali kwa kila mwaka;
- (b) kufuatilia na kusimamia utekelezaji wa Bajeti ya Serikali;
- (c) kufanya utafiti na uchambuzi kuhusu sera za kodi, sera za fedha na sera za kiuhasibu zilizopendekezwa na Serikali;
- (d) kujadili na kutoa maoni na ushauri kuhusu vyanzo vya mapato ya Serikali na mapendekezo ya hatua za kupunguza utegemezi wa kibajeti;
- (e) kutoa ushauri wa jumla kuhusu bajeti ya Serikali kwa Baraza na Kamati za Kudumu za Baraza;
- (f) kuchambua na kutoa maoni na ushauri kuhusu Mpango wa Maendeleo wa Taifa unaopendekezwa na Serikali;
- (g) kuchambua hoja zitakazojiteza kwenye Kamati za Kudumu za Baraza wakati wa kujadili Bajeti za Wizara kwa ajili ya kutoa ushauri na maagizo kwa Serikali;
- (h) kuchambua mapendekezo ya jumla ya Serikali kuhusiana na Makadirio ya Mapato na Matumizi;
- (i) kufikiria na kuchunguza Miswada ya Sheria itakayokabidhiwa na Spika;
- (j) kuchambua mapendekezo ya Serikali endapo itataka kuwasilisha katika Baraza Mswada wa Matumizi ya Nyongeza kwa mujibu wa kanuni ya 114 ya Kanuni hizi;

- (k) kufuatilia namna sheria zilizotungwa na Baraza zinavyotekelawa na kujuu changamoto za sheria hizo; na
- (l) kufuatilia utekelezaji wa maagizo ya Kamati yaliyotolewa kwenye Ripoti ya Kamati ya mwaka uliotangulia na kutathmini taarifa ya Wizara juu ya utekelezaji wa maagizo hayo na kuwasilisha katika Baraza maoni ya Kamati kuhusu taarifa hiyo.

### **KAMATI YA KANUNI NA SHERIA NDOGO**

1. Kamati ya Kanuni na Sheria Ndogo itakuwa na majukumu yafuatayo:

- (a) kuchambua kanuni na sheria ndogo ili kujiridhisha iwapo zimekidhi matakwa ya masharti ya Katiba, Sheria Mama, na sheria nyengine za nchi;
- (b) kujadili na kutoa mapendekezo kwa taasisi husika juu ya namna bora ya kuandaa kanuni na sheria ndogo;
- (c) kulishauri Baraza kupitisha Azimio la kubatilisha kanuni au sheria ndogo ambazo zinakiuka masharti ya Katiba, masharti ya Sheria Mama au sheria nyengine za nchi;
- (d) kufuatilia utekelezaji wa maagizo ya Kamati yaliyotolewa kwenye Ripoti ya Kamati ya mwaka uliotangulia; na
- (e) kufikiria jambo jengine lolote litakalopelekwa kwake na Spika.

(2) Utaratibu wa Kujadili kanuni na sheria ndogo utakuwa kama ifuatavyo:

- (a) Kamati au Mjumbe yeote anayetaka kanuni, sheria ndogo, sehemu ya kanuni au sheria ndogo ibadilishwe, atapeleka hoja yake kwenye Kamati ya Kanuni na Sheria Ndogo.
- (b) Kamati ya Kanuni na Sheria Ndogo, baada ya kupokea hoja ya aina hiyo, itaijadili na kama itaona ni ya msingi, itaiwasilisha katika Baraza kwa lengo la kuliomba Baraza libatilishe kanuni au sheria ndogo au sehemu ya kanuni au sehemu ya sheria ndogo;
- (c) endapo hoja hiyo itakubaliwa na Baraza, kanuni, sheria ndogo, sehemu ya kanuni au sheria ndogo inayohusika, itakuwa haina nguvu za kisheria;
- (d) kanuni au sheria ndogo zote zinazopendekezwa, kusahihishwa au zinazoendelea zitaandikwa kwa lugha ya Kiswahili na ikihitajika kwa lugha ya Kiingereza; na
- (e) Kamati ya Kanuni na Sheria Ndogo itawasilisha Ripoti yake katika Baraza wakati wowote kwa mujibu wa masharti ya Kanuni hizi.

## **KAMATI YA KUSIMAMIA MASUALA YA FEDHA**

1. Kamati ya Kusimamia Masuala ya Fedha itakuwa na majukumu yafuatayo:
  - (a) kuchunguza na kutoa taarifa juu ya Hesabu za mwaka ya matumizi ya Fedha za Serikali na Mashirika yake na hesabu nyengine zozote zitakazowasilishwa mbele ya Baraza kuititia Ripoti ya Mdhibiti na Mkaguzi Mkuu wa Hesabu za Serikali;
  - (b) kuchambua na kutafakari ripoti yoyote ya Mdhibiti na Mkaguzi Mkuu wa Hesabu za Serikali pale

- ambapo Rais aliagiza ukaguzi huo ufanywe;
- (c) kujadili bajeti ya Afisi ya Mdhibiti na Mkaguzi Mkuu wa Hesabu za Serikali.
  - (d) kuchunguza kwa njia yoyote inayofaa mambo yote yanayohusu hesabu za Serikali na taasasi zake;
  - (e) kutoa taarifa yake baada ya kufanya uchunguzi kuhusiana na matumizi ya ziada ya fedha iliyotolewa kwa mwaka wa fedha unaohusika;
  - (f) kufuatilia utekelezaji wa maagizo ya Kamati yaliyotolewa kwenye Ripoti ya Kamati kwa mwaka uliotangulia; na
  - (g) kupitia na kujadili makadirio ya Mapato na Matumizi ya Afisi ya Mdhibiti na Mkaguzi Mkuu wa Hesabu za Serikali.
2. Katika kufanya kazi zake, Kamati ya Kusimamia Masuala ya Fedha itakuwa na wajibu wa kuchunguza:
- (a) fedha zilizooneshwa katika Makadirio ya Matumizi ya Serikali na Mashirika yake zimetumika kama ilivyokubaliwa;
  - (b) matumizi kama yalikuwa chini ya mamlaka iliyohusika; na
  - (c) matumizi yaliyofanywa kama yalizingatia thamani halisi ya fedha.
3. Majadiliano ya Kamati ya Kusimamia Masuala ya Fedha yanaweza kurikodiwa kwa njia ya kieletroniki.

## **KAMATI YA MAADILI, KINGA NA FURSA ZA WAJUMBE**

1. Kamati ya Maadili, Kinga na Fursa za Wajumbe itakuwa na majukumu yafuatayo:-
  - (a) kuchunguza na kutoa mapendekezo kuhusu masuala yote ya haki, kinga na uwezo wa Baraza yatakayopelekwa na Spika;
  - (b) kushughulikia mambo yanayohusu maadili ya Wajumbe yatakayopelekwa na Spika; na
  - (c) kufuatilia malalamiko yaliyowasilishwa na Spika chini ya Kanuni za Baraza.
- (2) Mara baada ya kupokea shauri lolote kwa mujibu wa kanuni hii, Kamati ya Maadili, Kinga na Fursa itakutana haraka iwezekanavyo kufikiria na kuchunguza jambo hilo.
- (3) Mara baada ya kushauriwa na Kamati ya Maadili, Kinga na Fursa kwa mujibu wa fasili ya (1) ya kanuni hii, Spika atalazimika kukubaliana na ushauri huo au vyenginevyo kuwasilisha mbele ya Baraza kwa ajili ya uamuzi.

## **KAMATI ZA KISEKTA**

Kamati za Kisekta zitakuwa na majukumu yafuatayo:

- (a) kufuatilia utekelezaji wa sera na mipango ya Wizara husika kwa kadri Spika atakavyoelekeza kwa mujibu wa malengo yaliyowasilishwa katika Baraza wakati wa uwasilishaji wa Bajeti na hotuba nyengine za Waziri alizotoa katika Baraza;
- (b) kufuatilia utekelezaji wa miradi ya Maendeleo ya Kitaifa na miradi ya wananchi ya wizara husika;
- (c) kuchunguza na kufuatilia Mapato na Matumizi ya kila

mwaka ya Serikali na kama matumizi yaliyofanywa yalizingatia thamani halisi ya fedha;

- (d) kuchambua mapendekezo ya Serikali kuhusu makadirio ya Wizara husika ya Mapato na Matumizi ya kila mwaka;
- (e) kufuatilia utekelezaji wa maagizo ya Kamati yaliyotolewa katika Ripoti ya Kamati ya mwaka uliyotangulia;
- (f) kushughulikia Miswada ya Sheria itakayokabidhiwa kwake na Spika;
- (g) kuchambua ahadi zote za Wizara zilizo chini ya Kamati kama zitakavyokuwa zikitolewa katika Baraza na kufuatilia utekelezaji wa ahadi hiso; na
- (h) kufikiria jambo jengine lolote litakalopelekwa kwake na Spika.

**JADWELI LA PILI  
KANUNI ZA MAADILI KWA AJILI YA WAJUMBE WA  
BARAZA LA WAWAKILISHI**

(Chini ya kifungu cha 13 cha Sheria ya Baraza la Wawakili-shi

(Kinga, Uwezo na Fursa) na kanuni ya 70 ya Kanuni hizi).

**1. Lengo la Kanuni za Maadili**

Lengo la Kanuni za Maadili ni kuwasaidia Wajumbe katika utekelezaji wa majukumu yao kwenye Baraza, kwenye majimbo yao na katika jamii kwa ujumla.

**2. Wajibu kwa Jamii**

- (a) Wajumbe wote wameapa kiapo cha utii na kwa mujibu wa kiapo hicho Wajumbe wana wajibu wa kuwa waaminifu na watifu kwa Zanzibar na wana wajibu wa kuihifadhi, kuilinda na kuitetea Katiba na kutetea sheria na kila wakati kutekeleza majukumu yao kwa mujibu wa imani kubwa ambayo jamii imewapa.
- (b) Wajumbe wana wajibu wa kutekeleza majukumu yao kwa maslahi ya taifa kwa ujumla na wana wajibu mkubwa kwa majimbo yao.

**3. Maadili Binafsi ya Wajumbe**

**Wajumbe ni lazima wazingatie kanuni za maadili zifuatazo:**

- (a) Kutokuwa Wabinafsi: Wajumbe wanatakiwa wafanye maamuzi kwa maslahi ya jamii tu. Hawatakiwi kufanya maamuzi kwa ajili ya kujipatia maslahi ya kifedha au kitu kwa ajili yao wenyewe, familia au marafiki zao.

- (b) Uadilifu: Wajumbe wasijiingize kwenye dhima za kifedha au dhima nyenginezo kwa watu wengine au kwa jumuiya ambazo zinaweza kuingilia utendaji wa majukumu yao.
- (c) Kutokufanya Upendeleo: Katika utekelezaji wa majukumu hususani wakati wa kupendekeza watu kwa ajili ya uteuzi kwenye nafasi za umma, kwenye utoaji wa mikataba ya zabuni, katika kufanya mapendekezo ya watu wanaostahiki tunzo au maslahi fulani, Wajumbe ni lazima watekeleze majukumu hayo kwa mujibu wa vigezo vinavyokubalika.
- (d) Uwajibikaji: Wajumbe kwa maamuzi yao na vitendo vyao wanawajibika kwa wananchi na ni lazima wawe tayari kukubali kufanyiwa uchunguzi unaostahiki.
- (e) Uwazi: Wajumbe ni lazima wawe watu wa uwazi kwa kiasi kikubwa kinachowezekana kuhusu maamuzi wanayoyafanya na hatua wanazozichukua na ni lazima watoe sababu za maamuzi wanayoyafanya na wasizue habari au taarifa isipokuwa tu kama maslahi ya jamii yanalazimisha kuzuia.
- (f) Ukweli na Uaminifu: Wajumbe wana wajibu wa kutangaza maslahi binafsi waliyonayo yanayohusiana na kazi zao za uwakilishi na wanawajibika kujiepusha na migongano ya kimaslahi ili kulinda maslahi ya jamii.
- (g) Uongozi: Wajumbe ni lazima waunge mkono na waimarishe utawala bora kwa kuongoza kwa vitendo na kuwa mfano bora.

#### 4. Maslahi ya Umma

Wajumbe kwa dhati ya tabia na matendo yao, wanapaswa kuzingatia maslahi ya umma na kujiepusha na migongano ya maslahi binafsi na maslahi ya umma na mara zote wanatakiwa kuweka mbele maslahi ya umma.

## **5. Imani ya Jamii**

Wajumbe wakati wote wanalazimika kudhibiti mwenendo na tabia zao ili kuendeleza na kuimarisha imani ya jamii kuhusiana na heshima na hadhi ya Baraza, Wajumbe wajiepushe kufanya kitu chochote ambacho kitapelekea Baraza na Wajumbe kwa ujumla kudharauliwa.

## **6. Rushwa**

Ni kosa na ni kinyume na Kanuni za Maadili kwa Mjumbe kukubali kupokea hongo, zawadi, malipo au fidia kwa madhumuni ya kushawishiwa ili aunge mkono au apinge Mswada, Hoja au jambo lolote lililowasilishwa au litalowasilishwa kwenye Baraza.

## **7. Kutangaza Maslahi**

Mjumbe anawajibika kutekeleza matakwa ya kanuni kwamba ni lazima aainishe na atangaze maslahi binafsi aliyonayo kwenye shughuli inayotekelawa na Baraza au Kamati au kwenye mawasiliano yake yoyote na Mawaziri, Idara za Serikali au taasisi za Serikali.

## **8. Uwazi**

Katika shughuli zozote anazozifanya Mjumbe katika jumuiya yoyote au taasisi yoyote au kwa niaba ya jumuiya yoyote au taasisi yoyote ambapo Mjumbe ana uhusiano wa kifedha na taasisi au jumuiya hiyo hata katika shughuli za kawaida zisizo rasmi au mikutano ya ndani isiyo rasmi, Mjumbe anapaswa kuwa muwazi na mkweli kuhusu shughuli hizo.

## **9. Kuwa Wakili anayelipwa**

Inakatazwa Mjumbe kuwa wakili anayelipwa kwa ajili ya kumuwalisha mtu ye yoyote au taasisi yoyote katika shughuli zozote za Baraza.

## **10. Malipo kutumika Visivyo**

Mjumbe yeote haruhusiwi kutumia visivyo malipo yoyote aliyopewa kwa kazi maalumu ya umma na ni lazima ahakikishe anaafuata kiukamilifu taratibu zinazohusiana na malipo hayo.

## **11. Utumiaji wa Taarifa zilizopokelewa na Wajumbe**

Wajumbe ni wajibu wao kukumbuka kwamba taarifa wanazozipokea katika utekelezaji wa majukumu yao kwa mujibu wa nafasi zao wakiaminiwa wakiwa ni Wawakilishi wa wananchi wanapaswa kuzitumia taarifa hizo kwa lengo hilo tu la kutekeleza majukumu yao na kamwe taarifa hizo zisitumike kwa ajili ya kujipatia umaarufu wala kwa ajili ya kujipatia maslahi ya kifedha.

## **12. Mambo ambayo hayajawekewa Utaratibu**

Kwa mambo mengine yoyote ambayo hayajawekewa utaratibu au masharti kwenye Kanuni hizi za Maadili, Wajumbe wanaweza kuomba ushauri kutoka kwa Spika au Kamati ya Maadili, Kinga na Fursa za Wajumbe.

